

Pexanialivaisi Jesucristo pelivaisi, San Mateo peyaquinaelivaisi

*Jesucristo pijasalinaivimi yabara pelivaisi
(Lc 3.23-38)*

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinë pemomoxiyajuvënë. Davidpijinë pijinia Abrahampijinë pemomoxiyajuvënë. ² Copiaya Abrahampijinëmi xaina pexënato. Pevënë Isaac. Isaacpijinë juya pexënato xaina. Pevënë Jacob. Jacobpijinë juya pexi xaina. Pexiyajuvënëne pevënë Judá. Judápijinë pematapijinëbeje, pejuyapijivi ata, xaina. ³ Judápijinë juya pexënatobeje xaina. Itsanë pevënë Fares. Itsanë Zara. Bajara-ponëmibeje penapijiva pevënë Tamar. Farespijinë juya pexënato xaina. Pevënë Esrom. Esrompijinë juya pexënato xaina. Pevënë Aram. ⁴ Arampijinë juya pexënato xaina. Pevënë Am-inadab. Aminadabpijinë juya pexënato xaina. Pevënë Naasón. Naasónpijinë juya pexënato xaina. Pevënë Salmón. ⁵ Salmónpijinë juya pexënato xaina. Pevënë Booz. Boozpijinë penapijiva pevënë Rahab. Boozpijinë juya pexënato xaina. Pevënë Obed. Obedpijinë penapijiva pevënë Rut. Obedpijinë juya pexënato xaina. Pevënë Isaí. ⁶ Isaípijinë juya pexënato xaina. Pevënë

David. Bajaraponëmi nacuaevetsinëmi. Davidpijinë yacajérëta Uríaspijinë pijavami. Nexata bajarapajivibeje juya pexënato xainabeje. Pevënë Salomón. ⁷ Salomónpijinë juya pexënato xaina. Pevënë Roboam. Roboampijinë juya pexënato xaina. Pevënë Abías. Abíaspijinë juya pexënato xaina. Pevënë Asa. ⁸ Asapijinë juya pexënato xaina. Pevënë Josafat. Josafatpijinë juya pexënato xaina. Pevënë Joram. Jorampijinë juya pexënato xaina. Pevënë Uzías. ⁹ Uzíasprijinë juya pexënato xaina. Pevënë Jotam. Jotampijinë juya pexënato xaina. Pevënë Acaz. Acazpijinë juya pexënato xaina. Pevënë Ezequías. ¹⁰ Ezequíasprijinë juya pexënato xaina. Pevënë Manasés. Manaséspijinë juya pexënato xaina. Pevënë Amón. Amónpijinë juya pexënato xaina. Pevënë Josías. ¹¹ Josíasprijinë juya pexi xaina. Pexiyajuvënënë pevënë Jeconías. Jeconías pematapijinë, pejuyapijivi ata, xaina. Pamatacabi Israel nacuapijivi cobecëbiaya caponatsi Babilonia nacuayabelia, bajarapamatacabi naexana Jeconíasprijinë.

¹² Bajaraxuacujinae Jeconíasprijinë juya pexënato xaina. Pevënë Salatiel. Salatielpijinë juya pexënato xaina. Pevënë Zorobabel. ¹³ Zorobabelpijinë juya pexënato xaina. Pevënë Abiud. Abiudpijinë juya pexënato xaina. Pevënë Eliaquim. Eliaquimpijinë juya pexënato xaina. Pevënë Azor. ¹⁴ Azorpijinë juya pexënato xaina. Pevënë Sadoc. Sadocpijinë juya pexënato xaina. Pevënë Aquim. Aquimpijinë juya pexënato xaina. Pevënë Eliud. ¹⁵ Eliudpijinë juya pexënato xaina. Pevënë Eleazar. Eleazarpijinë juya

pexënato xaina. Pevënë Matán. Matánpijinë juya pexënato xaina. Pevënë Jacob. ¹⁶ Jacobpijinë juya pexënato xaina. Pevënë José. Bajaraponëmi María pamona. Bajarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi.

¹⁷ Nexata Abrahampijinëmita petaxuxuabicusinae jivi penaexanaponaejava, trecenëta naexana Davidpijinë. Bajaraxuacujinae icatsia Davidpijinëmita petaxuxuabicusinae jivi penaexanaponaejava, trecenëta icatsia naexana Jeconíaspijkenë. Pamatacabí Israel nacuapijivi cobecëbiaya caponatsi Babilonia nacuayabelia, naexana Jeconíaspijkenë. Bajaraxuacujinae icatsia Jeconíaspijkenëmita petaxuxuabicusinae jivi penaexanaponaejava, trecenë pijavata naexana Jesucristo Jane baja, ponë Dioso athëbëvetsica itoroba jivi pecapanepaenexa.

*Pacuenia Jesús naexana yabara pelvaisi
(Lc 2.1-7)*

¹⁸ Jesucristo itsa naexana mapanacuataje, naexana mapacueniae. Copiata Josébeje Maríabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajénaeyabeje, María nayapétane penacoxitsijava Espíritu Santo pejamatabëcueneta. ¹⁹ José, María Jane baja pamonganexa, bitso penajamatabëcuenereviabinë. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bëpënëa jamatabëjumai tsaponaponae:

—Itsanëjavabelia María nacoxita. Nexata ajumejibia copatsianajë. Apo pitsinë baja tsane María tajavanexa, jamatabëjai picani bëpënëa tsaponaponae José.

20 Pamatacabí abaxë José bajarapacuenia na-jamatabëxainaponapona, majitsinaebota José tsitanaitajëtsi Dioso pitorobinëtsica, ángel. Nexata ángel jumaitsi Joséjavabelia:

—José, xamë raja Davidpijinë pemomomë. Pëtsa cujunavame nepitsijava María nijavanexa. Tspaji raja panacueto María yacotaponapona, Espíritu Santo saya pejamatabëcuena nacoxita.

21 Bajarapova exanaena penacuetonëyo. Vénérubianame bajarapanacuetonëyo Jesús. Tspaji raja bajaraponë capanepaena daxita pijajivi pibisiacuene pexanaeneconimivecua.

22 Bajarapacuenia María penacuetonëyo exanaena pecopiapatsinxexa pacuenia baja cajena bajayata Diosojumepaebinëmi profetanëmi Dioso pejamatabëcuena tajëvelia vajunupaeba. Profetanëmi bajayata tajëvelia bajarapanacuetonëyo yabara jumaitsi mapacueniae:

23 Petiriva apo naperabëquenatsinejeva pebijavabelia, nacoxitsiana. Exanaena penacuetonëyo. Vénérubianatsi Emanuel. “Emanuel,” pejajume: “Dioso nacayajava,” pejajume,

jai bajayata tajëvelia profetanëmi Dioso pejamatabëcuena, jai ángel majitsinaebota Joséjavabelia.

24 Nexata José piamañitsinaecujinae naëcota. José jumecovënëta pacuenia itorobatsi ángel. Nex-

ata baja José pijaboyaberena María barëpata pijavanexa. ²⁵ Itsiata abaxë José apo imoxoyobi pijava penamataxainaenacuetonëyo pevecuanaexanaevajënaeyatsi. Bajarapanacuetonëyo jane baja José vënéruba JESUS.

2

*Pacuenia tulupu perubenaejava pecanaëcobivi
najetarubena petaenexa Jesúsnëyo yabara pelivaisi*

¹ Jesúsn naexana Belén tomarata, Judea nacuata peecaetomarata. Bajarapamatocabi nacuaevetsinë Herodes Judeanacua eveta. Nexata Jesúsn penaexanaecujinae, pebijivi, tulupu perubenaejava pecanaëcobivi, pata tajënaucuajavetsina. Pata Jerusalén tomarajavabetsina. ² Tulupu perubenaejava pecanaëcobivi yanijobapona jivijavabelia:

—¿Detsa jota barëecatsi panacuetonëyo naexana judíovi pepo pevetsinënexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yaiyataeya patamatabacabéta patatonubenaenexa, jai tsaponae jivijavabelia tulupu perubenaejava pecanaëcobivi.

³ Nexata Herodes, Judeanacua pevetsinë, vënélivaisitane tulupu perubenaejava pecanaëcobivi bajarapacuenia pejumaitasponaejava jivijavabelia Jesúsnëyo yabara. Nexata Herodes bitso najamatabëxaina. Daxita

Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyauquinaelivaisita bajaraponë penaexanaejavanexa yabara tajëvelia jumaitsi mapacueniaje:

⁶ Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajarazuata Judea nacuata penaetomaraxi, daxita tomraxivecua, Be léntomara cajena bitso peyaiyataetomaratsi tsane, jai baja cajena mapacueniaje bajayata tajëvelia Diosojumepaebinëmi profetanëmi peyauquinaelivaisita, jai penacaetuatsivi Herodesjavabelia.

⁷ Bajarazuacujinae Herodes muetsia junata tajënacuavetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatusuluputo penaitajétsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaermenä. Nexata xanë ata nalianë tsane. Yaiyataeya tamatabacabëta tonanucaejectsanë bajaraponëyo pitabarata, jai Herodes tulupu perubenaejava pecanaëcobivijabelia.

⁹ Nexata Jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia pena-jetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsnëyo pena barëecatsi pematasëñëatsia, bajarapatuluputo rucojopa.

¹⁰ Tulupu perubenaejava pecanaëcobivi itsa tane bajarapatuluputo, bitso barëya. ¹¹ Nexata bajarapamonae boyalia itsa joneya, tane Jesúsnëyo, pena yajava. Nexata tulupu perubenaejava pecanaëcobivi yaiyataeya pematabacabëta tonubenajunua Jesúsnëyo pitabarata. Bajaraxuacujinae pecapatsicajonixi matapania, penamatamotsijavanë pejebicajonixi. Nexata Jesúsnëyo rajuta orojavanë. Rajutanua petuxujuvijavabeje. Itsajava inciensovënëjava. Itsajava mirravënëjava. ¹² Bajaraxuacujinae

tulupu perubenaejava pecanaëcobivi meravi majitsinaebota Dioso itavetatsi penaviabiyaniva nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsnëyo Egipto nacuayabelia yabara pelivaisi

¹³ Tulupu perubenaejava pecanaëcobivi penaviabicujinae, Dioso pijaángel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuayabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tsipaji raja nacuaevetsinë Herodes tsiquirinëyo tsimaxërenajitsatsi pebeyaxuabinexatsi, jai ángel Joséjavabelia.

¹⁴ Nexata José nonotapuna. Piamañitsinaemeravi baja José barëpona Jesúsnëyo, pena yajava. Barënajetabajirava Egipto nacuayabelia.

¹⁵ Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuayaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenajë penaviatsinexa Egipto nacuaverena,” jai ra Dioso, jai baja cajena bajayata tajëvelia profetanëmi Jesús yabara.

*Pacuenia nacuaevetsinë Herodes pijajivi
itoroba pebinacuetoxi pebeponaenexa yabara
pelivaisi*

¹⁶ Nacuaevetsinë Herodes picani jumaitsi tulpu perubenaejava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsnëyo yabara. Itsiata tulpu perubenaejava pecanaëcobivi caxitajarabi ata Jesúsnëyo, apo vajunucaponae Herodesjavabelia. Nexata Herodes itsa yapëtane tulpu perubenaejava pecanaëcobivi apo pevajunucaponaejavatsirena, caxitajarabi ata Jesúsnëyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomara jumavelia penaebonëjava ata. Daxita papebinacuetoxi abaxë apo xainae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsnëyo picani peyajavabeyaxuabinexatsi. Tsipaji tulpu perubenaejava pecanaëcobivi Herodesjavabelia tsipaeba paepatota taxuxuaba petaejava tuluputo. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspjinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspjinë peyaquinalivaisita tajëvelia jumaitsi mapacueniaje:

18 Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi, jai bajayata tajëvelia profeta Jeramíaspiginë peyaquinaelivaisita pecoxibeponaejavanexatsi yabara bajarapatomarata.

19 Nacuaevetsinë baja Herodes pepuatëpae, Dioso icatsia pijángel itoroba Joséjavabelia. Nexata ángel meravi majitsinaebota José tsitanaitajétatsi Egipto nacuata. **20** Nexata ángel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuayabelia. Tëpa rabaja ponë picani jamatabëbeyaxuabatsi tsiquirinëyo, jai ángel majitsinaebota Joséjavabelia.

21 Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuayabelia. **22** Nacuaevetsinëmi Herodespiginë pexënato pevënë Arquelao. Nexata Arquelao eveta Judeanacula paxa pevënamuto. Nexata José itsa vënélivaisitane nacuaevetsinëmi Herodespiginë pexënato pevetsijava Judeanacula, José cujunava Jesúsnëyo pebarëponaejava Judea nacuayabelia. Majitsinaebota José Dioso itavetatsi Jesúsnëyo pebarëponaeyaniva Judea nacuayabelia. Nexata José barëpona Jesúsnëyo Galilea nacuayabelia. **23** José itsa barëpata Jesúsnëyo Galilea nacuayabelia, Nazaret tomarata

barëpatajopa pebarëecaenexa Nazaret tomarata. Bajarapacuenia José Nazaret tomarata itsa barëeca Jesúsnëyo, copiapata jane baja pacuenia baja cajena bajayata Diosojumepaebivimi profetavi tajëvelia jumaitsi. Diosojumepaebivimi profetavi bajayata baja cajena tajëvelia jumaitsi Jesús yabara mapacueniaje: “Ponë Dioso itorobijtsiatsica jivi pecapanepaenexa, bajaraponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

3

Pacuenia Juan jivibautisabinë Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús itsa baja xaina bejamatabëcuene treinta pavaibeje, Juan jivibautisabinë najetaruca Judea nacuatusatojava. ² Juan jivibautisabinë Dioso pitorobilivaisi jivi tsipaebanajetaruca. Jumai tsanajetarucae mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexasa baja pacopabare pibisiacuene paneexanabiabijava. Panajamatabëcuenepënëyorore Diosojavelia, jai tsanajetarucae Juan jivijavabelia.

³ Bajarapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinëmi profeta, Isaíaspijkenë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi petsipaebanajetarucaejavexa yabara, yaquina.

Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejesia petuxanenë. Batoroviaexananua namuto. Bajara pijinia pacuenia paxamë ata panajamatatabëcunexaniavaere pepo petuxanenë pepatsivajënaeyarena,” jai tsane tanejumelivaisipaebinë,

jai profeta Isaíaspijinë bajayata peyaquinaelivaisita Dioso pitorobilivaisi Juan jivi petsipaebanajetarucaejavexa yabara.

⁴ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene imoxoyopijivi ata. ⁶ Nexata bajarapamonae pibisiacuene pexanaejavami, rovialia Diosojavabelia navecuapaebapona. Nexata bajarapamonae Juan bautisabapona Jordán meneta.

⁷ Jivibitsaëtoxaneto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacaca-panepaena, jamatabëjai.

Nexata Juan itsa tane ayaubitsaëtoxaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpa itsa tane isoto petajuenajetarucæjava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa.

⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia.

⁹ Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecacapanepaenexa. Dioso baja cajena caëjëpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso.

¹⁰ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata

bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi. ¹¹ Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Najamatatabëcuenepënëyorotanua Diosojavabelia. Itsiata baitsi jane ponë tacovëverena najetarucaena, tabautisabivi Espíritu Santo tsijamatatabëjoneyaexanaenatsi, pitarunutsicotia yajava. Xanë raja saya beveliajamatabëcuenenëne bajaraponëvecua. Nexata bajaraponë vecuaauranë pijazapato ata tatocaponaenexa bepijajivitonëcuenianë. ¹² Arrozzainaenë baja itsa vereta arroz pesiricaejava, jéaba arroz pejéabijavata pepitsinexa ëpexu. Nexata pijaarroz pejéabijavata, saicaya tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonae pijinia Dioso pejumecovënëtsivi, Dioso capanepaenatsi pijanacuayabetsia. Pamonae pijinia Dioso apo jumecovënëtsi, Dioso naneconsiaexanaenatsi daxitamatacabijavabelianexa apo pevereverecaeisotojavabelia, jai Juan daxita bajarapamonaejavabelia.

*Pacuenia Juan bautisaba Jesús yabara pelivaisi
(Mr 1.9-11; Lc 3.21-22)*

¹³ Jesús naropota Galilea nacuajavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. ¹⁴ Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

¹⁵ Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús.

¹⁶ Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi. ¹⁷ Nexata Juan jumetane athëbëvetsica Dioso pejumatisijava: “Mara ponë taxënato tasivanëje. Sivajamatabëcuenebarëyanë bitso,” pejaijava.

4

Pacuenia Jesús jamatabëcueneëjëbatsi dovathi yabarapeli

(Mr 1.12-13; Lc 4.1-13)

¹ Jesús pebautisabicujinaetsi, Espíritu Santo ponaeyaexanatsi petusato nacuayabelia. Bajarabelia ponaeyaexanatsi pejamatabëcueneëjëbinexatsi dovathi.

² Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³ Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapaibotonëje penaexanaenexa pan, jai dovathi.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae épexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo pevereverecaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia. ⁶ Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevetsinexa Dioso pejumelivaisibaxutota jumaitsi mapacueniaje:

Dioso itorobianica pijáangelevi pecaevetsinexa.

Nexata ángelevi pecobeta cayotsiana pecataxutsaquisiyániva ibotonëjavabelia, jai Dioso pejumelivaisibaxutota xamë pecaevetsinexa ángelevi, jai dovathi Jesúsjavabelia.

7 Jesú斯 nexata icatsia jumaitsi dovathijavabelia:
 —Jume raja. Dioso raja pijinia pejumelivaisibaxutota jumaitsi mapacueniaje:
 “Itsajivi ata jamatabëcuenenavëxaniabiaya
 pijacuata apo bejamatabëjumaitsi: ‘Xanë Dioso
 jamatabëcueneëjëtsianajë. Nexata exanaenajë
 pacuene bitso netsiayai tatëpanexa. Itsiata
 Dioso neyavenonaena tavecuanepaenexa
 bajaraxua. Nexata bajarapacuenia yapëtaenajë
 Dioso taneyavenonaejava,’ apo bejamatabëjai,”
 jai Dioso pejumelivaisibaxutota, jai Jesú斯
 dovathijavabelia.

8 Jesú斯 icatsia barëliatsi dovathi pinijitsutoxane-
 tojavabelia. Barëjunayatsi bajarapatsutojumabet-
 sia. Nexata bajarapatsutojumavetsica dovathi
 Jesú斯 tsitajëtatsi daxitanacuanë. Daxita bajara-
 panacuanëta daxitacuene pexaina/java yajavat-
 sitajëtatsi. **9** Nexata icatsia dovathi jumaitsi
 Jesúsjavabelia:

—Ayajamatabëcuenenënë netaeya taitabarata
 nematabacabëta itsa netonucajunuame, nexata
 daxita mapanacuanëtaje, daxitacuene xua xaina,
 cayajavarajutsianatsi, jai dovathi Jesúsjavabelia.

10 Nexata Jesú斯 jumaitsi dovathijavabelia:
 —Dovathi, nevecuanatixire. Dioso raja
 pejumelivaisibaxutota jumaitsi mapacueniaje:
 “Daxitajivi vajëcae pematabacabëta caenë pepo
 petuxanenë Diosojavabelia. Tonacueñebinua
 bajaraëponënëx,” jai raja Dioso pejumelivaisi-
 baxutota, jai Jesú斯 dovathijavabelia.

11 Nexata baja dovathi Jesú斯 vecuaponatsi. Ba-
 jaraxuacujinae ángelevi patsica Jesú斯 peyavenon-
 aenexatsi.

*Pacuenia Jesú斯 Galilea nacuata taxuxuaba
Dioso pitorobilivaisi jivi petsipaebijava yabara
pelivaisi*

(Mr 1.14-15; Lc 4.14-15)

12 Jesú斯 vénélivaisitane Juan peetsijavatsi penaneconitsivi pejebabiabibota. Nexata Jesú斯 pona Galilea nacuayabelia. 13 Itsita Jesú斯 apo ponaponae Nazaret tomarata. Ponapona Capernaum tomarata. Capernaum tomara eca Zabulónvénë nacuabeje Neftalivénë nacuabejejavata. Capernaumtomara eca pucaxanetoitapata. 14 Bajarapacuenia Jesú斯 itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajévelia yaquina Jesú斯 pelivaisi. Dioso pitorobilivaisi Jesú斯 Capernaum tomarata jivi petsipaebijavanexa yabara, Isaíaspijinë peyauquinalivaisita tajévelia jumaitsi mapacueniae:

15-16 Zabulón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaaevi ata, itsaxuayo jinavanapa ayaubitsaëtoxanetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi

itsa tsipaebianatsi Diosojavabelia
pecapanepaelivaisinexatsi,
jai tajëvelia Isaíaspijinë peyaquinaelivaisita Dioso
pitorobilivaisi Jesùs petsipaebijavanexa yabara
bajarapanacuanëpjivijavabelia.

¹⁷ Nexata Capernaum tomarata Jesùs taxuxu-
aba Dioso pitorobilivaisi jivi petsipaebijava.
Dioso pitorobilivaisi Jesùs itsa tsipaeba,
jivijavabelia jumai tsaponaemapacueniaje:

—Dioso rabaja papecaevetsimatacabinexa,
imoxoyo baja pevajënae pecopiapatsinexa.
Nexata baja pacopabare pibisiacuene pane-
exanabiabijava. Panajamatabëcuenepënëyorore
Diosojavabelia, jai tsaponaes Jesùs jivijavabelia.

*Pacuenia Jesùs junata cuatro ponëbeje dujuai
peyamatajucabiabivi yabara pelivaisi*
(Mr 1.16-20; Lc 5.1-11)

¹⁸ Jesùs najetaruca Galilea pucaxaneto itapaya. Nexata Galilea pucaitapata Jesùs taenuta anijanëbeje nacaebananëbeje, Simónbeje Andrésbeje. Simón itsavënë Pedro. Bajaraponëbeje daxitamatocabi canacujitsia dujuai yamata-
jucabiababeje. Dujuai peyamatajucabiabija-
vatabeje, yamatajucaponaponabeje. ¹⁹ Nexata Jesùs jumaitsi Simónbeje Andrésbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesùs.

20 Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepëta.

21 Bajaráxuacujinae icatsia bebeliayó pevajénaeyabelia Jesús barépona. Icatsia taenuta anijanébeje nacaebananébeje, Zebedeo pexénatobeje. Bajáraponébeje Santiago beje Juanbeje. Pijajeraënéta paxa yajava xanebaponapónabeje dujuai peyamatajucaejavanelxabeje. Nexata icatsia Jesús junata Santiago beje Juanbeje. **22** Nexata bajarajota paxa puenetanutabeje jera yajava. Santiago beje Juanbeje naponabeje baja Jesús pepëta.

*Pacuenia Jesús livaisi tsipaeba jivi
ayaibitsaëtoxanetojavabelia yabara pelivaisi
(Lc 6.17-19)*

23 Jesús Jane baja najetaruca daxita Galilea nacuajava. Dioso pitorobilivaisi tsipaebapona judíovi penacaetutabiabibonéjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriatane pexainaevimi. **24** Nexata daxita Siria nacuajava pejinavanapaevi ata vënélivaisitanetsi Jesús. Jesús tocapatatsi daxitaviriatane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamona. **25** Nexata Jesús pénaponatsi jivi ayaibitsaëtoxaneto Galilea nacuapijivi, Decápolis nacuapijivi ata,

Jerusalén tomarapijivi ata, Judea nacuapijivi ata, Jordánmene itsapanaverenapijivi ata.

5

*Pacuenia Jesús jivi lívai tsipaeba
petsutoyenepanajavata yabara pelivaisi
(Lc 6.20-23)*

¹ Jesús itsa tane jivibitsaëtoxaneto, nexata juna ya petsutotsia. Bajarapatsutoyenepanata epatota ecaya. Nexata bajarajota Jesús pijajivi mata-toyorotsia na caetuata tatsu. ² Nexata Jesús taxuxu-abá livaisi petsipaebijava. ³ Jesús jumaitsi pijajivi-javabelia mapacueniaje:

—Jamatabëcuenebarëya tsavanapae tsane pamonae picani mapanacuata yajamatabëcuenebëjai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

⁴ 'Jamatabëcuenebarëya tsavanapae tsane pamonae picani mapanacuata bejamatabëjiobi tsavanapae itsamonaes pibisiacuene petoexanaexaetsi. Bajarapamonae Dioso jamatabëcuene yavenonaenatsi.

⁵ 'Jamatabëcuenebarëya tsavanapae tsane pamonae apo jamatabëbëjai tsabiabi mapanacuata, itsacueniababiabi atatsi itsamonaes. Apo cuenecanaviatabiabinua. Bajarapamonae jinavanapaena Dioso pijanacuata tatsu pacuenia Dioso najumecapanepaeya jumaitsi bajarapamonae yabara.

6 'Jamatabëcuenebarëya tsavanapae tsane pamona mapanacuata bitso daxitacuene matatox-enetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacuene.

7 'Jamatabëcuenebarëya tsavanapae tsane pamona mapanacuata itsamona ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

8 'Jamatabëcuenebarëya tsavanapae tsane pamona mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

9 'Jamatabëcuenebarëya tsavanapae tsane pamona mapanacuata penaitoyavimi ata, nabara-jamatabëcuene xanepanaeyaexanapona. Bajarapamonae yabara: "Taxi," jai tsane Dioso.

10 'Jamatabëcuenebarëya tsavanapae tsane pamona mapanacuata beiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

11 'Patabajivixaemë, itsamona pibisi-acuenia itsa pacabaracuaicuajai, itsiata pajamatabëcuenebarëyamë tsavanapae tsane. Bajarapamonae pacabejiobiaexanae ata tsane, najumetsënëtsiaya pacabaracuaicuajai atanua tsane, itsiata pajamatabëcuenebarëyamë tsavanapae tsane. **12** Bajara tsipaji pacuenia panevajënaeyapijivimi ata, Diosojumepaebivimi profetavi, bajayata beiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacalexanaena. Tcipaji raja athëbëtatsia itsamatacabi Dioso

pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi

(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Yajobeno xanepana vajaexabinexa pevi piabejeyaniva. Paxamë rabaja pijinia bepayajomë tsavanapae mapanacuapijivijabbeliale, mapanacuapijivi bitso piabejeyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ 'Pacuenia piaitayotsicotia itayota piaitaquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame pijamatobëcueneitaquirivimi. Bajarapacuenia

pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae. ¹⁵ Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuene paneexanavanapaejava. Nexata bajarapamonae itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayajamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Pëtsa panesivajamatabëjumaitsimë: “Maponë patajopaje piajibiayaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiayaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba

bajarapalivaisitabeje. 18 Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitanetoyo ata, Dioso apo itothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najume-capanepeaeya jumaitsi bajarapalivaisitabeje.

19 Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapaya-juvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. 20 Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi

(Lc 12.57-59)

21 Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Paxamë rabaja payapétaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. **22** Itsiata baitsi jane xanë pacatsipaebatsi mapacueniaje. Pajivi baraanaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatmajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi infierno isotojavabelia.

23 Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene paneexanaejava, nexata mapacuenia paexanaenameje. **24** Altarvënëjava pitabarata abaxë papuenere ofrenda

panerajutsijavanexa Diosojavabelia. Paponare caecuenia pajivijavabelia pananeconitame panenabarajamatatabécuene xanepanaenexabeje icatsia. Bajaraxuacujinae icatsia panaviatsiaremena altarvénéjavajavaberena panerajutsinexa jane baja ofrenda Diosojavabelia.

²⁵ 'Itsa pananeconitame itsajivijavabelia, nexata itsa pacacapona bajarapajivi jueznéjavabelia papecaneconitsinexa, namutua xaniavaetsia panabarécuaijamérebeje panenasivajamatabé xanepanaenexabeje xua yabara picani pacaneconitsjitsia. Bajarapacuenia xaniavaetsia panabarécuaijamérebeje papecanutsiyaniva juezné pitabarata. Tsipaji raja juezné itorobijitsipa policíavi panijaneconi yabara papecacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ²⁶ Xaniajané pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tsipae. Matapania pamamatotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojobinë itsava pejaitsiyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi

jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava njavavecua,” jai.²⁸ Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabëjai, bajaraponë naneconita Diosojavabelia. Nexata najëpaeya naneconitabeje Diosojavabelia ponëbeje pepacuene itsavajavabelia pibisiacuene pevitota exana pijavavecua.

²⁹ ’Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxubinexa bajarapaitaxuto, padaxitaperabëtojivimë Dioso papecaxuabiyaniva infiernojavabelia.
³⁰ Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papecaxuabiyaniva infiernojavabelia, jai Jesús pijajivijavabelia.

*Pacuenia Jesús pijajivi muxujioba penacojobinë
pijava pexuabiyaniva yabara pelivaisi*

(Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae

xuabi pijava,” jai bajayata Dioso Moiséspijinëta penajumecopatsilivaisi. ³² Itsiata baitsi jane xanë mapacuenia pacatsipaebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Petiriva pamona pexuabixaetsi, nacojiobijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniwa jívi pejumexaniataenexatsi yabara pelivaisi

³³ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Panijasalinaivimi penajumetsënëtsiyaniwa, bajayata Moiséspijinë panijasalinaivimijavabelia jumaitsi mapacueniaje: “Itsa baja pepacuene najumecapanepaeya panavajunupaebame xua paexanaejitsiamë, itsamonaе papecajumexaniataenexa itsa pajumaitsimë: ‘Xaniajanë raja. Cajumaitsitsi mapacueniaje Dioso pitabarata,’ itsa pajamë, pëtsa epatua panajamatabëcopatame bajaraxua paexanaenejevamë,” jai bajayata

Moiséspijinë panijasalinaivimijavabelia. ³⁴ Itsiata baitsi jane xanë mapacuenia pacaitorobatsije. Najumecapanepaeya itsa panavajunupaebame xua paexanaejitsiamë, rovialia panavajunupabare. Pëtsa pematatsënëa itsajumeyo ata yajava pajumaitsimë jivi papecajumexaniataenexa. Papecajumexaniataenexa itsajivi pëtsa pajumaitsimë mapacueniaje: “Xaniajanë raja. Cajumaitsitsi mapacueniaje Dioso pitabarata,” pajamë pëtsa. Pëtsa pajumaitsimënu: “Xaniajanë raja. Cajumaitsitsi mapacueniaje athëbënacua pevënëta,” pajamë pëtsa. Tsipaji bajarajotatsia Dioso eca pijatronovënëjavata, itsajota ecabiaba pitorobinexa pijajivi. ³⁵ Pëtsa pajumaitsimënu: “Xaniajanë raja. Cajumaitsitsi mapacueniaje mapairaje pevënëta,” pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevënëta. Tsipaji Jerusaléntomara Dioso pepo nacuaevertsine pijatomara. ³⁶ Pëtsa pajumaitsimënu: “Xaniajanë cajena. Itsa apo xaniajanë tsane, nexata nacaevetsianajë tanematathinaxuabineksamë tatëpaenexa,” pajamë pëtsa. Tsipaji panematabocoto ata Dioso eveta. Nexata paxamë apo pacacaëjëpae caematanatoyo ata panenamatantaniojaiyaexanaenexa, panenamatantanatsaejaiyaexanaenexa ata. ³⁷ Itsa pepacuene paexanaejitsiamë, “Jäjä, exanaenajë,” pajamëre rovialia. Itsa apo pajamatabëexanaemë, “Jume, apo exanaenë tsane,” pajamëre rovialia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta

pajumaitsimë tsipae, jai Jesús pijajivijavabelia.

*Pacuenia Jesús pijajivi muxuioba
pecuenecanaviatsiyaniva itsajivi itsacueniabi
atatsi yabara pelivaisi
(Lc 6.29-30)*

³⁸ Icatsia Jesús jumaitsi petsutoyenepanajavata pijajivi ayaibitsaétoxanetojavabelia:

—Paxamë rabaja payapétaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniae: “Pajivi itsanë itaxutobijianatsi, juya bajarapajivi namatamoitaxutobijanae. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi.

³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabara-pacabiaxuuba anaeya, nexata icatsia itsanenia ata papecaitabarapacataxuabinexa, panaitabara-caevere. ⁴⁰ Itsajivi itsa pacaneconitsijitsia jueznëjavabelia paneamoneyabijamatatabëcuene papecavecuapitsinexa panijacamisa, nexata patocopare panijacamisajumavelia pananaxatatsijava ata papecavecuapitsinexa.

⁴¹ Vajabitsaë itsa pacacaponaeyaexana pijajava anijkilómetrobejecuenia, nexata patocaponare pematasënenä ata. Cuatro pakilómetrobejecuenia ata patocaponare. ⁴² Bitsø bepejiobijivi itsa pacavajëta itsacuenejavayo, parajure. Itsa

pacacovaeta, patsicopare. “Jume,” pajamë pëtsa, jai Jesús pijajivijavabelia.

*Pacuenia Jesús pijajivi muxujioba piasivanexa pitoyavi atatsiyabara pelivaisi
(Lc 6.27-28, 32-36)*

⁴³ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniae: “Pasivamëre papecayapëtaenë bitso. Paitoyamëre papecaitoyavi,” jai bajayata Dioso Moiséspijinëta penajumecopatsilivaisi. ⁴⁴ Itsiata baitsi jane xanë mapacuenia pacaitorobatsije. Pasivamëre papecaitoyavi ata. Pamonae ata pibisiacuenia pacabaracuaicuajai, bajarapamonae paxamë xaniavaetsia pabaracuaicuajjamëre. Pamonae ata pacaitoya, bajarapamonae pexaniacuene patoexanare. Pamonae ata pibisiacuenia pacabijatane, pibisiacuene pacaexanae ata, patovajëre Diosojavabelia peyavenonaenexatsi. ⁴⁵ Bajarapacuenia nexata paneaxa, athëbëtatsia peecaenë, papeximëcuenia patsitajinavanapae-name. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae épapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobieno pejamatabëcuenetia impuestomatamo peyanijobabiabivi bitso

pibisiacuene exana. Itsiata bajarapamonae ata asiva piasivavitsi. ⁴⁷ Xaniavaetsia itsa pacopia pitsipame ëpaneyapëtaevi, nexata pexaniacuene apo paexanaemë tsipae pamonae Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi. ⁴⁸ Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—¡Xania baja tsane! Pëtsa pexaniacuene paexaname saya jivi papecacuenetaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtatsia.

² Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuabiabibonëjava, callejava ata. Bajarapamonae navajunupaebabiaba

bepejiobivi peyavenonaejava, bepexani-
 ajamatabécuenevi saya petaenexatsi jivi.
 Xaniajanë pacuenia pacatsipaebijitsiatsi.
 Pamonae bajarapacuenia navajunupaebabiaba,
 bajarapacuenia penavajunupaebabiabixae,
 Diosojavabelia apo xainae tsane athébétatsia
 perajutsijavanexatsi. ³ Itsa payavenoname
 bepejiobivi, pëtsa panavajunupaebame itsajivi-
 javabelia ata, bitso papecayapétaejivijavabelia
 ata. ⁴ Muetsia payavenonare bepejiobivi.
 Nexata paneaxa, papecataenë muetsia
 paneexanaejava ata, pacarajutsiana bepejiobivi
 muetsia paneyavenonaematamo, jai Jesús
 pijajivijavabelia.

*Pacuenia Jesús pijajivi tsipaeba pacuenia Dioso-
 javabelia vajécaejitsia yabara pelivaisi
 (Lc 11.2-4)*

⁵ Icatsia Jesús jumaitsi petsutoyenepanajavata
 pijajivi ayaubitsaëtoxanetojavabelia:

—Itsа pavajécame Diosojavabelia, pëtsa
 pavajécame pacuenia itsamonaе vajécabiaba.
 Bajarapamonae saya jema vajécabiaba
 Diosojavabelia jivi petaenexatsi Dioso bepejume-
 covénëtsivi. Bajarapamonae jitsipabiaba nucaeya
 pevajétsinexa Diosojavabelia daxitajivi pitabarata
 judíovi penacaetuabiabibonëjava, calle
 penaepacaxitajarabijava ata. Bajarapacuenia
 vajécabiaba Diosojavabelia Dioso bepejume-
 covénëtsivi petaenexatsi jivi. Xaniajanë pacuenia
 pacatsipaebijitsiatsi. Pamonae bajarapacuenia
 exanabiaba, bajarapacuenia pexanaexae,
 Diosojavabelia apo xainae tsane athébétatsia

perajutsijavanexatsi. ⁶ Nexata paxamë Diosojavabelia itsa pavajëcame, pacauenëmë canacujitsia, pajonemeya panijaboyalia. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

⁷ Itsa pavajëcame Diosojavabelia, pëtsa napëna pavajëcame saya piapijanexa panevajëcaejava pacuenia Dioso apo peyapëtaevi vajëcabiaba. Dioso apo peyapëtaevi jamatabëcuenenavëxaniabiaya jamatabëjumai tsabiabi: “Itsa bitso apia vajavajëcaejava Diosojavabelia, nexata matapania Dioso nacajumetaena vajavajëcaejava,” jamatabëjai tsabiabi Dioso apo peyapëtaevi. ⁸ Pëtsa bajarapacuenia paxamë pajamatabëcueneitsimë. Panevajëcaevajënaeya ata raja paneaxa, Dioso, yapëtane xua panamatavenoname. ⁹ Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayaiyataejava daxitajivi. ¹⁰ Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ¹¹ Ajena, pamatacabinexa, panerajure pataxaejavexa pacuenia panamatavenonajë.

12 Panevecuaajibiaexanare pibisiacuene pataexanaeconimi. Pacuenia paxanë pajamatabëcuenecaevajë, pabarajamatabëcuenexanepananua, itsamonaе paxanëjavaberena pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuene xanepanarenua.

13 Panevecuatsare dovathi patanejamatabëcueneëjëbiyaniva. Panecapanepare jane pibisiacuenevecua. Pamatacabí xamë taxuxuabianame daxita nijajivi nevetsi-java mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayajamatabëcuenenë,” jai tsane. Bajarapacuenia nijajivi evetsianame daxitamatocabijavabelianexa, pajamë tsane mapacueniaje itsa pavajëcame Diosojavabelia,

jai Jesús pijajivijavabelia.

14 Jesús icatsia jumaitsi pijajivijavabelia:

—Nexata paxamë itsamonaе pibisiacuene pacaexanae ata, pajamatabëcuenecaevare. Pabarajamatabëcuenexanepanarenua. Nexata paxamë itsamonaе pibisiacuene papecexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenanua.

15 Paxamë itsa apo pajamatabëcuenecaevimë tsane

itsamonae pibisiacuene papecexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanaenua tsane, pitabarata pibisiacuene paneexanaejava, jai Jesús pijajivijavabelia.

*Pacuenia Jesús pijajivi tsipaeba pacuenia
Jesús pijajivi exanaejitsia pamatacabibeje
Diosojavabelia vajëtapona pexaejava xaenejeva
yabara pelvaisi*

¹⁶ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaejje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata

bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovénëtsivi, bajarapacuenia vajécabiaba. ¹⁷ Paxamë itsa apo paxaemë panexaejava pamatacabibeje pavajécame Diosojavabelia, itsiata panaitabaraquiare. Panamatatiarenua xaniavaetsia. ¹⁸ Bajarapacuenia paexanaename jivi peyapétayaniva Diosojavabelia panevajécaponaejava panexaejava paxaenejевамë. Caenë paneaxa, papecayajavanë, yapétaena. Nexata bajaraponë itsamatocabi pacarajutsiana panijamatamo, jai Jesús pijajivijavabelia.

*Pacuenia Jesús pijajivi tsipaeba xaniavaetsia
Dioso petonacuenebavanapaenexa itsamatocabi
ayaijava pexainaenexa athëbëtatsiayabara pelivaisi
(Lc 12.33-34)*

¹⁹ Icatsia Jesús jumaitsi petsutoyenepanajavata pijajivi ayaubitsaétoxanetojavabelia:

—Pëtsa pacaetuapona ayaijava panexainaevanexa mapanacuataje. Tsipaji pacatobijanaejitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi. ²⁰ Dioso jane xaniavaetsia patonacuenebavanapare. Nexata Diosojavabelia ayaijava pexaniacuene paxainaename athëbëtatsia. Nexata bajarajotatsia apo pacatobijanae tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. ²¹ Panacuatatsia pacatoxaniavaeta panexainaevanexa, bajarapanacua panejamatabëéthëtovetsina

pajamatabënajinavanapaename, jai Jesús
pijajivijavabelia.

Pacuenia vajaitaxuto belámparabë yabara pelivaisi

(Lc 11.34-36)

22-23 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxuioba bitso pejitsipaeyaniva palata yabara pelivaisi

(Lc 16.13)

24 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxannëbejejavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso

jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

*Pacuenia Dioso pijajivi eveta mapanacuataje yabara pelivaisi
(Lc 12.22-31)*

²⁵ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavexa. Apo jinavanapaetsinua ëvajanaperabëxabinexa. ²⁶ Pataema baratsuimonae pepunaevi. Apo ubi pexaejavexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavexa. ¡Paxamë rabiji bitsyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavexa. ²⁷ ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ ’Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjëre pacuenia vitsabapona pematono vayafojava. Bajarapamatono apo natsijumanacuenebi.

Penaxatatsijavanexa ata apo natsijumaexanae.

²⁹ Bajayata nacuaevetsinëmi Salomónpijinë, bitso pexainaenëmi. Naitabétsiaya naxatababiaba bitso pexaniaviriajavanë. Itsiata baitsi jane Salomónpijinë penaitabétsjava matatoxenetsia bitso aitabë mapamatonotoxije. ³⁰ Paxamë bevelia panejumecovënëtsivi Dioso, asaëya bepjumecovënëtame Dioso papecaevetsi-java. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata Dioso pacaxatabiana piaitabëjava itsa pajumecovënëtame Dioso.

³¹ Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa.

³² Pamonae Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpenaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname. ³³ Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabiabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravia

pitsijavata pacatocopiapatsijitsia. Tsipaji xua caematacabí canacujitsia nacatocopiapatabiaba vajajamatatabécuenebøjainexa, ayaijava baja tsabiabi. Bajaraxuata ajena pitsijavata apo besivajamatatabécuenebøjaitsi xua meravia pitsijavata nacatocopiapatsijitsia, jai Jesús pijajivijavabelia.

7

*Pacuenia Jesús pijajivi muxujioba pitaxutotsoni-ataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi
(Lc 6.37-38, 41-42)*

¹ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Pëtsa panataneme pepacuene bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuajamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi itsa paxainame, Dioso bitso ayaicuenia pacananeconitsiaexanaejitsipa.

² Itsamonae pexanaejava xaniavaetsia payapëtaenejevamë, pëtsa pabaracuaicuajamë mapacueniaje: “Bajarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene itsa paexaname, itsamonae pijinia bajarapacuenia pacabaracuaicuajai tsipae. ³ Bajaraxuata paxamë pepacuene bepaneaneconijibivi nataeya pëtsa pamuxujiobame itsajivi pijaneconi

yabara. Tsipaji raja apo payapëtaemë paxamë ata pijinia paneconivajëto paxainame. ⁴ Nexata paxamë ata ayaineconixaneto itsa paxainame, nexata itsajivijavabelia apo bepjumaitsimë: “Papibisiacuene exaname, copare baja,” apo bepjamat. ⁵ Yamaxëitojorobiaya saya bepexaniajamatabëcuenevi nataeya pacuaicuajamë tsabiabi. Itsamonaе pijaneconi yabara pabaracuaicuajamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonaе ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Pëtsa matavëjëa patsipaebaponame Dioso pe-jumelivaisi, pamonaе patsipaebi atamë, apo yaiyatae bajarapalivaisi. Tsipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonaе apo yaiyatae Dioso pe-jumelivaisi, patsipaebi atamë. Pacuenia marrano ata itsa rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonaе, jai Jesús pijajivijavabelia.

*Pacuenia Jesús pijajivi tsipaeba pacuenia Diosojavabelia vajëtaponaejitsia yabara pelivaisi
(Lc 11.9-13; 6.31)*

7 Icatsia Jesú斯 jumaitsi petsutoyenepanajavata pijajivi ayaubitsaëtoxanetojavabelia:

—Pavajëtaponare Diosojavabelia bajayajebi ata pacuenia bajayajebi ata pajitsipame panecaxitajarabinexa itsa pacatonaxuaba itsacuenejavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta. **8** Bajarapacuenia asaëyata pavajëtaponare Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

9 'Paxamë papebijivimë panexi panexainaevi. Panexënatonëyo itsa pacavajëta panbë, apo panacoxirajutsimë tsipae iboto. **10** Itsa pacavajëta dujuainëyo, apo panacoxirajutsimë tsipae jomo. **11** Paxamë paneajamatatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame.

12 'Xua pexaniacuene, paxamë pajitsipame itsamonaes papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatatabëcuene jëpa Dioso Moiséspijinëta penajumecopatsilivaisi. Diosojumepaebivimi profetavi peyaguinaelivaisianë ata jëpa bajarapajamatatabëcuene, jai Jesú斯 pijajivijavabelia.

*Tsiquiribaupayo epatajërëtsialia yabara pelivaisi
(Lc 13.24)*

¹³ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Pajonemeya tsiquiribaupayojavalia panepatsinexa Dioso pijanacuayabelia. Tsipaji pinijibaupa, pinijinamutonua, pata infiernojavabelia. Nexata jivi ayaubitsaëtoxanetonë bajaraxuayo jonepona. ¹⁴ Pabaupa tsiquiribaupayo, tsiquirinamutoyonua, bajarapanamuto pata matacabí apo pevereverecaejava pexainaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

*Pacuenia peubinaënë itsa nacuaita, nayapëtane pavirianaecuene yabara pelivaisi
(Lc 6.43-44)*

¹⁵ Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Xania panayajivitaema. Pamonaë saicayacuenia Dioso pejumelivaisivecua jivi tsipaebapona, bajarapamonae najumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi patsipaebaponajë,” pacajai tsabiabi. Bajarapamonae Dioso pejumecovënëtsivi cuenecataeya najonena paxamëjavaberena. Itsiata baitsi jane pacuenia nevëthë pianaepanaevi jamatabëcueneitsi, bajara jamatabëcueneitsi. Jamatabëpacacopatsiaexana Dioso panejumecovënëtsijavami. ¹⁶ Vaxaitsi rabaja yapëtanetsi mapacueneje. Peubinaenë itsa nacuaita, yapëtanetsi ponacuui xanepana

vajaxaenexa. Nexata bajaraponae cuaixanetsi. Ponae pijinia pibisiacuai nacuaita, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaënë itsa nacuaita, nayapëtane ponaecuai xanepana vajacuaixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuenetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponae pexaniana, pexaniacuai pijinia nacuaita vajaxaenexa. Ponae pijinia pibisiana, ëpiabejecuai nacuaita. ¹⁸ Pexaniana pexaniacuai nacuaita. Apo nacuaiti piabejecuai. Pibisiana pijinia apo nacuaiti pexaniacuai. ¹⁹ Daxita ponaenë nacuaita pibisiacuai, apo vajaxaecuai, yapëtanetsi. Nexata daxita bajaraponaenëmi nicatatsi. Nexata tajuitatsi isotota. ²⁰ Bajara pijinia pacuenia paxamë ata payapëtaename itsa pacuenetaename xua exanavanapa pamonae saicayacuenia Dioso pejumelivaisivecua jivi tsipaebapona, jai Jesús pijajivijavabelia.

*Pacuenia daxitajivi apo jone tsane Dioso pijanacuayabetsia yabara pelivaisi
(Lc 13.25-27)*

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Daxita pamona: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata

pamonae exanavanapa taxa, athëbëtsia peecaenë, pejitsipaecuenia, ëbajarapamonae jonena taxa pijanacuayabetsia. ²² Pamatacabí copiapatsiana pijaneconi pexainaevi Dioso penaneconitsiaexanaematacabinexa, bajarapamatocabí jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jiviveua pacapitsapaponajë. Nevënëtanua pinijicuene pataexanaejavanë, Dioso pesäëta paexanaponajë,” nejai tsane jivi ayaibitsaëtoxanetonë. ²³ Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaejavabelia, jai Jesús pijajivijavabelia.

*Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi
(Mr 1.22; Lc 6.47-49)*

²⁴ Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanet-sijitsia pebubutsijavanexa, nexata baja bajara-jota apo exanetsi pijabo. Nexata pijabo exaneta bitso piatajairata. Nexata bajaraponë

bo pexanaejava apo nacueratsi. ²⁵ Bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Itsata pijabo apo toxuabitsitsia. Tsipaji pijabo exaneta pitatajairata. ²⁶ Pajivi nejumetae ata patacatsipaebilivaisi, apo nejumecovënëtsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. ²⁷ Tsipaji bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabëcuenenabenajaca. ²⁹ Jesús pejumetaevitsi bitso jamatabëcuenenabenajaca tsipaji Jesús livaisi tsipaeba pinijijamatabëcuene pexainaenëcuenia. Apo tsipaebi pacuenia judíovi pecujarubivi tsipaebabiaba.

8

*Pacuenia Jesús jamatejemayaexana bajayajebi
bitso peperabëtsabanaenëyabara pelivaisi
(Mr 1.40-45; Lc 5.12-16)*

¹ Itsa baja Jesús runaica petsutojumavetsica, jivi ayaibitsaëtoxaneto pënaponatsi. ² Nexata imoxoyotatsi bajayajebi bitso peperabëtsabanaenë. Pitabarata pematabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaëjépa raja tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai bitso peperabëtsabanaenë.

³ Nexata Jesús pecobeta perabëjayalia bitso peperabëtsabanaenë. Jesús jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús bajayajebi bitso peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca.

⁴ Nexata icatsia Jesús jumaitsi bajaraponëjavabelia:

—Nejumetaema. Pëtsa tsipaebame itsajivijavabelia ata tacajamatejemayaexanaejava. Naitajëtsiaremelia jane sacerdotenëjavabelia, templobota penacuenebinëjavabelia. Nexata jivi yapëtaena pepacuene baja pecavecuaajibijava niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacitoroba. Nexata sacerdotenë cataena pecavecuaajibijava baja niavitanejavami, jai Jesús bajaraponëjavabelia.

Pacuenia vajabitsaë pijacapitán pijabota

*petonacuenebaponaponaenëtsi, Jesùs tojamatejemayaexana yabara pelivaisi
(Lc 7.1-10)*

⁵ Itsa baja Jesùs pata Capernaum tomarabelia, Romano nacuapijivajabitsaëvi pijacapitán Jesùs imoxoyorenatsi pevajëtsinexatsi. ⁶ Vajabitsaëvi pijacapitán bitso ayaicuenia vajëta Jesùsjavelia. Jumaitsi:

—Petuxanenë, tajajivitonë raja tajabota camata boboca. Bitsó cuenabatsi. Pinijicuenia navixetaeyabiaba, jai.

⁷ Nexata Jesùs jumaitsi capitánjavabelia:

—Xanë ponaenajë nijaboyabelia. Nexata catojamatejemayaexanaenatsi nijajivitonë, jai Jesùs.

⁸ Nexata capitán jumaitsi Jesùsjavelia:

—Petuxanenë, xanë raja bitsó beveliajamatabécuenenënë xamëvecua. Nexata apo xanepanae tsipae nejonejava tajaboyabelia. Nexata saya maveliaje ènijume itorobare. Nexata tajajivitonë netojamatejema tsane. ⁹ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaëvi tajajivi taitorobicuenia tanetoexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa xanëjavaberena, bajaraponë patabiabarena. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa cacäejëpa. Nexata saya maveliaje ènijume itorobare saya ènijumeta

tajajivitonë tanetojamatejemayaexanaenexamë, jai capitán Jesúsjavabelia.

10 Jesús itsa jumetane bajarapacuenia capitán pejumaitsijavatsi, nexata Jesús jamatabëcuenenabenajaca. Nexata Jesús jumaitsi pepénaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitarabaxuabinë xanëjavaberena bitso tanesivanajamatatabëcuenecopatsinë pacuenia mapacapitán nesivajamatatabëcuenecopatsiaya jumait-sije. **11** Nexata pacatsipaebatsi paneyapëtaenexa. Apo judíovi ata raja, ayaibitsaëtoxanetonë daxitanacuanépijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinë yajava, nabaniана. Isaacpijinë ata, Jacobpijinë ata yajava, nabaniана. **12** Itsiata baitsi jane judíovi, pamonae picani Dioso athëbëtatsia toxaniavaetatsi peyajavajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infiernojavabelia Dioso xuabianatsi. Bajarajota nuna. Navonosiniana bitso penavixaetaexae, jai Jesús mapacueniaje pepénaponaevitsijavabelia.

13 Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivanajamatatabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

*Pacuenia Simón Pedro pijava pena Jesús tojamatejemayaexana yabara pelivaisi
(Mr 1.29-31; Lc 4.38-39)*

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. ¹⁵ Nexata Jesús cobejayata peromaebanucaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesúsbana pexaejava bajarapova toexanatsi.

*Pacuenia ayaubitsaëto jivi, piavitanevi, Jesús jamatejemayaexana yabara pelivaisi
(Mr 1.32-34; Lc 4.40-41)*

¹⁶ Itsa baja ajena meravitsia, Jesúsjavaberena tocapatatsi ayaubitsaëto dovathi peyajavajinavanapaevi. Caejumeta saya Jesús caecuenia dovathi vecuacapitsapa bajarapamona. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaíspijinë tajëvelia vajunupaëba. Profeta Isaíspijinë bajayata tajëvelia jumaitsi mapacueniaje: “Bajaraponë nacavecuaajibiaexanaena vajaavitanejavami,” jai bajayata tajëvelia Isaíspijinë Jesús yabara.

*Pacuenia picani Jesús jamatabëpënaponatsi itsamonaeyabara pelivaisi
(Lc 9.57-62)*

¹⁸ Nexata Jesús itsa tane jivi ayaubitsaëto pematatoyoronaejavatsi, pijajivi junata pepënapuxuabinexatsi pucaxaneto itsapanabelia.

19 Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capénaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijaméthëanë xaina pepatabiabinexa pemajitabiabinexa. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubinëjavabelia.

20 Nexata Jesús jumaitsi judíovi pecujarubinëjavabelia:

—Itsa nepénaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijaméthëanë xaina pepatabiabinexa pemajitabiabinexa. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubinëjavabelia.

21 Nexata Jesús pijajiviyajuvënënë jumaitsi Jesúsjavabelia:

—Tajatuxanenë, caeepatoyo abaxë necopare taméthëtsinexa taxa petëpaenë, jai.

22 Jesús nexata jumaitsi pijajivitonëjavabelia:

—Naxanitsia. Nepénaponare. Copare matacabi apo pevereverecaejava apo pexainaevinexa peméthëcaenexatsi nijamonaemi itsa tëpa, jai Jesús pijajivitonëjavabelia.

Pacuenia Jesús itaveta joviboxaneto, malataca yajava, piayajavami yabara pelivaisi

(Mr 4.35-41; Lc 8.22-25)

23 Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. **24** Nexata jemata pinijijoviboxaneto na-jetaruca. Malatacaxanetonë bitso ayai. Nexata malataca jera ënëaberena mera epabajarabapona.

Itsiata Jesús jamatejema majitanuca. **25** Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

26 Nexata Jesús jumaitsi pijajivijavelia:

—¿Detsa xuajitsia bitso pajunavame? ¿Tsipaji apo payapétaemë Dioso papecaevertsijava? jai Jesús pijajivijavelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba.

27 Nexata Jesús pijajivi itsa tane bajaraxua, jamatabécuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyajavaponaponaenëbeje, Jesús vecuacapitsapa Gerasa nacuata yabara pelvaisi

(Mr 5.1-20; Lc 8.26-39)

28 Jesús pijajivi barëpata pucaxaneto itsapanabelia, Gerasa nacuayabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava.

29 Nexata dovathivi peyajavaponaponaenëbeje vavajaibeje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaematacab-inexavajënaeya patame patanenaneneconitsiae-xanaenexamëbeje? jaibeje Jesúsjavabelia dovathivi peyajavaponaponaenëbeje.

30 Nexata bajarajota, imoxoyo petsutojavata, marranobitsaëtoxaneto xaevanapa. **31** Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëtoxanetojavabelia, jai.

32 Nexata Jesús jumaitsi dovathivijavabelia:

—Paponare baja panejonenexa marranobitsaëtoxanetojavabelia, jai.

Nexata bajaraponëbeje dovathivi vecuapitsapsatsibeje. Nexata baja marranobitsaëtoxanetojavabelia junua dovathivi. Nexata daxita bajara pamarranobitsaëtoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

33 Bajara pamarranobitsaëtoxanetomi pevetavanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapitsapa dovathivi peyajavaponaponaenëbeje. **34** Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajétatsi. Ponare
baja patajanacuavecua, jai bajarapamonae
Jesúsjavabelia tsipaji cujunavatsi.

9

*Pacuenia Jesús jamatejemayaexana petabusipacuenabinétsi yabara pelivaisi
(Mr 2.1-12; Lc 5.17-26)*

¹ Jesús runareca jera ënëabereca. Nicabalia puca itsapanabelia. Pata nexata pijatomarabelia. ² Bajarajota Jesús tocapatatsi petabusipacuenabinétsi. Pacamayota bocabiaba, yavëtacarapatatsi. Jesús jamatabëcuneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi cajena,” pesivajamatabëjajavatsi Jesús jamatabëcuneyapëtane. Bajaraxuata petabusipacuenebinétsijavabelia Jesús jumaitsi mapacueniaje:

—Tajabananë, jamatabëcuenebarëyamëre. Pibisiacuene rabaja nexanaeneconimi cavecuajibiaexanatsi, jai Jesús petabusipacuenabinétsijavabelia.

³ Nexata judíovi pecujarubivi itsa jumetaeyena bajarapacuenia Jesús pejumaitsijava, najamatabëxainena.

—Maponë Jesúsje Dioso apo pejitsipaecuenia cuaicuajai, jamatabëjai tsenae judíovi pecujarubivi Jesús yabara.

⁴ Jesús jamatabëcuneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene. ⁵ Paxamë apo pacacaëjëpae ata itsajivi pibisiacuene pexanaeneconi panevecuaajibiaexanaenexa, pacacaëjëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaecuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuénabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. ⁸ Nexata jivi itsa tane bajaraxua, junava cajena bitso. Nexata bajarapamona jumaitsi Diosojavabelia:

—Diosomë, bitso ayajamatabëcuenenëmë. Tsipaji jivi caëjëpaeyaexaname pinijicuene pexanaenexa, jai.

Pacuenia Jesús pijajivitonënexa junata Mateo yabara pelivaisi

(*Mr 2.13-17; Lc 5.27-32*)

⁹ Jesús baja vecuapona itsajota jamatejemayaexana petabusipacuenabinëtsi. Nexata Jesús penajetarucaejavata taeyeta Mateo. Mateo gobierno pejamatabëcuene impuestomatamo pemata moyani jobabiabinë. Pabota jivijavabelia Mateo impuestomatamo matamoyani jobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepénaponare, jai.

Jejai Mateo. Nexata nonotapuna. Mateo baja napona Jesús pepëta.

¹⁰ Nexata Mateo junata Jesús pebarënabaninexa pijabota. Nexata Mateo pijabota Jesús pexaejava naxane. Mateo pijabota naena ayaubitsaëto gobierno pejamatabëcuene jivijavabelia impuestomatamo petomatamoyani jobivi. Itsamona eata nanabane, piajamatabëcuenebejevi. Jesús pijajivi nayajavaeca bajarapamesajavata. ¹¹ Nexata fariseovi itsa tane bajarapacuene,

jamatabëcuenenavëxaniabiaya jumaitsi Jesùs
pijajivijavabelia:

—Papecacujarubinë rabaja Jesùs
naneconita Diosojavabelia. Tsipaji gobierno
pejamatabëcueneta impuestomatamo
pemata moyanijobabiabivijavata, piaja-
matabëcuenebejevijavatanua, naxaeyeca pexaejava,
jai fariseovi Jesùs pijajivijavabelia.

¹² Jesùs nexata jumetaeyeca bajarapacuenia
fariseovi pejumaitsijava. Nexata Jesùs jumaitsi
fariseovijavabelia:

—Pevaëbinë raja apo vaëbi pejamatabëjemavi.
Pevaëbinë raja piavitanevi vaëba. Bajara pijinia
xanë ata itsinë. Sivapatajopajë tajunatsinexa
pibisiajamatabëcuenevi pecapanepaenexatsi
Diosojavabelia. ¹³ Paponare. Palebianame Dioso
pejumelivaisibaxuto. Nexata payapëtaename
pajamatabëcuene yabara jumaitsi Dioso
pejumelivaisibaxutota mapacueniae: “Jitsipajë
paneitaxutotsoniataejava itsamona. Apo
jitsipaenë saya patanetobeyabiabijavamë
dajubicuene ofrendacuenia patanerajutabi-
abinexamë,” jai Dioso pejumelivaisibaxutota.
Xanë raja apo sivapatajopaenë tajunatsinexa
pamonae baja aneconijibi tsavanapae.
Biji rajane sivapatajopajë tajunatsinexa
pijaneconi pexainaevi. Junataponajë
bajarapamonae pecopabinexa pibisiacuene
pexanaejava penajamatabëcuenepënëyorotsinexa
Diosojavabelia, jai Jesùs fariseovijavabelia.

*Pacuenia Jesùs yanijobatsi pamatacabibeje
jivi vajëtaponá Diosojavabelia pexaejava apo*

*pexaeeyabiabixae yabara pelivaisi
(Mr 2.18-22; Lc 5.33-39)*

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniae:

—Petuxanenë, paxanë pataxaejava apo paxaeyabiabinë pamatacabibeje pavajëtaponajë Diosojavabelia. Bajara pijinia itsi fariseovi ata pamatacabibeje vajëtapona Diosojavabelia. Pexaejava apo xaeyabiabi. ¿Detsa xuajitsia xamë nijajivi pamatacabibeje vajëtapona Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsimaxëpatsipatsi pevecuacponaenexatsi itsajavabelia, nexata bajara-pamonae pexaejava apo xae tsipae. Tsipaji bitso najamatabëxainaejtsipa pevecuacponaexaetsi. Bajara pijinia itsi tajajivi ata. Tayajavaponaponaeeprato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús Juan pijajivijavabelia.

¹⁶ Nexata Juan pijajivi perujujamatatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa épejanalivaisi, Jesús petsipaebilivaisi. Juan pijajivi anijajamatatabëcuenebeje pexainaeyaniva, perujujamatatabëcuene

baja pecopabinexa, Jesús livaisi tsipaeba comparacióncuenia. Perujujamatabécuene yabara Jesús jumaitsi Juan pijajivijavabelia mapacueniae:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiese-tojavabelia, nexata pejanapana yanarobotsipa perujuesetojavaverena. Nexata biji bitsopinijivo-joto titinaejitsipa.¹⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tcipaji perujubocodoruanë apo yanayeretsi tsipae. Tcipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bajarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabécuene baja pecopabinexa.

*Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënativayo, petëpaevayomi, yabara pelivaisi
(Mr 5.21-43; Lc 8.40-56)*

¹⁸ Jesús livaisi petsipaebanucaejavata Juan pijajivijavabelia, judíovi penacaetuatabiabibo

pevetsinë parena Jesúsjavaberena. Nexata bajaraponë Jesús pitabarata yaiyataeya pematabacabëta nucajunua. Jumaitsi Jesúsjavabelia:

—Taxënativoyo rabaja aeconoxae netotëpa. Itsita baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

¹⁹ Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona. ²⁰ Nexata Jesús namutua penajetarucaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaibeje xaina. Nexata bajarapova Jesús pepënëvelia ponataba, jivibitsaëtoxaneto tuatuajëjavalia. Nexata bajarapova tojayataba Jesús penaxatatsijavacopia. ²¹ Bajarapacuenia tojayataba Jesús penaxatatsijavacopia tsipaji bajarapova jamatabëjumaitsi mapacueniae:

—Itsа tojayatabianajë Jesús penaxatatsijavacopia, nexata tavitanejavami nevecuaajibi tsane, jamatabëjai bajarapova.

²² Nexata Jesús napënëyorotaxuaba. Taenuta bajarapova. Nexata Jesús jumaitsi bajarapovajavelia:

—Jamatabëcuenebarëyamëre. Xamë nesivajamatabëjumaitsimë: “Itsа tojayatabianajë Jesús penaxatatsijava, nexata tavitanejavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavelia.

Bajarapacuenia Jesús pejumaitisijavata bajarapova jamatejema baja. ²³ Bajaraxuacujinae

Jesús Jane baja pata judíovi penacaetuabibbo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pematanueyabavanapaejava petëpaevayo.

24 Nexata Jesús jumaitsi bajarapamonaejavabelia:

—Papitsapare mapabovetua je. Pejanava raja apo tēpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jume-capocaponatsi bajarapacuenia pejumaitisjava.

25 Jesús nexata bajarapamonae bovecua pitsapaeyaexana. Nexata itsaxuayolia petëpaevayo boca, Jesús joneya. Cobepita petëpaevayo. Bajarapovayo baja namatacota.

26 Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsécënaenëmibeje yabara pelivaisi

27 Itsa baja Jesús pona judíovi penacaetuabibbo pevetsinë pijabovetua, anijanëbeje bitso pitaxutotsécënaenëbeje Jesús pënaponatsi. Bajaraponëbeje vavajaiya jumai tsaponaebelai: Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaibeje tsaponaes Jesúsjavabelia.

28 Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapétanemebeje tsaja tanecaëjépaecuene pat-acaitaxutoxanepanaeya exanaejavanexabeje? jai Jesús bitso pitaxutotsécënaenëbejejavabelia.

Nexata bitso pitaxutotsécënaenëbeje jumaitsibeje Jesúsjavabelia:

—Jájã, payapétanjibeje cajena, jaibeje.

²⁹ Nexata Jesús itaxutojayata bitso pitaxutotsécënaenëbeje. Jesús jumaitsi bitso pitaxutotsécënaenëbejejavabelia:

—Pacuenia baja xanëjavaberena nesivanajamatabëcuene copatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsécënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamona/javabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovectua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaobiaexana apo pecuaicuajainëmiyabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsécënaenëmibeje, nexata icatsia itsamonaे Jesús tocaparenatsi apo pecuaicuajainë. Bajaraponë dovathi peyajavaponaponaenë.
³³ Nexata apo pecuaicuajainë Jesús dovathi itsa

vecuacapitsapa, cuaicuajai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamona:

—Caeto ata cajena Israel nacuata itsajivi ata apo tae mapitsicueneje, najai bajarapamona.

34 Itsiata baitsi jane fariseovi jamatabëcuenenavëxaniabiaya jumaitsi Jesús yabara:

—Mara ponëje dovathi jivivecua capitsapabibaba dovathivi pepo penamatacaitorobinë pesaëta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

35 Jesús najetaruca daxita tomaranëjava, tsiquiritomaraxijava ata. Nexata bajarapatomaranëjava judíovi penacaetuatabiabibonëjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexainaevimi. **36** Jesús jivi itsa tane, itaxutobejiobiatanane. Tsipaji jivi bitso baja cajena cuerana. Apo caëjëpaetsinua jivi penatoexanaenexa itsacuenejavayo ata. Jesús jivi sivajamatabëjumaitsi mapacueniae:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

37 Nexata Jesús jumaitsi pijajivijavelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa.

Abaxë sajina ayaibitsaëtoxaneto. Itsiata baitsi jane Dioso panetonacuenebivi pacaejiviyomëbeje saya.
 38 Bajaraxuata Diosojavabelia pavajëcabiabare icatsia itsamonaes Dioso pijajivi pitorobinexa papecayavenonaenexa, jai Jesús pijajivijavabelia.

10

*Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi
 (Mr 3.13-19; Lc 6.12-16)*

¹ Jesús pijajivi ayaibitsaëtoxanetoyajuvënëvi junata saya doce ponëbeje Jesús pebarënacaetuatsinexa. Jesús pijajivi pecaëjëpaejamatabëcuensi ja-matabëcuenecaëjëpaeyaexana dovathi peyajava-jinavanapaevi pevecuacapitsapaponanexa, pejamatejemayaexanaponanexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevénanëje. Itsanë pevénë Simón. Itsavënë bajaraponë Pedro. Itsanë pevénë Andrés, Simón pejuyapijinë. Itsanëbeje pijinia Santiago beje Juanbeje nacaebananëbeje, Zebedeo pexénatobeje.

³ Itsanë pevénë Felipe. Itsanë Bartolomé. Itsanë Tomás. Itsanë Mateo, impuestomatamo gabinero pejamatabëcuene jivijavabelia petomatamoyanijobinëmi. Itsanë pevénë Santiago, Alfeo pexénato. Itsanë pevénë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevénë Judas Iscariote. Bajaraponë bexëajavabelia canajetsijitsiatsi Jesús

pijavajabitsaë pecobeyabelia pebeyaxuabinexatsi.

*Pacuenia Jesús pijajivi itoroba Dioso pitorobili
vaisi jívi petsipaebanajetarubenaenexa yabara pe
livaisi*

(*Mr 6.7-13; Lc 9.1-6*)

⁵ Jesús pijajivi pitorobivajënaeya jumaitsi pijajivavabelia mapacuenaje:

—Pëtsa paponame apo judíovi pijanacuabelia. Pëtsa paponame Samaria nacuata penaetomaranëjavabelia ata. ⁶ Paponare

jane Israel nacuapijivijavabelia. Pacuenia ovejabitsaëtoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecu naxuabavanapa.

⁷ Patsipaebanajetarubenaename bajarapamona imoxoyo baja pevajënae pecopiapatsijavanexa Dioso pijajivi pevetsimatacabinexa.

⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua

bajayajebi bitso peperabëtsabanaevi. Pavecuacapitsapaponaenamenua dovathi

peyajavajinavanapaevi. Amoneya raja pacacaëjëpaeyaexanatsi bajarapacuenia

paneexanaponaenexa. Bajaraxuata amoneya jivi pajamatejemayaexanaponaename. Pëtsa

pamatamoyanijobame panejamatejemaya exanaejamatatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata.
 10 Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pëtsa pacaponame. Pamona/javabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajara-pajivi juya pexaejava barajutatsi.

11 'Itsa papatabiabianame pinijitomarata, tsiquiritomarayojavata ata, bajarajota pajaitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaename, bajarapabovetua papitsapaename. 12 Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: "Diosojavabelia raja pacatovajëtsijitsiatsi xaniavaetsia panejinavanapaenexa," pajamë tsabiabi tsane. 13 Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diosojavabelia peyavenonaenexatsi. 14 Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajarapacuenia

itsa panataxuatsapérëvarëbianame, bajara-patomarapijivi yapétaena Diosojavabelia penaneconitsicuene apo papecacopiapitsixaenae papecanamuxunaevetsinexa panetsipaebilivaisi.

¹⁵ Xaniajanë pacuenia pacatsipaebijitsatsi. Pamatacabí Dioso naneconitsiae xanaena daxita pijaneconi pexainaevi, bajarapamatocabí Dioso ayaicuenia naneconitsiae xanaenatsi patomara-pijivi apo pacacopiapitsi tsane. Paneconivajétota bajayata Dioso naneconitsiae xanaena Sodoma tomarapijivimi, Gomorra tomarapijivimi ata, bajarapaneconivajéto matatoxenetsia itsamatacabí Dioso naneconitsiae xanaena patomarapijivi apo pacacopiapitsi tsane, jai Jesús pijajivijavabelia pitorobivajénaeya.

Pacuenia Jesús pijajivi bejobiaexanaejitsatsi yabara pelivaisi

¹⁶ Icatsia Jesús jumaitsi pijajivijavabelia:

—;Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatuajéata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyanivatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. ¹⁷ Xania baja tsane. Patajajivixaemë raja jivi pacaneconitsiana papecananeconitsiae xanaenexa. Nexata itsajota nacaetuatabiaba tomara pevetsivi, bajarabelia pacacaponaena. Judíovi penacaetuatabiabibonëjava pacajumatitbabeyabiabiana penaneconitsivi pejumaconitabiabimacata.

18 Patajajivixaemë pacanubiananua nacuaevertsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamona/javabelia, apo judíovi ata pitabarata. **19** Itsiata baitsi jane itsa pacanubiana nacuaevertsivi pitabarata, pëtsa pajamatabëbjamë panenayajivicuaicuajainexa bajarapamona/javabelia. Tsipaji raja paepatota panayajivicuaicuajamëjitsia, bajarapaepatota Dioso pejamatabëcueneta pacacuaicuajaiyaexanaena. **20** Itsa panayajivicuaicuajamë tsane, paxamë panijacuata apo pacuaicuajamë tsane. Espíritu Santo raja pacacuaicuajaiyaexanaena.

21 'Itsamonae pematapijivi, pejuyapijivi ata, canajetsiana nacuaevertsivjavabelia pebeyaxuabinexatsi. Itsamonae nacoxicanajetsiana nacuaevertsivjavabelia pebeyaxuabinexatsi. Itsamonae canajetsiana paxa, pena ata, nacuaevertsivjavabelia pebeyaxuabinexatsi. **22** Daxita nacuapijivi pacaitoya tsane patajajivixaemë. Pajivi bejiobiaexanae atatsi tsane, itsiata itsa casaë tsaponapona tsane tanejumecovënëtsjava, bajarapajivi capanepaenatsi Dioso pijanacuayabetsia. **23** Itsa patomarata pacabejiobiaexanaena, bajarapatomaravecua parëcëpecaename itsatomarabelia. Xaniajanë pacuenia pacatsipaebijitsi. Daxita Israel nacuata penaetomaranëjava abaxë patsipaebiveretsinejevamë pexanialivaisi, xanë, Daxitajivi Pematapijinënë, itacarajeta icatsia patsianicajë.

24 'Itsajivi ata apo jamatabëcuenematatoxenetsi pecujarubinëtsi. Itsajivi ata pijinia itsanë itsa pij-

jivitonë, apo jamatabëcuenemataxenetsi pijatuxanenë. ²⁵ Pacuenia pecujarubinë itsamona copiaya bejobiaexanatsi, bajarapacuenia icatsia bajaraponë pecujarubivi ata bejobiaexanaenatsi. Pacuenia petuxanenë copiaya bejobiaexanatsi, bajarapacuenia icatsia pijajivitonë ata cotocaevi bejobiaexanaenatsi. Xanë panijatuxanenënë: “Beelzebú, daxita dovathivi pijatuxanenë,” nejai tsabiabi itsamona. Nexata pijnia patajajivix-aemë bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

*Pacuenia Jesús pijajivi tsipaeba pecujnaviyaniva pebeyaxuabijavatsiybara pelivaisi
(Lc 12.2-7)*

²⁶ Icatsia Jesús jumaitsi pijajivijavabelia:

—Pëtsa pacujunavame jivi, pacaaatiobi ata. Daxita xua jivi muetsia pibisiacuene exana, bexéajavabelia cueneyapétaeponaenatsi daxitajivi.

²⁷ Palivaisianë muetsia vajaepatojavata pacatsipaebaponatsi, bajarapalivaisianë paxamë pinijijumeta patsipaebaponaename jivi penacaetuatabiabijavata. ²⁸ Pëtsa pacujunavame jivibevi ata. Bajarapamonae pacabeyaxuabi ata tsipae, acuenebi matavëjëa papecaitSacueniabinexa pepo panejamatabëcuenejavabelia. Biji rajane pacujunavare Dioso, ponë caëjëpatsi papecaxuabinexa infiernojavabelia papecabeyaxuabicujinae.

²⁹ ’Anijanëbeje baratsuitobeje namatamota saya caepalatanëyo. Itsiata baitsi jane caenë ata baratsuito Dioso pepëya jemata muetsia apo jopae-sica petëpaenë. Tsipaji paneaxa, Dioso, asiva

baratsui ata. ³⁰ Dioso cajena bitso pacaasiva baratsui matatoxenetsia. Nexata panematana-toxi ata, caematanatoyo canacujitsia, Dioso na-mataëjëta. ³¹ Bajaraxuata pëtsa pacujunavame itsacuenejavayo ata. Tsipaji paxamë Dioso bitso pacaasiva baratsuitoxi matatoxenetsia, jai Jesús pijajivijavabelia.

*Pacuenia Jesús pijajivi apo benayavajunuax-ainae Jesús pijajivicuene yabara pelivaisi
(Lc 12.8-9)*

³² Icatsia Jesús jumaitsi pijajivijavabelia:

—Daxita pamonae tajajivi, jivi pitabarata itsa navajunupaebiana tajajivicuene, xanë ata vajunupaebianajë bajarapamonae tajajivicuene taxa, athëbëtatsia peecaenëjavabelia. ³³ Pamonae jumai tsane itsamonaejavabelia: “Xanë cajena Jesús apo pijajivitonënë,” jai tsane, nexata pijinia bajarapamonae yabara xanë jumaitsinë tsane taxa Diosojavabelia: “Mara pamonae apo tajajivije,” janë tsane, jai Jesús pijajivijavabelia.

Pacuenia Jesús apo penajuajumecovënëtsixae, nacaemonae ata apo najamatabëcuenejëpae tsane yabara pelivaisi

(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeya pejinavanapaeyaex-anaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje,

jivi itsa nejumecovënëtsiana, apo naja-matabëcuenejëpae tsane pamonaejavabelia apo nejumecovënëtsi, nacaemonae ata. Napijavajabitsaë tsane namataenetsia. ³⁵ Xanë apo tanenajuajumecovënëtsixaëbeje, pebibeje paxabeje apo najamatabëcuenejëpaebeje tsane. Petirivabeje ata, pexënatoyobeje xanë apo tanenajuajumecovënëtsixaë penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane. ³⁶ Nexata xanë apo tanenajuajumecovënëtsixaë, caejivi canacujitsia bepijavajabitsaëjivi taenatsi pijamonaejivi ata.

³⁷ 'Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane. ³⁸ Pajivi nejumecovënëtsi ata, pecajunavi apo nepénaponae tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejiobiaexanaeyanivatsi, pebeyaxuabiyanivatsinua, bajarapajivi naxuabiana daxitamatocabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatocabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonae xa-

*niavaetsia copiapita Jesúspijajivi yabara pelivaisi
(Mr 9.41)*

⁴⁰ Icatsia Jesúspijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajara pijinia xuavajëto Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacuene matamotsianatsi Dioso, jai Jesúspijajivijavabelia.

11

*Pacuenia Juan jivibautisabinë itoroba
pijajiviyajuvënëvi Jesúsjavabelia yabara pelivaisi
(Lc 7.18-35)*

¹ Jesúspijajivi najumevereta doce ponëbejejavabelia livaisi petsipaebijava. Nexata

baja Jesús pona livaisi petsipaebinexa bajarapanacuata penaetomaranëjava.

² Bajaramatamacabi Juan jivibautisabinë nanconitsiaponapona penaneconitsivi pejebabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaitsi Juan pijajivijavabelia:
 —Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia. ⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeneconimivecuá tsipaebaponajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. ⁶ Pajumaitsimënua

tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatiocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavelia petsipaebijava Juan pelivaisi. Jesús jumaitsi jivijavelia mapacueniae:

—Itsa paponame petusato nacuayabelia, pamatacabí Juan ponapona petusato nacuata, ¿detsa pitsicuene pajamatabënaponaremilia panetaenexa bajarajotalia? ¿Paponaremilia tsaja saya panetaenexa musuli penajéabijava jovibota?

⁸ Itsa apo paponaemëlia panetaenexa musuli penajéabijava jovibota, ¿detsa nexata pitsicuene panetaenexa paponaremilia? ¿Paponaremilia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneje. Pamonae naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava. ⁹ ¿Detsa nexata xua pajamatabënaponaremilia panetaenexa petusato nacuayabelia? Paponaremilia raja panetaenexa Diosojumepaebinë profetanë. Xaniajanë pacuenia pacatsipaebijitsatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan

yabara, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetarucaejavexa yabara.

¹¹ Xaniajanë pacuenia pacatsipaebijitsatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematoxenetsitsi. Itsiata baitsi jane pajivi beveliamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

¹² 'Juan jivibautisabinë petaxuxuabijavaveliacujinae, Dioso pitorobilivaisi jivi petsipaebanajetarucaejava mapamatamacabijavaberena ataje, ayaubitsaëtoxaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsiyanaiva Dioso pitorobilivaisi. ¹³ Juan penaexanaevajënaeya, daxita Diosojumepaebivimi profetavi tajëvelia vajunupaebapona itsamatamacabi Dioso pijajivi pevetsijavanexa. Dioso Moiséspijinëta penajumecopatsilivaisi ata, tajëvelia vajunupaeba Dioso pijajivi pevetsijavanexa. ¹⁴ Itsa baja jamatabëpajumecovënëtame, pajumecovënëre xua aeconoxae pacatsipaebijitsatsi. Dioso pejumelivaisibaxutota tajëvelia jumaitsi

mapacueniaje: “Elíaspijnë icatsia patsiana,” jai. Bajarapacuenia tajévelia itsa jumaitsi, Juan jivibautisabinë yabara jumaitsi. Tsipaji pacuenia jamatabëcueneitsi profeta Elíaspijnë, bajara jamatabëcueneitsi Juan ata. Nexata Juan pepatsivajénaeya, tajévelia yapëtanetsi pacuenia Juan exanaejitsia. ¹⁵ Pajivi jamatabënejumeyapëtane patacatsipaebilivaisi, nemuxunaevetsi xaniavaetsia, jai Jesús jivijavabelia.

¹⁶ Jesús icatsia jumaitsi jivijavabelia:

—¿Detsa meta pacuenia yapëtaeyaxanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: “Bajarapamonae abaxë saya bepejевaxijivixi, pajivixi tomara tuatuajéjava banamuxusitenanapa. Pejевaxijivixi itsa namuxusitenanapa, bavavajai tsenae penajua namuxusitenaejivijavabelia. ¹⁷ Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejевaxi penajua namuxusitenaejivixijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. ¹⁸ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara

jamatabëcuenenavëxaniabiaya pajumaitsimë tsabiabi: “Juan raja dovathi yajavaponapona!” pajamë tsabiabi jamatabëcuenenavëxaniabiaya. **19** Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjäa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjäa apaeyabiabuua piaitajibinexa. Barënjamatatabëcuenejëpanua gobierno pejamatabëcuene impuestomatamo pemamatoyanijobabiabivi. Pamonae ata piajamatabëcuenebejevi, barënjamatatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcuenetra pataexanaejavabeje itsamonaes xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniajajamatabëcuene, jai Jesús mapacueniaje jivijavabelia.

*Pacuenia Jesús jumaitsi patomarapijivijavabelia apo jumecovënëtsitsi yabara pelivaisi
(Lc 10.13-15)*

20 Itsatomaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatomaranëpijivi apo copabi pibisiacuene pexanabiabijava. Apo najamatatabëcuenepënëyorotsi Diosojavabelia. Nexata Jesús ajumesaëya jumaitsi bajara patomaranëpijivijavabelia:

21 ¡Bitso bepajibimë tsane paCorazín tomarapijivimë! ¡Bitso bepajibimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabijava. Apo panajamatatabëcuenepënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatatabëcuenepënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatatabëcuenebëjai tsipae. Nexata Diosojavabelia petsitanajamatatabëcueneitajëtsinexa peyajamatatabëcuenebëjajava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatatabëcuenebëjaixae pibisiacuene pexanabiabineconi. **22** Xaniajanë pacuenia pacatsipaebijitsatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabí Dioso naneconitsiaexanaena daxita pijaneconi pexainaevi, bajarapamatacabí bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapanéconivajëto matatoxenetsia Dioso bitso ayaicuenia pacananeconitsiaexanaena.

23 Paxamë paCapernaum tomarapijivimë, jamatatabécuenenavëxaniabiaya pajamatabéjumaitsimë tsabiabi: “Vaxaitsi cajena ayajamatabécuenevitsi. Nexata Dioso nacacapanepaena athëbëabetsia,” pajamatabéjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infiernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabécuenepënëyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeneconi yabara. Nexata abaxë mapamatocabi ataje jivi jinavanapaejitsipa bajarapatomarata.

24 Xaniajanë pacuenia pacatsipaebijitsatsi. Pamatacabì Dioso naneconitsiaexanaena pijaneconi pexainaevi, ayaicuenia Dioso pacananconitsiaexanaena. Tspaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananconitsiaexanaena, jai Jesús patomarapijivijavabelia apo jumecovënëtsitsi.

*Pacuenia Jesús pijajivi junata pejamatabécueneasaëyaexanaenexa pejamatabécueneuceranaejavavecua yabara pelivaisi
(Lc 10.21-22)*

25 Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamonae bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonae yapëtaeyaexanaename pexaniali-vaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. **26** Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

27 Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë taxa Dioso nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë xanë, pexënatonë, jamatabëcueneyapëtaniji. Pamonae tojitsipajë tayapëtaeyaexanaexa pacuenia taxa Dioso jamatabëcueneitsi, bajarapamonae ata yapëtaeyaexanaponaenajë. **28** Pabita penacuenebababinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacuene paneexanabiabijava yabara, xanëjavaberena paponare paneajamatabëcuenesaënexa

icatsia. ²⁹ Bueyubeje banavësijumacaevetabeje petsivësijumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatatabëcuenebausinexa patacatsijamatatabëcuenebausinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcuenebayapëtaeponaename. Tsipaji xanë xaniavaetsia pacatsipaeabaponaenatsi. Xanë beayaijamatabëcuenenë apo nataenë. Nexata bajarajota panajamatatabëcueneevetsianame paneajamatatabëcuenesaënexa icatsia. ³⁰ Pacuenia bueyu tsivësijumabuatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

12

Pacuenia Jesús pijajivi trigoxu namutua siricanajetarubena penacueraevetsimatacabita yabara pelivaisi

(Mr 2.23-28; Lc 6.1-5)

¹ Judíovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso piajani. Nexata trigoxu siricanajetarubena. Xuxaeyabuatapona.

² Nexata fariseovi tane Jesús pijajivi pesiricanajetarubenaeva trigoxu. Nexata fariseovi jumaitsi Jesúsjavabelia:

—Taema mapamonaeje. Dioso Moiséspijinëta penajumecopatsilivaisi vajanacaitavetsicuene njajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, njajivi apo bexanae mapacueneje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani? ⁴ Davidpijinë joneya Dioso pijatemploboyalia. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyaniva Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. ⁵ ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebababi ata templobota, itsiata apo naneconitsi Diosojavabelia. ⁶ Xanë cajena ayajamatabëcuenenënë. Nexata Dioso netojitsipa jivi taneyaiyataenexa templobo

matatoxenetsia. ⁷ Dioso pejumelivaisibaxutota jumaitsi mapacueniae: “Jitsipajë paneitaxutotsoniataenexa itsamonaë ata. Apo jitsipaenë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso piajanixae, trigoxu xane. ⁸ Nexata xanë, Daxitajivi Pematapijinënë, netoxanepana cajena tatsipaebinexa xua xanepana jivi pexanaenexa penacueraevetsimatacabita ata, jai Jesús mapacueniae fariseovijavabelia trigo pabianëjavata.

*Pacuenia Jesús jamatejemayaexana pebi pecobetsaquenaenë yabara pelivaisi
(Mr 3.1-6; Lc 6.6-11)*

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiabiboyalia. ¹⁰ Nexata bajarajota pebi naeca, pecobetsaquenaenë. Itsamonaë fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara

neconitsijitsiatsi. Nexata fariseovi Jesús jamatabëcueneëjëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane? ¹² ¡Biji ra jivitonë bitsonamatamota oveja matatoxenetsia! Bajaraxata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaitsi pecobetsaqueñaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaejavami baja ajibi. ¹⁴ Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabiabibovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupaebatsi Jesús yabara pelivaisi

¹⁵ Jesús jamatabëcueneyapëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja

Jesús bajarapamona vecuapona itsajavabelia. Jivi ayaibitsaëtoxaneto Jesús pënaponatsi. Jesús nexata jamatejemaexana daxita piavitanevi. ¹⁶ Jesús jumeitaveta bajarapamona petsipaebiyaniva itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemaexanaevi itsa jumeitaveta petsipaebiyaniva itsamonaejavabelia, copiapata jane baja pacuenia bajayata Diioso jumepaebinëmi profeta Isaíaspijnë tajëvelia jumaitsi. Dioso pejumaitisijava Jesús yabara profeta Isaíaspijnë bajayata tajëvelia jumaitsi mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenebarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi. ¹⁹ Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. ²⁰ Pamona xanë tajumelivaisi pejumecovënëtsijava abaxë apo ajamatatabëcuenesaë ata, itsiata bajaraponë bajarapamona apo xuabi tsane. Capanepaena. Pamatacabí tocopiapatsianatsi bajaraponë pijajivi pevetsimatacabinexa, xaniavaetsia bajaraponë evetsiana daxita pijajivi. ²¹ Nexata daxitajivi, apo judíovi ata, sivanajamatabëcuene copatsianatsi bajaraponë pecapanepaenexa,

jai bajayata tajévelia profeta Isaíaspijinë Dioso pejumaitsijava Jesús yabara. Bajarapacuenia bajayata tajévelia jumaitsi Isaíaspijinë peyaquinaebaxutota.

Pacuenia itsamonaे Jesúس yabara jamatabécuenenavëxaniabiaya jumaitsi: “Beelzebú raja pesaëta Jesúс dovathi jivivecua capitsapapona,” jai yabara pelivaisi

(*Mr 3.20-30; Lc 11.14-23; 12.10*)

²² Jesúс tocapatatsi bitso pitaxutotsécënaenë, apo penatsipaebinë. Bajaraponë dovathi yajavaponapona. Bajaraponë Jesúс jamatejemayaexana. Xaniavaetsia baja nexata tane. Natsipaebanua baja. ²³ Jivi itsa tane Jesúс pejamatejemayaexanaejava bajaraponë, jamatabécuenenabenajaca. Nexata jivi najumaitsi Jesúс yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonaе Jesúс yabara.

²⁴ Nexata fariseovi itsa jumetane bajarapacuenia jivi pejumaitsijava, fariseovi jumaitsi jivijavelia:

—Mara ponë Jesúсje, dovathi jivivecua capit-sapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavelia jamatabécuenenavëxaniabiaya Jesúс yabara.

²⁵ Jesúс jamatabécueneyapëtane pacuenia fariseovi sivanajamatabëxainatsi. Nexata Jesúс jumaitsi fariseovijavelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, nammataenetsia naverebiabijitsipa nacaenacuapijivi

ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaënë taejitsipatsitsi pijajivi. Itsajamatatabëcuene vecuaxainaejitsipa pijajivi. Pesaë ata apo xainaponaë tsipae. ²⁷ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabaya panejumaitsijava xanë yabara. ²⁸ Espíritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

²⁹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajara-

pacuenia yacajérëtsipatsi daxita xua xaina pijabota.

³⁰ 'Pajivi apo neyavenonaeyacaetuatsi jivi Diosojavabelia, bajarapajivi betajavabajitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

³¹ 'Bajaraxuata pacatsipaebijitsiatsi, Dioso caëjëpatsi daxitajivi pibisiacuene pexanaeneconimi pevecuaajibiaexanaenexa. Pibisiacuenia jivi Dioso baracuaicuajai ata, bajarapaneneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuenia baracuaicuajai Espíritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneneconi. ³² Pajivi pibisiacuenia nebaracuaicuajai ata, xanë, Daxitajivi Pematapijinënë, bajarapaneneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuenia baracuaicuajai Espíritu Santo, bajarapaneneconi Dioso apo vecuaajibiaexanae tsanetsi. Daxitamatamacabijavabelianexa apo vecuaajibiaexanae tsanetsi bajarapaneneconi, jai Jesús fariseovijavabelia.

Pacuenia peubinaenë itsa nacuaita, nayapëtane pavirianaecuene yabara pelivaisi

(Lc 6.43-45)

³³ Icatsia Jesús jumaitsi fariseovijavabelia: —Pexaniavirianaenë itsa ubatsi, nacuaita pijinia pexaniacuai. Ponae pijinia pibisiana, nacuaita pibisiacuai. Caeviriana canacujitsia yapëtanetsi itsa nacuaita. ³⁴ Bajara pijinia

pacuenia paxamë ata dovathi papijajivimë,
 panayapetàneme paneajamatabëcuenebejejava.
 Nexata apo pacacaëjépae panecuaicuajainexa
 pexaniacuene yabara. Pajamatabëcuene
 bëpënëa panejamatabëéthétota panaja-
 matabëxainame, panecuibovojoituatsina pitsapa
 panecuaicuajainexa. ³⁵ Itsamonaе pijinia
 majamatabëcueneitsije. Pacuenia vajaubinae,
 pexanianaе, pexaniacuai pijinia nacuaita,
 bajara pijinia jamatabëcueneitsi itsamonaе.
 Ponë pexaniajamatabëcuenenë, pexaniacuene
 yabara cuaicuajai. Tsipaji pexaniajamatabëcuene
 xaina pejamatabëéthétota. Ponë pijinia
 pibisiajamatabëcuenenë pibisiacuene yabara
 cuaicuajai. Tsipaji pibisiajamatabëcuene
 najamatabëxaina pejamatabëéthétota.
³⁶ Xaniajanë pacuenia pacatsipaebijitsatsi.
 Pamatacabi Dioso nanëconitsiaexanaena daxita
 pijaneconi pexainaevi, caejivi canacujitsia,
 naneconitsiaexanaponaena caejumeyo
 canacujitsia pibisiacuenia pecuaicuajaijava
 yabara. ³⁷ Pibisiacuenia panecuaicuajaijava
 yabara Dioso pacananeconitsiaexanaena.
 Pexanialivaisi itsa pacuaicuajamë tsabiabi tsane,
 nexata paneconijibimë tsane Diosojavabelia, jai
 Jesús fariseovijavabelia.

*Pacuenia pibisiajamatabëcuenevi Jesús picani
 itorobatsi Dioso pesaëta pinijicuene pexanaejava
 petsitaexanaenexa yabara pelivaisi
 (Mr 8.12; Lc 11.29-32)*

³⁸ Fariseovi, judíovi pecujarubivi ata, jumaitsi
 Jesúsjavabelia:

—Jesús, pajitsipajé patataenexa Dioso pesaëta pinijicuene nexanaejava, patacayapétaenexa pepacuene Dioso athëbëvetsica pecaitorobinëcuenetsica, jai bajarapamonae.

³⁹ Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaëta pinijicuene taexanaejava patacatsitaexanaenexa pataneyapétaenexamë Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinëmi profeta Jonáspijinë exanatsi, bajara épitsicuene taneexanaejava pacatsitajëtsianatsi. ⁴⁰ Bajayata Jonáspijinë boca ayainë dujuainë pënëta acueyabi pamatacabibeje, acueyabi pameravibeje yajava. Bajara pijinia pacuenia xanë ata, Daxitajivi Pematapijinënë, bocaenajë mëthëta acueyabi pamatacabibeje, acueyabi pameravibeje yajava. ⁴¹ Bajayata Nínive tomarapijivimi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Njamatabëcuenepënëyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatocabi Nínive tomarapijivimi nonobapunaena Diosojavabelia papecaneconitsinexa Dioso apo panejumecovënëtsivi. Xanë majotaje ponaponajë,

bitso ayajamatabëcuenenënë Jonáspijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panajamatabëcuene pënëyorotsimënu pibisiacuene paneexanaejavavecua. Bajaraxuata ayaineconi paxainame Diosojavabelia.

⁴² Pamatacabí Dioso naneconitsaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovënëtsivi. Bajarapova pacaneconitsiana. Tskipaji bajayata bajarapovami tajé nacuatabuverena ata muxunarena pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë majotaje ponaponajë, bitso ayajamatabëcuenenënë Salomónpijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panenamuxunaevetsimënu. Bajaraxuata Dioso pacananeconitsaexanaena, jai Jesús tajëvelia fariseovijavabelia, judíovi pecujarubivijavabelia ata.

Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëecaenexatsi icatsia yabara pelivaisi

(Lc 11.24-26)

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatapitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonexa

*Pacuenia Jesús pejuyapijivi, pena yajava,
nubena bojumavelia yabara pelivaisi*

(*Mr 3.31-35; Lc 8.19-21*)

⁴⁶ Jesú abaxé jivi livaisi itsa tsipaeba bo ënétuatuajéalia, pata Jesú pejuyapijivi, pena yajava. Nexata bojumavelia nübena bajarapamona. Jamatabébarécuaicuajaitsi picani Jesú. ⁴⁷ Nexata itsajivi Jesú tsipaebatsi.

—Patajatuxanenë, ena raja, nejuyapijivi yajava, nuca bojumaverena. Bajarapamona pina jitsipa pecabarëcuaicuajaijava, jaitsi Jesús.

⁴⁸ Nexata Jesús jumaitsi petsipaebijivitsijavabelia:

—¿Detsa pitsijamatabëcuenevi taena, tajuyapijivinua? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara Jane pamona taenajivije, tajuyapijivinua. ⁵⁰ Tcipaji raja pajivi exana taxa, athëbëtatsia peecaenë, pitorobicueniatsi, bajarapajivi cajena tajuyapijinë, tajuyapijiva, taenanua, jai Jesús petsipaebijivitsijavabelia.

13

Pacuenia Jesús jivi livaisi tsipaeba pabi peubinë pelivaisicuenia yabara pelivaisi

(*Mr 4.1-9; Lc 8.4-8*)

¹ Jesús baja itsa najumevereta jivijavabelia livaisi petsipaebijava, pitsapa baja bajarapabovetua. Pona baja itsajavabelia. Nexata Jesús ecojopa pucaxaneto itapata. ² Nexata pucaitapata jivi ayaubitsaëtoxaneto Jesús itaxutuanacaetuatatsi. Nexata Jesús runareca jera ènëabereca. Ecarea jera ènëtareca. Daxita jivibitsaëtoxaneto nubena tajetabovelia. ³ Nexata Jesús daxitacuene livaisianë tsipaeba jivijavabelia. Jesús jumai tsaponae bajarapamona ejavabelia mapacueniae:

—Peubinë pona pabiabelia peubinexa.

⁴ Nexata itsa pata pabita, peubixu pexucayajabajarabicuenia ubanajetaruca.

Pexucayajabajarabijavata itsaxu othopa pabi tuatuajéjava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananéjumata, itsajota bitso ira apo aitayaë. Nexata bajarapaxu bepijia juva. Tsipaji bitso ira apo aitayaë. ⁶ Nexata icotia bitso itsa ataju, nexata bajarapaxu juvi ata, tsaquenaponia. Tsipaji irabereca bitso apo atabunepepiareca. ⁷ Itsaxu pijinia othopa xanéebacabomijavata. Nexata peubixu xanéebotonë caecuenia itsa yajavajuva, bitso xanéebotonë matacënénatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsia nacuaita. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae. ⁹ Pajivi jamatabénejumeyapétane patacatsipaebilivaisi, nemamuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuene yabara Jesús jivijavabelia livaisi tispaeba écomparacióncuenia yabara pelivaisi
(Mr 4.10-12; Lc 8.9-10)*

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelia:

—Patajatuxanenë, jivijavabelia livaisi itsa tsipaebame, ¿detsa xuajitsia tsipaebame écomparacióncuenia? jai Jesús pijajivi.

¹¹ Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapétaeyaexana Dioso papijajivimë

papecaevetsijava. Itsiata itsamonaे apo yapëtae bajarapacuene. ¹² Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsiana. ¹³ Bajaraxuata livaisi itsa tsipaebajë bajarapamonae, écomparacióncuenia tsipaebajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. ¹⁴ Bajarapacuenia apo jumeyapëtae tsipaji jane baja tocopiapatatsi pacuenia bajayata tajévelia Diosojumepaebinëmi profeta Isaíaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava. ¹⁵ Bajarapamonae ajamatatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua

taena. Jumeyapëtaejitsipanua palivaisi jumetaena. Pejamatabëëthëtojavavetsina jumeyapëtaejitsipa. Nexata xanëjavaberena najamatabëcuene pënenëyorotsipa perujujamatabëcuenevecua. Nexata xanë jamatabëcuene xanepanaeyaexanaejitsipajë, jai bajayata tajëvelia Isaíspijinë peyaquinaelivaisita xua yabara tsipaebajë bajarapamonae apotanejumeyapëtaejavanexa yabara.

¹⁶ 'Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. ¹⁷ Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

*Pacuenia Jesús yapëtaeyaexana pijajivi
pajamatabëcuene xaina palivaisi tsipaeba peubinë
pelivaisicuenia yabara pelivaisi
(Mr 4.13-20; Lc 8.11-15)*

¹⁸ Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapëtaenexa pajamatatabëcuene xaina palivaisi pacatsipaebatsi pabita peubinë pelivaisicuenia. ¹⁹ Pamonae jumetae ata Dioso pejumelivaisi, itsiata itsa apo jumeyapëtae pejamatabëëthietota, bajarapamonae bepiothopaexu pabi tuatuajëjava penajetaru-caenamutojumata. Nexata najetaruca dovathi. Nexata bajarapamonae tsijamatatabëjuvinejevatsi, dovathi vecuapitatsi bajarapalivaisimi, petsijamatatabëubilivaisimitsi. ²⁰ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatatabëcueneitsitsi itsamonaes Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ²¹ Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthetovetsina apo jumecovënëtsi bajarapalivaisi. Nexata apo ajamatatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëtavanapae. ²² Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatatabëcueneitsitsi itsamonaes Dioso pitorobilivaisi. Jumetane picani bajarapamonae

Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtotä. Nexata pacuenia itsi pabita piacuajibitonë, bajara itsi bajarapamonae. Tsipaji Dioso xaniavaetsia apo tojinavanapae.

²³ Pacuenia pijinia itsi paxu othopa pexaniairata, bajara tsijamatabëcueneitsitsi itsamonaes Dioso pitorobilivaisi. Bajarapamonae jumetane Dioso pitorobilivaisi. Jumeyapëtanuela. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

*Pacuenia peubijava tuatuajëa piabejejava juva
yabara pelivaisi*

²⁴ Dioso apo pejumecovënëtsivi, pamonaes natinavanapa Dioso pejumecovënëtsivijavata, itsamatacabí Dioso naneconitsiaexanaena. Nexata jivi peyapëtaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaubitsaëtoxanetojavabelia. Jesús jumaitsi mapacueniae:

—Mara pacuene jépaje Dioso pijajivi pevet-sijavaje. Pabi pexainaenë, épexaniaviriatrigoxu

uba pijapabita. ²⁵ Itsiata baitsi jane daxitajivi pemajitsijavata meravi, pabi pexainaenë pijavajabitsaënë tojunuatsi pijapabita. Nexata toubatsi trigo tuatuajëjava pibisiaviriajava, betrigobotonë pecataejava. Bajaraxuacujinae vemaxëpona baja. ²⁶ Nexata trigoxu juva. Vitsaba. Itsa baja trigobotonë namatonota, nexata matapania bajarajota nayapëtane pibisiaviriajava yajava penamatonotsijava. ²⁷ Nexata pabi pexainaenë pijajivi pata petsipaebinexatsi. Pabixainaenë pijajivi jumaitsi: “Nijapabita ubame épexaniaviriatrigoxu. ¿De tsaeta pacuenia pitsapa pibisiaviriaxu pibisiajava peyajavajuvnexa trigojava?” jai pabixainaenë pijajivi. ²⁸ Nexata pabixainaenë jumaitsi pijajivjavabelia: “Tajavajabitsaënë raeta bajaraxua uba,” jai. Nexata pabixainaenë pijajivi jumaitsi: “¿Jitsipame tsaja bajaraxua pataxunaejava?” jai. ²⁹ Itsiata baitsi jane pabixainaenë jumaitsi pijajivjavabelia: “Jume. Tsipaji panexunaejavata payajavaxunaejitsipame trigobotonë. ³⁰ Copatsianatsi abaxë penacuaitisinexa. Nexata penotsimatacabí itorobianajë tanetonotsivi copiaya pecaetuatsinexa piabejejava. Pepacunuanë exanaena. Bajaraxuacujinae bajaraxua tajuitsiana. Bajaraxuacujinae étrigoxu netonotsiana taetabiabibota tanetoetsinexa,” jai pabixainaenë pijajivjavabelia, jai Jesús jivi ayaibitsaëtoxanetojavabelia.

*Pacuenia mostazaxutoyo pejuvicujinae,
mostazanae bepijia vitsaba yabara pelivaisi
(Mr 4.30-32; Lc 13.18-19)*

31 Jesúis livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueni-aje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Pabi pexainaenë mostazaxu uba pijapabita. **32** Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapenanë exana bajaraponaemaxërananëjava. Bajara pijinia itsane jivi ata. Bepijia ayaibitsaëto Dioso pijajivi naexanaena, jai Jesúis jivi ayaibitsaëtoxanetojavabelia.

*Pacuenia pan pexanaematabënexa, levaduravënëjava fufunaeyaexana yabara pelivaisi
(Lc 13.20-21)*

33 Jesúis livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueni-aje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa, acueyabi patarroxanetobeje trigobenonë matajërëaba levaduravënëjavata. Nexata pan pexanaematabënexa, ayaimatabë ata,

levaduravënëjava pijinia tsiquirijavayo ata, itsiata levaduravënëjava yacaëjëpa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjëpa daxitanacuanëjava Dioso pijajivi pevetsicuene, jai Jesús jivi ayaibitsaëtoxanetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi

(Mr 4:33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona écomparacióncuenia. ³⁵ Bajarapacuenia Jesús jivi livaisianë itsa tsipaebapona écomparacióncuenia, tocopiapatatsi jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyauinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuene Dioso nacua pexanaejavaveliacujinae itsajivi ata abaxë apo yapëtae,

jai tajëvelia bajayata profetanë peyauinaebaxutota Jesús jivi livaisi comparacióncuenia petsipae-
baponaejavanexa yabara.

Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatuajëa pejuvijava pelivaisicuenia yabara pelivaisi

36 Jesús naviabiaexana jivi ayaibitsaëtoxaneto. Bajaraxuacujinae Jesús boyá joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabécueñe xaina palivaisi tsipaebame jivi ayaibitsaëtoxanetovabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

37 Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. **38** “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë.

39 “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabí,” itsa janë, mapanacua pevereverecaejavanelia yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë.

40 Nexata pacuenia piabejejava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje pevereverecaematacabí. **41** Bajarapamatocabí xanë, Daxitajivi Pematapijinënë, itorobianajë tajaángellevi taevetsinacua tanetovecuajutsinexa daxita pamonae pibisiacuene pexanabiabivi. Pamonae ata itsamonaejavabelia pibisiacuene

exanaeyaexana, bajarapamonae ata taevetsinacua netovecuajutsiana tajaángelevi. **42** Bajarapamonae xuabianatsi infiernojavabelia. Bajarajota nuena. Navonosiniana bitso penavixaetaexae. **43** Pamonae jumecovënëtsiajinavanapa Dioso pitorobicuenatsi, bajarapamonae perabënaityotsiana taxa Dioso pijanacuatatsia. Pacuenia matacabipijijuameto naitayota, bajarapacuenia perabënaityotsiana. Pajivi jamatabënejumeyapëtane, patacatsipaebilivaisi nemuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

44 Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëajavabelia bajaraxuanë caxitajarabeta irata. Nexata abaxë bajaraponë apojutsi bajaraxua. Abaxë saya mataacateta bajarajota. Nexata jamatabëcuenabarëyaya pona pijaboyabelia. Nexata xuacujinae bajaraponë canajeta daxita pexaina/javaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namamatmota. Nexata pacuenia bitso xanepana, bitso namamatmotanua, xuanë bajaraponë bajarapaira yacomuata, bajara pijinia itsi Dioso pijajivi pevet-sjava. Bitso xanepana. Bitso namamatmotanua, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaitsi pijajivjavabelia:

—Pacuenia itsi bitso pexaniaviriajava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniaviriajavane juya pecanajetaponaenexa. ⁴⁶ Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexainaevam. Nexata comuata bajarapaperlajava, jai Jesús pijajivjavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaitsi pijajivjavabelia:

—Dujuai peyamatajucaejavata, pibisiaviriadujuai itsa yamatajuta, bavecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejume-covénëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta.

⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. ⁴⁹ Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi

saicaya tsatsianatsi pecapanepaenexatsi.
50 Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujuvanë ata, yabara pelivaisi

51 Jesús yanijoba pijajivijavabelia.

—¿Panejumeyapétaneme tsabaja daxita xua yabara pacatsipaeabatsi? jai Jesús.

Nexata Jesús pijajivi jumaitsi:

—Jājā, pacajumeyapétanetsi rabaja, jai.

52 Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainaenë pijabovecua jutapona bitso penamatamotsijavanë, pejanajavanë, perujuvanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanalivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomarabelia, yabara pelivaisi

(*Mr 6.1-6; Lc 4.16-30*)

53 Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. **54** Jesús baja naviata pevitsabinacuayabelia. Nexata Jesús pevitsabinacuata

taxuxuaba livaisi petsipaebijava judíovi penacaetuatabiabibota. Nexata pejumetaevitsi sivajamatatabécuenenabenajacatsi. Nexata bajarapamonae Jesús jamatabécueneaebianetsi. Bajarapamonae Jesús yabara najumaitsi mapacueniae:

—¿De tsaeta iota maponë nacujaruba peyapëtaenexa mapalivaisije? ¿De tsaeta pacuenia caéjépatsi mapacuenia Dioso pesaëta pinijicuene pexanaenexaje? ⁵⁵ Maponëje vaxaitsiyajuvënëñë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. ⁵⁶ Papetiriavi ata vajatomarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamona ata, apo yaiyataeyabiabitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovënëtsitsi. Bajara xuata Jesús Dioso pesaëta pinijicuene pexanaejava bajarapatomarata bitsö apo tsitaexanae.

14

*Pacuenia Juanpijinë jivibautisabinëmi beyaxuabatsi yabara pelivaisi
(Mr 6.14-29; Lc 9.7-9)*

¹ Herodes, Galileanacua pevetsinë. Nexata Herodes Jesús vënélivaisitanetsi Dioso pesaëta pinijicuene pexanapona/java. ² Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajérëta. ⁴ Nexata Herodes pejuyapijinë pijava peyacajérëtsixa, Juanpijinë abaxë itsa apo vaetabitsi, Herodes muxuijoba. Juanpijinë jumaitsi Herodesjavabelia:

—Acunebi raja nejuyapijinë pijava nepitsi-java, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujiobixa, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabitsi. Tsipaji Herodes cujunava jivi. Daxitajivi Juanpijinë yapëtanetsi Diosojumepaebinëcuene. ⁶ Nexata Herodes itsa najamatapönapita penaexanaematacab, fiesta exana. Herodes junata jivi ayaubitsaëto. Nexata bajarapafiestamatacab pejionëyo, pijava

pexënatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barëitajitsipa peyavajibijava pejionёyo.⁷ Nexata Herodes najumecapanepaeya pexaniajajumeta jumaitsi pejionёyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejionёyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejionёyo itsa jumaitsitsi, Herodes bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejionёyojavabelia pexaniajajumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë. ¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaeexana pejionёyojavabelia. Bajarapova juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipae-binexa Juanpijinë pebeyaxuabijavatsi.

*Pacuenia Jesús pexaejava rajuta cinco mil
ponëbeje yabara pelivaisi
(Mr 6.30-44; Lc 9.10-17; Jn 6.1-14)*

¹³ Jesús vënélivaisitane Juanpijinë pebeyaxuabi-javatsi. Nexata Jesús ēpijajivi jerata barëpona itsabelia ajibi jivi. Itsiata baitsi Jane jivi ayaabit-sätoxaneto yapëtane itsabelia Jesús pona. Nexata pijatomaranë vecuapona. Matatsënëa naje-tarubena pepéjaitsivitsi Jesús. ¹⁴ Itsa Jesús nono-tajuna jeravecua, tane jivibitsaëtoxaneto. Nexata Jesús itaxutobejiobiatane bajarapamona. To-capatatsi piavitanevi. Nexata Jesús tojamateje-mayaexana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexae-java. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberенaje, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa be-naëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia. ²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. ²¹ Pamonaе pexaejava xane, ayaubitsaëtoxaneto. Cinco mil ponébeje namataëjëtatsi xaniavaetsia. Petiriavi, pejevaxi ata, apo namataëjëtsitsi.

*Pacuenia Jesús mene itaboxoya najetaruca
yabara pelivaisi*
(*Mr 6.45-52; Jn 6.16-21*)

²² Jesús jivi ayaubitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavelia. Nexata Jesús yameravibatsi bajarapatsutojumatatsia. ²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bajaraxuacujinae bajayacunua, ajena matacabijitsia, Jesús

pijajivi pecovëvelia imoxoyotanajetaruca. Jesùs najetaruca mene itaboxoya. ²⁶ Jesùs pijajivi itsa tanetsi mene itaboxoya penajetarucaejava, nabenajaca. Vavajai pecajunavi.

—¡Petëpaenë raeta pejumape najetaruca! jai Jesùs pijajivi.

²⁷ Nexata Jesùs jumaitsi pijajivijavelia:

—Xanë raja. Pëtsa panecujunavame. Pajamatejemamëre saya, jai Jesùs pijajivijavelia.

²⁸ Nexata Pedro jumaitsi Jesùsjavelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavavelia, jai Pedro.

²⁹ Nexata Jesùs jumaitsi Pedrojavavelia:

—Renamëre baitsi baja, jai Jesùs.

Pedro nexata jeravecua runareca meniabereca. Lia mene itaboxoyalia pepatsinexa Jesùsjavelia. ³⁰ Itsiata baitsi jane Pedro itsa tane jovibo piasaëjava, bitso cujunavataba. Nexata bubunajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

³¹ Bepijia Jesùs cobepitajaraba. Jumaitsi Pedrojavavelia:

—Tsiquirijavayo saya nejumecovënétame tacaevertsijava. ¿Detsa xuajitsia nejumeaebiataneme? jai Jesùs.

³² Nexata baja Jesùsbeje Pedrobeje jera ënëabelia itsa nonoliabeje, joviboxanetomi baja ajibi tsaxuabi. ³³ Nexata daxita jerata peponaevi pematabocabëta tonubena Jesùs pitabarata. Jumaitsi bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

*Pacuenia Jesús jamatejemayaexana piavitanevi
Genesaret nacuata yabara pelivaisi
(Mr 6.53-56)*

³⁴ Jesú, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi itsa yapëtanetsi Jesúscuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena. ³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonae Jesú penaxatatsijavacopia tojayataponatsi, jamatejema tsaponae piavitanejavavecua.

15

*Pacuenia Jesús tsipaeba xua jívi ja-
matabëcuenebijanatsiyabara pelivaisi*

(Mr 7.1-23)

¹ Fariseovi, judíovi pecujarubivi yajava, pata Jerusalén tomaraverena. Bajarapamonae Jesú imoxoyorenatsi. Nexata bajarapamonae jumaitsi Jesúsjavabelia:

² —Jesú, nijajivi naneconita Diosojavabelia. Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, xane anijatonë napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajara-pajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baitsi jane paxamë jivi pamuxubijiapenetabiabame peyaiyataeyaniva paxajivi, penajivi ata. Paxamë jivijavabelia pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ⁶ Nexata caranata Dioso pejumaitsijume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi paneyamaxëitojorobivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara, profeta Isaíaspijinë peyaquinaelivaisita jumaitsi mapacueniaje:

⁸ Bajarapamonae nejitsipaena saya pijumeta. Itsita pepo tanejitsipaejamatabëcuene nevecuatajë tsane. ⁹ Saya baitsi bajarapamonae pijajumaitsita tsane: “Pacajitsipatsi,” nejai tsane itajara. Itsita apo xaniajai tsane. Bajarapamonae saya jivi tsipaebaponaena pejamatabëcuenepejilivaisi. Pepo taitorobili-
vaisi apo tsipaebi tsane,
jai tajëvelia Isaíaspijinë
peyaquinaelivaisita Dioso pejumaitsijava paxamë yabara, jai Jesús fariseovijavabelia, judíovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivi-
javabelia:

—Panenamuxunaevere xaniavaetsia patanejumeyapëtanexamë patacatsipaebilivaisi.
¹¹ Xua jivi xane pecuibovojo tota, pexaevajënaeya napëna anijatonë apo nacobequiatsi ata, apo jamatabëcuenebijanaetsi. Apo vënunananeconitsi Diosojavabelia. Baitsi rajane xua jivi pecuibota pibisiacuenia cuaicuajai, bajara Jane xua jivi bajamatabëcuenebijanatsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajarapacuenia nejumaitsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najuajopaejitsiparecabeje mëthëxanetojavareca. Pabita piabejejava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

15 Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsipaebame jivijavabelia. Palivaisi baitsi jumaitsimë: “Xua jivi xane pecuibota, apo jamatabëcuenebijianaetsi,” jamë, jai Pedro Jesúsjavabelia.

16 Nexata Jesús jumaitsi:

—¿Paxamë ata tsarovia abaxë apo panejumeyapëtaemë? **17** Daxitacuene xua jivi xane pecuibovojotota, junua pecotsorotuabereca. Bajaraxacujinae vecuapitsapatsi. **18** Baitsi rajane xua jivi pecuibuatsina pitsapa pecuaicuajainexa pacuenia najamatabëxaina pejamatabëëthëtovertsina, bajara jane xua jivi jamatabëcuenebijianatsi. **19** Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaenexa. Pitsapa jivi pebeyaxuabijamatatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa.

Pitsapa penacobetoxotsijamatabëcuenenexa.
 Pitsapa itsamonae pexanaejava yabara
 najumetsënëtsiaya pepaebijamatabëcuenenexa.
 Pitsapa itsamonae yabara najumetsënëtsiaya
 pebaracuaicuajai jamatabëcuenenexa.
 Daxita bajarapajamatabëcuene pitsapa jivi
 pejamatabëéthëtojavavetsina. ²⁰ Daxita bajarapajamatabëcuene jivi jamatabëcuenebijianatsi. Jivi
 raja pexaejava xae ata, anijatonë napëna nacobe-
 quiatsinejeva, apo jamatabëcuenebijianaetsi, jai
 Jesús pijajivijavabelia.

Pacuenia Jesús itsanacuapijiva pexënatoyo tojamatejemaexana yabara pelivaisi

(Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Pinijijumeta bajarapova jumaitsi Jesúsjavabelia:

—;Petuxanenë, Davidpijinë pemomomë, nitaxutotsoniataema! Taxënatovoyo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

24 Nexata Jesús jumaitsi bajarapovajavelia:

—Dioso baja cajena nitoroba tayavenonaenexa ējudíovi, Israel nacuapijivi, pamonae Dioso tane beoveja. Tsipaji bajarapamonae Diosovecua naxuabavanapa, jai Jesús bajarapovajavelia.

25 Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

26 Nexata Jesús jumaitsi bajarapovajavelia:

—Apo xanepanae copiaya xamë itsanacuapijivamë tacayavenonaenexa. Abaxë copiaya veiyavenonajë tajanacuapijivi, judíovi. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajérëtsipajë tarajutsinexa avirixijavabelia, bajara itsinë tsipae, jai Jesús bajarapovajavelia.

27 Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainaenëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

28 Nexata icatsia Jesús jumaitsi bajarapovajavelia:

—¡Petiriva, bitso najamatäbëcuñecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënativayo Jesús pejamatabëcueneta tojamatejematsi baja pijabotalia.

*Pacuenia Jesús jamatejemayaexana
ayaibitsaëtoxaneto piavitanevi yabara pelivaisi*

²⁹ Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatatsia Jesús ecojopa. ³⁰ Nexata jivi ayaibitsaëtoxaneto pata Jesúsjavaberena. Tocapatatsi pejayujayunaevi. Tocapatatsinua bitso pitaxutotsëcënaevi. Tocapatatsinua apo pecuaicuajaiivi. Tocapatatsinua penabejenaevi. Tocapatatsinua ayaibitsaëtoxaneto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae. ³¹ Nexata jivi jamatabëcuenenabenajaca itsa tane pecuaicuajaijava apo pecuaicuajaiivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi itsa tane bajarapacuene, jumaitsi Diosojavabelia: “Diosomë, bitso ayajamatabëcuenenëmë, paIsrael nacuapijivinë patajaDiosomë,” jai bajarapamonae.

*Pacuenia Jesús rajuta pexaejava bejamatabëcuene cuatro mil pajivibeje yabara pelivaisi
(Mr 8.1-10)*

³² Jesú斯 jivi ayaibitsaëtoxaneto pënajinavanapatsi. Nexata Jesú斯 junata pijajivi. Jumaitsi pijajivijavabelia mapacueniae:

—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanéjavata pejinavanapaecujinae. Pemarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cuenabijitsipatsi piajani, jai Jesú斯 pijajivijavabelia.

³³ Nexata Jesú斯 pijajivi jumaitsi:

—¿Detsa jane pacuenia pexaejava tocaxitajara-bianatsi mapajivibitsaëtoxanetoje? Majotaje ajibi pexaejava. Tsipaji itsajivi ata pijabo apo xainae majotaje, jai Jesú斯 pijajivi.

³⁴ Nexata Jesú斯 yanijoba pijajivijavabelia.

—¿Detsa papanbëbeje paxainame? jai.

Nexata Jesú斯 pijajivi jumaitsi:

—Siete papanbëbeje paxainajë, dujuainëxi yajava, jai.

³⁵ Nexata Jesú斯 itoroba daxitajivi penaenexa irata. ³⁶ Nexata Jesú斯 pita siete papanbëbeje, dujuainëxi yajava. Nexata Jesú斯 jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesú斯 epatsicacapona pan, dujuainëxi yajava. Nexata Jesú斯 pepatsicacaepan rajuta pijajivijavabelia. Nexata juya Jesú斯 pijajivi tsicobetsana bajarapajivi bitsaëtoxanetojavabelia.

³⁷ Daxita bajarapamonae nabane xaniavaetsia.

Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë.³⁸ Pamonaes pexaejava xane, ayaibitsaëtoxaneto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi.³⁹ Pexaecujinae pexaejava, Jesús baja naviabiayaexana jivi. Nexata Jesús runareca jera ènëabereca. Pona baja Magdala nacuayabelia.

16

Pacuenia fariseovibeje saduceovibeje Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(*Mr 8.11-13; Lc 12.54-56*)

¹ Fariseovibeje saduceovibeje pata Jesúsjavaberena. Nexata bajarapamonaes Jesús jamatabëcueneëjëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuene athëbëvetsica pitorobinëcuenetsitsica.

² Nexata Jesús jumaitsi bajarapamonaejavelia:

—Pamatocabi caniviyo itaboxo tsobia, paxamë pajumaitsimë tsabiabi: “Meravia pexaniamatocabi tsane. Tsipaji itaboxo tsobia,” pajamë tsabiabi.³ Patamacabi bajayacunua nacuaitaboxo itacaënanuca, pajumaitsimë tsabiabi: “Ajena anacuayaijitsia daxita matocabi. Tsipaji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia matocabi itsijitsia. Tsipaji itarërëbo pepitsapaexae,

payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë, itsiata apo payapëtaemë Dioso athëbëvetsica taneitorobinëcuenetsica. ⁴ Bitso pibisiajamatabëcuene xaina pamonae copaba Dioso pejumecovënëtsijavami. Bajarapamonae picani nitoroba Dioso pesaëta pinijicuene taexanaejava tatsitaexanaenexa taneyapëtaenexa pepacuene Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara épitsicuene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mr 8.14-21)

⁵ Jesús pijajivi nicabalia puca itsapanabelia. Nexata nacofënëta pemarue. Apo caponae pan. ⁶ Nexata Jesús pijajivi muxujioba pejumecovënëtsiyaniva fariseovi, saduceovi ata, itsa tsipaebsati saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsiyaniva. ⁷ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuajai bajarapacuenia Jesús pejumaitsijume yabara. Jesús pijajivi jamatabëcuenenavëxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaexae, najai Jesús pijajivi jamatabëcuenenavëxaniabiaya.

⁸ Jesús pijajivi jamatabëcueneyapëtane bajarapacuenia jamatabëcuenenavëxaniabiaya pejumait-sijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaexae,” panajamë? ¡Apo payapëtaemë tsipaji tanecaëjépaejava taexanaenexa pan itsa namatavenonatsi! ⁹ Paxamë abaxë apo pane-jumeyapëtaemë. ¿Apo panajamatabenapitsimë tsipaji pacuenia exanajë pamatacabí pan namatavenonatsi? Tsicobetsanajë cinco papánbëmibeje cinco mil ponëbeje pexaenexa. ¿Detsa xuabeje pavënëbame peyajuvënëncopabijavanë bemapirecuenia pexanaejavanë? ¹⁰ ¿Apo panajamatabenapitsimënuá tsipaji pacuenia tsicobetsanajë siete papánbëmibeje cuatro mil pajivibeje pexaenexa? ¿Detsa xuabeje bajarapamatocabí pavënëbame peyajuvënëncopabijavanë

bemapirecuenia pexanaejavanë? **11** Itsa pacajumaitsitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsitsi, jai Jesús pijajivijavabelia.

12 Nexata jane baja Jesús pijajivi xaniavaetsia jumeyapétanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsianiva, najai Jesús pijajivi.

*Pacuenia Pedro jumaitsi Jesúsjavabelia: “¡Xamë raja Cristomël” jai yabara pelivaisi
(Mr 8.27-30; Lc 9.18-21)*

13 Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniae:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

14 Nexata Jesús pijajivi jumaitsi:
—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Eliáspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona,

icatsia asaë. Itsa jume, nexata meta bajayata Diosojumepaebivimi profetavimiyajuvënënë icatsia asaë,” jai tsabiabi itsamonaë xamë yabara, jai Jesús pijajivi.

15 Nexata Jesús jumaitsi pijajivijavabelia:

—¿Detsa nexata paxamë pajamatatabëitsimë xanë yabara? ¿Detsa xanë ponënë? jai Jesús pijajivijavabelia.

16 Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexénatomë, jai Pedro Jesúsjavabelia.

17 Jesús nexata jumaitsi Pedrojavabelia:

—Simón, Juan pexénatomë, xamë jammatabëcuenebarëyamë. Tsipaji itsajivi ata apo cayapëtaeyaexanae xanë taneyapëtaenexamë Cristocuenenë. Biji rajane taxa, athëbëtatsia peecaenë, cayapëtaeyaexana. **18** Nexata catsipaebianatsi mapacueniaje. Xamë rabaja Pedromë, beibotomë. Pacuenia

ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumecovënëtsivi Cristocuenenë. Nexata dovathi apo jamatabëcuenemataxenetsitsi tsane.

19 Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuapijilivaisianë. Xua itavetsianame mapanacuataje, bajaraxua Dioso ata athëbënacuatusatcia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatusatcia tocopata pexanaenexa, jai Jesús Pedrojavabelia.

20 Nexata Jesús pijajivi jumeitaveta petsipaebiyaniva itsajivijavabelia ata: “Mara ponë Cristoje, Dioso athébëvetsica pitorobinëtsica jivi pecapanepaenexa,” pejaiyaniva.

*Pacuenia Jesús tajëvelia navajunupaeba
pebeyaxuabijavanexatsiyabara pelivaisi
(Mr 8.31-9.1; Lc 9.22-27)*

21 Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueni-aje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesús tajëvelia pijajivijavabelia.

22 Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

23 Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucae Pedrojavabelia:

—¡Dovathi, nevecuanatixire! Nejamatabëcueneëjëbijitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa.

Saya jitsipame pacuenia jivi jitsipa taexanaenexa, jai Jesús.

24 Nexata Jesús jumaitsi pijajivijavabelia:

—Pajivi jitsipa tanepénaponaejava, bajarapajivi copatsi pejitsipaecuenia penajamatabéxainabiabijavami. Exanaponapae taitorobicuenia. Najamatatabécueneveretsinua, bejiobiaxanaejitsia atatsi, beyaxuabijitsia atatsinua, Dioso pejumelivaisi yabara piajamatabécuenesaë tsaponaponaenexa. **25** Nexata jane baja xuacujinae nepénaponena. Pajivi exanaponapona penatojitsipaecuenia, apo xainae tsane matacabi apo pevereverecaejava. Pajivi xanë tajamatatabécueneta copata penatojitsipaecuenia pexanaejavami, bajarapajivi xainaena matacabi apo pevereverecaejava. **26** Pajivi exanaponapona penatojitsipaecuenia, bajarapajivi Diosovecua nazuabiana. Nexata bajarapajivi daxitacuene xainae ata, mapanacuapijicueneje, itsiata nacuerata. Tsipaji pexainaecuene apo capanepae tsanetsi Diosojavabelia. Tsipaji acuenebi tsane itsajivi ata pemamatotsinexa penaxuabiyanaiva Diosovecua. **27** Xanë, Daxitajivi Pematapijinënë, yajavapatsianicajë taxa Dioso pijapenivenivenaecotia. Yajavapatsianicajënu tajaángalevi. Nexata matamotaponaenajë caejivi canacujitsia, tanetonacuenebivi. Naneconitsiaexanaenajë pijinia pijaneconi pexainaevi. **28** Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajajivi ayaubitsaetoxaneto naexanaena. Nexata paxamëyajuvënëvi pepuatae tsane xanë tajajivi

ayaibitsaëtoxaneto taevetsijava, tēpaena, jai Jesús pijajivijavabelia.

17

*Pacuenia Jesús caeepatoyo perabënivenivenataba
yabara pelivaisi*
(*Mr 9.2-13; Lc 9.28-36*)

¹ Jesús petépaejayanexa tajëvelia penava-junupaebicujinae, seis pamatacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatatabëxëyo: Pedro, Santiago, Juan. Bajarapamatatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan. ² Nexata petsutojumatatsia Jesús perabënivenivenareca bajarapamonae pitabarata. Pacuenia matacabipijijuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai. ³ Nexata bajarajota Jesús pijajivi tane bajayata petépaenëmibeje, Moiséspijinëbeje Elíaspijinëbeje. Jesús barëcuacuajaitsi bajaraponëbeje. ⁴ Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëtobeje. Itsabobërëto xamënexa tsane. Itsabobërëto Moisésneda tsane. Itsabobërëto Elíasneda tsane, jai Pedro Jesúsjavabelia.

⁵ Itsa abaxë Pedro cuaicuajai tsanucae, penaitayotsiitarërëbo mataacataxuabatsi daxita bajarapamonae. Nexata bajarapamonae jumetane bajarapaitarërëbojavavetsica Dioso pejumaitsijava:

“Mara ponë taxënato, tasivanëje. Bitso sivaja-matabécueñebarëyanë. Pajumetaema bajaraponë,” pejaijavatsica bajarapamona jumetane.

⁶ Jesùs pijajivi itsa jumetane bajarapacuenia Dioso pejumaitsijavatsica, irataeya othopa irata. Jesùs pijajivi bitso najunaviaca. ⁷ Nexata Jesùs imoxoyolia pijajivi. Jayalia. Jumaitsi pijajivijavabelia:

—Panonobapunare. Pëtsa pajunavame, jai Jesùs pijajivijavabelia.

⁸ Nexata Jesùs pijajivi itsa naëcobarëcëpalia Jesùsjavabelia, ajibi baja Moisésbeje Elíasbeje. Caenë baja Jesùs nuca.

⁹ Nexata Jesùs pijajivi itsa barërunanucponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesùs pijajivijavabelia.

¹⁰ Nexata Jesùs pijajivi yanijoba Jesùsjavabelia. Jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaëtsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesùs pijajivi.

¹¹ Nexata Jesùs jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabécueñexanetsiana daxitajivi,” itsa jai, Juanpijinëmi jivibautisabinëmi yabara jumaitsi.

Xaniajai rabaja pacuenia judíovi pecujarubivi jumaitsi. ¹² Xaniajanë pacuenia pacatsipaebijitsatsi. Elíaspijnë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijinia pacuenia xanë ata, Daxitajivi Pematapijinënë, nebejiobi-aexanaena bajarapamonae, jai Jesús pijajivijavabelia.

¹³ Nexata Jesús pijajivi jumeyapëtanetsi. Nexata Jesús pijajivi jamatabëjumaitsi:

—“Elíaspijnë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

*Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi
(Mr 9.14-29; Lc 9.37-43)*

¹⁴ Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanetotabuta vajënaeevetatsi jivi ayaubitsaëtoxaneto. Nexata pebi Jesús imoxoyorenatsi. Bajaraponë Jesús yaiyataeya pematabacabëta nucajunua Jesús pitabarata. Bajaraponë jumaitsi Jesúsjavabelia:

¹⁵ —Jesús, netoitaxutotsoniataema taxënatonëyo. Netodevacaibabiabatsi raja. Bitsø bejiobi tsabiabi. Anijatonë isotuabelia natajuitabiaba. Itsajavata menialia jopabiabalía.

¹⁶ Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

17 Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatatabécuenecaëjépae pejevaxinë panevecuacapitsapaenexa dovathi. ¡Paneaja-matabécuenetajavi baja rovia! Pexaniajailivaisive-cua saicayacuenia panajamatatabéxainame. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatatabécuenesaëne tsaponaponae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

18 Nexata Jesús itaveta dovathi pejevaxinë pevecuacapitsapaenexatsi. Nexata baja pejevaxinë dovathi vecuacapitsapatsi. Pejevaxinë baja jamatejema.

19 Bajaraxuacujinae Jesús pijajivi barécuaicuajaitsi pijaepratojavata. Jesús pijajivi jumaitsi:

—Patatjatuxanenë, ¿detsa xuajitsia meta pax-anë apo panecaëjépae patavecuacapitsapaenexa dovathi? jai Jesús pijajivi.

20 Nexata Jesús jumaitsi pijajivijavabelia:

—Apo pacacaëjépae pejevaxinë panevecuacapitsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaëjépaejitsipa Dioso pesaëta pinijicuene paneexanaenexa. Nexata itsa pajumaitsimë tsipae mapatsutoxanetojavabeliae: “Vecuanatixire

majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapëbeje tsipae itsa pepacuene xaniavaetsia pajumecovënëtsipame Dioso papecayavenonaejavanexa. ²¹ Mara paviriadovathije apo jitsipae pepitsapaejava. Matapania panexaejava apo paxaemë tsipae pamatacabibeje asaëyata Diosojavabelia pavajëtaponame dovathi pepitsapaenexa, pitsapaejitsipa, jai Jesús pijajivijavabelia.

*Pacuenia icatsia Jesús tajëvelia navajunupaeba
pebeyaxuabijavanexatsiyabara pelivaisi*

(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajëvelia navajunupae-bapona pebeyaxuabijavanexatsi. Jesús pijajivi-javabelia jumai tsapona mapacueniae:

—Xanë, Daxitajivi Pematapijinënë, necanajetsiana itsamona pecobeyabelia.

²³ Bajarapamonae nebeyaxuabiana. Itsiata baitsi jane tanebeyaxuobicujinae, acueyabi matacabita, icatsia asaënë tsane,” jai tsapona Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebapona-jejava petëpaejavanexa, Jesús pijajivi bitso najamatabëxaina.

*Pacuenia Jesús matamota impuestomatamo
yabara pelivaisi*

²⁴ Jesús, pijajivi yajava, pata Capernaum tomarata. Nexata Capernaum tomarata

impuestomatamo pematamoyanijobabiabivi
pona Pedrojavabelia. Nexata bajarapamonae
yanijobatsi Pedro.

—Pedro, ¿xaniajai tsaja? ¿Panijatuxanenë
impuestomatamo apo matamotabiabi,
paimpuestomatamo judíovi matamobabiaba
templobo pevetsivijavabelia? jaitsi.

25 Pedro nexata jumaitsi:

—Jājā. Matamotabiaba cajena, jai.

Nexata Pedro joneya Jesús peecaeboyalia. Nexata Pedro pejonejavatalia Jesús peecaeboyalia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë?
Nacuaevetsivi palata pepitsinexa, pijajivi
itoroba impuestomatamo petoyanijobinexatsi.
¿Detsa nexata pamonaejavabelia nacuaevetsivi
pijajivi yanijobabiaba impuestomatamo?
¿Nacuaeevetsivi tsaja pijamonaejavabelia? Itsa
jume, ¿saicayavijavabelia tsaja, nacuaevetsivi
pevetsinacuata pejinavanapaevijavabelia? jai
Jesús Pedrojavabelia.

26 Pedro nexata jumaitsi Jesúsjavabelia:

—Nacuaevetsivi raja pijajivi impuestomatamo
yanijobabiaba saicayavijavabelia, nacuaevetsivi
pevetsinacuata pejinavanapaevijavabelia. Apo
yanijobabiabi nacuaevetsivi pijamonaejavabelia,
jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevetsivi pijamonae apo
matamotsitsi impuestomatamo, bajara pijinia
pacuenia xanë ata apo jitsipaenë picani
tamamatotsinexa impuestomatamo templobo
pevetsivijavabelia taxa Dioso pijatemploboxae.

27 Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetojavabelia. Ëjëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota caëjëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa poné paxanëyajuvénënë panevecuaayaijamatabëcuenenë?” jai Jesúsjavabelia yabara pelivaisi (Mr 9.33-37; Lc 9.46-48)

1 Jesús baja itsa najumevereta Pedrojavabelia pecuaicuajaijava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa poné paxanëyajuvénënë bitso ayaijamatabëcuenenë tsane daxitavecua Dioso pijanacuatsatsia? jai.

2 Nexata Jesús junata pejevaxinëyo. Pijajivi tuatua jëta nuteta pejevaxinëyo. **3** Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuene copata Diosojavabelia Dioso pevetsinexatsi. Nexata paxamë itsa apo

panajamatabëcuenepënëyorotsimë tsane perujumatabëcuenevecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia. ⁴ Nexata ponë jitsipa Dioso pijanacuatsatsia ayajamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije. ⁵ Pajivi copiapita tanejumecovënëtsijiviyo, mapitsijamatabëcuenejivivoje, bajaraxua xanë taniji tanecopiacitsjava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(*Mr 9.42-48; Lc 17.1-2*)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjivivo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujéareca. Bajarapajivi bexuarecatsi bitso penaneconitsianiva Diosojavabelia pibisiacuene itsa exanaeyaexana tanejumecovënëtsiviyajuvënëvi. ⁷ ¡Dioso bitso

naneconitsiaexanaenatsi mapanacuapijivi
 pibisiacuene pexanaevi! Pibisiacuene
 vajanaexanaeyaexanae jamatabëcuenenexa,
 navita mapanacuataje. Bajarapajamatabëcuene
 tsitecaponaena pevajënaeyabelia. Nexata pajivi
 pejamatabëcuenetra itsamonaes pibisiacuene
 exanaeyaexana, bajarapajivi bitso Dioso
 naneconitsiaexanaenatsi.

⁸ 'Bajaraxuata panecobeta, panetaxuta
 ata, pibisiacuene itsa paexaname, pan-
 cobecaucure. Panataxucaucure. Tajë
 panavecuaxuare. Itsiata xanepana panejonenexa
 cobemataxucaeya, taxumataxucaeya ata,
 apo pevereverecaenacuajavabelia. Biji
 rajane apo xanepanae tsipae anijacobebeje,
 anijataxubeje ata yajava, panejonenexa apo
 pevereverecaiesotojavabelia. ⁹ Paneitaxutota
 panetaejava yabara ata pibisiacuene itsa
 paexaname, panaitaxutocajure. Itsiata
 xanepana panejonenexa pacaeitaxutojivimë
 apo pevereverecaenacuajavabelia. Biji rajane
 apo xanepanae tsipae anijaitaxutobeje yajava
 panejonenexa infiernojavabelia, jai Jesús
 pijajivijavabelia.

*Pacuenia Jesús pijajivi livaisi tsipaeba oveja pe-
 naxuabinë pelivaisicuenia yabara pelivaisi*

(Lc 15.3-7)

¹⁰ Jesús jumaitsi pijajivijavabelia:
 —Itsamonaes mapanacuata bijiaya taeyabiaba
 mapitsipejevaxijivixi ataje, tanejume-
 covënëtsijivixi. Saya beveliajamatabëcuenevi
 taeyabiaba. Pëtsa bajarapacuenia paxamë
 ata bijiaya pataneme tanejumecovënëtsivi.

Bijiaya pëtsa pataneme mapitsipejevaxinëyo ataje, tanejumecovënëtsijiviyo. Tsipaji bajarapamonae ángelevi yajavajinavanapa peyavenonabiabinexatsi. Bajarapaángellevi taxa Dioso, athëbëtatsia peecaenë, pitabarata jinavanapa. ¹¹ Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjëre mapacueneje. Pebi xainaejitsipa cien ponëbeje oveja. Nexata itsa toyajuvënënaxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi. ¹³ Xaniajanë pacuenia pacatsipaebijitsatsi. Bajaraponë itsa caxitarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. ¹⁴ Bajara pijinia pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivxi ataje, tanejumecovënëtsivi, jai Jesús pijajivibelia.

*Pacuenia Dioso pejumecovënëtsijivi
bebarajamatabëcueneanaxepana, itsacueniabi atatsi
itsajivi, yabara pelivaisi
(Lc 17.3)*

¹⁵ Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënélivaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuajamëbeje, panabarajamatabëcuene xanepanaenamebeje.

16 Xaniavaetsia itsa apo pacabarëcuaicuajai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxuijobinexatsi. Nexata bajaraponëbeje pacajumetaena xaniavaetsia panebarëcuaicuajaijava pibisiacuene papecatoexanaenëjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename.

17 Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxuibijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujiobianatsi. Bajaraponë itsa apo namuxunaevetsi tsane, muxujiobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

18 Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatussiata itaveta. Xua jivi patocopatsianame pexanaenexa mapanacuataje, bajaraxua Dioso

ata athëbënacuatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsatsinua mapacueniaje. Mapanacuata paanijanëmëbeje itsa panaja-matabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtatsia peecaenë, pacajumecovënëtsianabeje xua pavajëtamebeje. ²⁰ Tsipaji itsajota anijajivibeje, acueyabi ata, naacaetuata, tanejumecovënëtsivi, bajarajota xanë bajarapamonae yajavaecaenajë, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuene xanepanaeya pataename. Itsa pavënëlivaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuaicuajamëbeje, panabarajamatabëcuene xanepanaenamebeje,” panejamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuene xanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabenjenexa yabara apo jumaitsinë. Biji rajane siete pasentabeje pibisiacuene pacaexanae ata, pibisiacuene

pacatoexanae atanua, pajamatabëcaevare
 barajamatatabëcuenexanepanaeya panetaenexa,
 baitsi cuatrocientos noventa xuabeje ata, jai
 Jesús Pedrojavabelia.

*Ponë apo jitsipae pebaraja-
 matabëcuenexanepanaenexa itsanëjavabelia yabara
 pelivaisi*

²³ Jesús livaisi tsipaeba comparacióncuenia pijajivjavabelia. Jumaitsi mapacueniaje:

—Dioso pijanacuatatsia pijajivjavabelia exanaena pacuenia nacuaevertsinë pijajivjavabelia baexana. Nacuaevertsinë jitsipa piامoneyabivitsi pemamatotsinxatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamonaе amoneyabatsi. Nexata pijajivi tobarëparenatsi ponë bitso ayajava amoneyabatsi, baitsi millones de pesos piامoneyabinëtsi. ²⁵ Nexata bajaraponë apo xainae pemamatotsijavanexatsi. Nexata nacuaevertsinë itoroba pijajivi. Jumaitsi: “Mara ponë bitso ayajava niامoneyabaj. Nexata pacanajetaxuabianame dajubicuenia itsamonaе javabelia amoneya petonacuenebaponaenexa daxitamatocabijavabelianexa. Daxita pexi, pijava ata, pecobecovë ata yajava, pacanajetaxuabianame. Bajarapacuenia pitsianajë tsiquirijavayo ata taneamoneyabijavamatamo,” jai nacuaevertsinë pijajivjavabelia. ²⁶ Nexata ponë amoneyaba, nacuaevertsinë pitabarata pematabacabëta nucajunua. Pinijicuenia vajëta nacuaevertsinëjavabelia. Jumaitsi:

“Nejamatabëcueneevere abaxë. Camatamotsianatsi rabaja daxita xua camoneyabatsi,” jai. ²⁷ Nexata nacuaevertsinë itaxutotsoniatane piamoneyabinëtsi. Nexata nacuaevertsinë ju-maitsi piamoneyabinëtsijavelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevertsinë piamoneyabinëtsijavelia. Bajaraxuacujinae copata baja penaviatsinexa. ²⁸ Nexata bajaraponë penaviatsinexa, ajena pitsapalia nacuaevertsinë pijabovecua, caxitajarabaxuaba itsanë penajuanacuenebababinëbeje nacuaevertsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanemamatotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavavelia: “Nemata-more taneamoneyabijavamë,” jai. ²⁹ Nexata piamoneyabinëtsi bajaraponë pitabarata pematabacabëta nucajunua. Pinijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai. ³⁰ Itsiata baitsi jane bajaraponë piamoneyabinëtsi apo itaxutotsoniatae. Barëpona baja penaneconitsivi pejebabiabibojavelia penaneconitsiaexanaenexa. Bajarapacuenia pemamatotsinexatsi daxita piamoneyabijavatsi. ³¹ Nexata nacuaevertsinë pijajivi itsa tane bajarapacuenia pexanaejava penajua nacuenebababinëbejejavavelia, bajarapamonae bitso najamatabëxaina. Nexata nacuaevertsinë pijajivi ponalia petsipaebinexa bajaraxua pijatuxanenëjavavelia. ³² Nexata nacuaevertsinë

pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocapatatsi, nacuaevetsinë jumaitsi bajaraponëjavabelia: “Niamamatatabëcuenebejenë baja rovia. Catoiquinatsi rabaja picani taneamoneyabijavamë. Tcipaji pinijicuenia nevajétame.³³ Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinë,” jai nacuaevetsinë.³⁴ Nexata nacuaevetsinë bitso baraanaepana millones de pesos piامoneyabinëtsijavabelia. Nexata nacuaevetsinë jumaitsi pijajivijavabelia: “Bajaraponë pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ëpematamoveretsijavabelianexa daxita taneamoneyabijava,” jai nacuaevetsinë, jai Jesús pijajivijavabelia.

³⁵ Jesús icatsia jumaitsi pijajivijavabelia:

—Bajara pijinia pacuenia paxamë ata taxa, athëbëtatsia peecaenë, pacaexanaena, itsa apo pajamatabëcaevimë tsane panebarajamatatabëcuene xanepanaenexa pamonae pacaitsacueniaba, jai Jesús pijajivijavabelia.

19

Pacuenia Jesús jivi lívansi tsipaeba penacojobinë pijava pexuabiyanova yabara pelivaisi

(Mr 10.1-12; Lc 16.18)

¹ Jesú斯 pijajivi pemuxujiobicujinae pebarajamatabécuene xanepanaenexa itsamonaes itsacueniabi atatsi, Jesú斯 baja pona Galilea nacuavecua. Jesú斯 nexata pata Judea nacuayabelia, Jordánmene itsapanabelia. ²Jivi ayaubitsaëtoxaneto pénaponatsi. Bajarajotalia Jesú斯 jamatejemayaexana piavitanevi.

³ Nexata fariseovi Jesú斯 imoxoyorenatsi. Jamatabécueneëjëbiaya yanijobatsi. Jesú斯 bijiaya itsajumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinë pijava pexuabinexa itsacuenejavayo ata yabara? jai fariseovi.

⁴ Jesú斯 nexata jumaitsi fariseovijavabelia:

—¿Apo palebimë tsipaji paneyapëtaenexa pacuenia Dioso pejumelivaisibaxutota jumaitsi? Pamatocabi Dioso taxuxuaba nacua pexanaejava, bajarapamatocabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueniae: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaeji, jai Dioso pejumelivaisibaxutota. ⁶ Nexata Dioso apo tae beanijajivibeje. Becaesi, saya tane Dioso. Bajaraxuata itsanë ata apo bexuabi pijava. Tsipaji Dioso pejamatabécueneta napitsiaexanatsibeje, jai Jesú斯 fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinë copata penacojobinë petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

8 Jesús nexata jumaitsi fariseovijavabelia:

—Paneajamatabëcuenetajaxae, Moiséspijinë pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa.

9 Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Nexata pijava pexuabinë itsa nacojioba icatsia itsavajavabelia, bajaraponë pibisiacuene exana pevitota. Tsipaji pepo pijavavecua jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsipaji itsanë pijavami pita, pova abaxë Dioso totanetsi itsanë pijavacuenia, jai Jesús fariseovijavabelia.

10 Nexata Jesús pijajivi jumaitsi Jesúsvjavelia:

—Itsa bajarapacuenia pebi apo tocopatsitsi itaxutojema pijava pexuabinexa, nexata meta baya apo benacojiobi, jai Jesús pijajivi.

11 Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamonae Dioso jamatabëcueneyavenonatsi. **12** Apo caejamatobëcuene raja xua yabara pebijivi apo nacojiobi. Itsamonaen penabejenaenë naexana. Nexata apo caëjëpaetsi penacojobijava. Itsamonaen jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojobijava. Itsamonaen

ëDioso pijacuene petonacuenebinexa, apo nacojiobi. Nexata ponë jamatabëcuñecaëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

*Pacuenia Jesús jumaitsi pejevaxijivixijavabelia
yabara pelivaisi*

(*Mr 10.13-16; Lc 18.15-17*)

¹³ Jesúsjavaberena itsamonaे pejevaxijivixi tocapataponatsi Jesús pecobeta pejayatapon-aenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivix-ije jumeaebinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeaebinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecua.

Pacuenia pevëjëato, bitsø pexainaenë, cuaicuajai Jesúsjavabelia yabara pelivaisi

(*Mr 10.17-31; Lc 18.18-30*)

16 Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë.
¿Detsa pitsicuene, pexaniacuene, exanaenajë taxainaenexa matacabi apo pevereverecaejava?
jai pevëjëato.

17 Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa matacabi apo pevereverecaejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

18 Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë?
jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonaе pexanaejava yabara najumetsënëtsiaya paebame. **19** Axa yaiyataema. Ena ata yaiyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

20 Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

21 Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaJAVA Dioso pijanacuatatsia. Bajaraxuacujinae nepenaponaename, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tcipaji pevëjëato daxitacuenie bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

²³ Nexata pevëjëato pecovëta Jesús jumaitsi pijajivjavabelia:

—Xaniajanë pacuenia pacatsipaebijitsatsi. Ponë bitso daxitacuenie pexainaenë, tsiayapëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia. ²⁴ Icatsia matavëjëa pacajumaitstsitsi. Pacuenia camello acuenebi pejoneJAVA palutaetoitaxutovojojatalia, bajara pijinia pacuenia bitso pexainaenë acuenebi tsane pejoneJAVA Dioso pijatomarabetsia, jai Jesús pijajivjavabelia.

²⁵ Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

26 Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi. Dioso raja caëjëpatsi daxitacuene pexanaenexa, jai Jesús pijajivijavabelia.

27 Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaevam. Nexata baja pacapënajinavanapatsi. ¿Detsa xua meta panerajutsiana? jai Pedro Jesúsjavabelia.

28 Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabí daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatocabí paxamë ata, doce paponëmëbeje patanepënajinavanapaevimë, paenaename, pacaenëmë canacujitsia, panijatronota vajanajuaevetsinexa xua evetsianajë. Nexata paxamë paenaename jueznëcuenia panenaneconitsiaexanaenexa pijaneconi pexainaevi. Pananeconitsiaexanaename Israelpijinëmi pexi, doce ponëmibeje, pemomoxi.

29 Daxita pamonaе tajamatabëcuena pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonae rajutsianatsi ayajava bitso pepuenetsijavanëmi matatoxenetsia. Caejavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua matacabí apo peverevereceaev. **30** Pamonaе aeconoxae

mapamatacabitaje ayaijamatabëcuenevi tanetsi, bajarapamonaे itsamatacabi Dioso beveliajamatabëcuenevi exanaenatsi. Pamonaе pijinia mapamatacabitaje beveliajamatabëcuenevi tanetsi, bajarapamonaе itsamatacabi Dioso ayaijamatabëcuenevi exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaenë petonacuenebivitsi najëpaeya pemamatotsjava pelivaisicuenia yabara pelivaisi

¹ Icatsia Jesús jumaitsi pijajivijavabelia:
 —Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pemamatotsjava pijanacuatatsia, jëpa mapalivaisije. Pabixaneto pexainaenë ponapona. Ajena matacabi tsarucaponae, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonaе. Nexata itoroba pijapabiabelia petonacuenebinexatsi. ³ Bajaraxuacujinae juameto baja tajë itsa ruquina, a las nueve, naropota icatsia. Taenuba tomara tuatuajëta pebijivi, saya jema pejinavanapaevi. ⁴ Nexata jumaitsi bajarapamonaejavabelia: “Paxamë ata paponaremilia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenë. ⁵ Nexata

bajarapamonae ata ponalia petonacuenebinexatsi. Bajaráxuacujinae, matonejeepatota, junata icatsia itsamona. Bajárapamonae ata ponalia petonacuenebinexatsi. Bajaráxuacujinae, bejamatabëcuene a las tres, junata icatsia itsamona. Bajárapamonae ata ponalia petonacuenebinexatsi. ⁶ Bajaráxuacujinae, caniviyo, bejamatabëcuene a las cinco, pabixainaenë icatsia pona tomara tuatuajéareca. Caxitajarabaxuaba icatsia pebijivi, saya jema pejinavanapaevi. Nexata pabixainaenë jumaitsi bajarapamonaejavabelia: “¿Detsa xuajitsia saya daxitamatacabí pajinavanapame panacuenebinejevamë?” jai. ⁷ Nexata bajarapamonae jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenë jumaitsi: “Paxamë ata paponaremilia tajapabiaabelia patanetonacuenebinexamë. Pacamatamotsianatsiraja xaniavaetsia,” jai pabixainaenë. Nexata bajarapamonae jejai. Ponalia petonacuenebinexatsi. ⁸ Nexata baja juameto itsa tabujuniya, pabixainaenë jumaitsi pijajivitonëjavabelia: “Junare baja tanetonacuenebivi. Matamobare baja. Copiaya matamobare pamona pepacotocaevi pejonevi. Pamona pepacopiaya pejonevi cotocaevi matamobianame,” jai pabixainaenë pijajivitonëjavabelia. ⁹ Nexata pamona pepacotocaevi junua a las cinco penacuenebinexa, parena pemamatamobinexatsi. Nexata caenë canacujitsia matamobatsi caedenario. ¹⁰ Nexata daxita pamona bajayacunua pepacopiaya junua

penacuenebinexa, pepacotocaevi juya parena pemamatobinexatsi. Nexata bajarapamonae jamatabëjumaitsi: “Caedenario meta pematatsënëa vaxaitsi nacamamatobiana. Tsipaji copiaya vaxaitsi junuatsi vajanacuenebinexa,” jamatabëjai bajarapamonae. Itsiata baitsi jane bajarapamonae ata, caenë canacujitsia, matamobatsi caedenario tsaponae. ¹¹ Nexata bajarapamonae penacuenebimatamo baja itsa nota, baraanaepana pabixainaenëjavabelia. ¹² Jumaitsi bajarapamonaes: “Mapamonaes cotocaevi pepatsivi, nacueneba saya caehora. Paxanë baja rovia ayaicuenia panacuenebajë. Icotia daxitamatacabi panetsajava. Itsiata mapamonaes matamobame pacuenia panemamatobame,” jai bajarapamonaes. ¹³ Itsiata baitsi jane pabixainaenë jumaitsi bajara pamonaeyajuvënënëjavabelia: “Itsacuenejavayo ata pilbisiacuene apo pacaxanaetsi. Patacajunatsijavata patanetonacuenebinexamë, caedenario pacatsipaebatsi patacamata-motsinexa patanetonacuenebimatamomë. Nexata baja bajarapacuenia pacarajutatsi. ¹⁴ Panijamatamo baja papitame. Paponare baja panijabonëjavabelia. Pamonaes cotocaevi junua tanetonacuenebinexa, bajarapamonaes ata matamobajë pacuenia pacamatamobatsi. Bajarapacuenia matamobajë pacuenia xanë jitsipajë. ¹⁵ Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamonaes ayaijava tarajutsixae? jai pabixainaenë petonacuenebivitsi yajuvënënëjavabelia. ¹⁶ Bajara pijinia pacuenia

Dioso ata, pacuenia jitsipa, exanaena pijajivijavabelia. Pamonae mapanacuata ayaíjamatabécuenevi tanetsi, bajarapamonaé itsamatacabi Dioso beveliajamatabécuenevi exanaenatsi. Pamonae pijinia mapanacuata beveliajamatabécuenevi tanetsi, bajarapamonaé itsamatacabi Dioso ayaíjamatabécuenevi exanaenatsi. Bajarapacuenia Dioso exanaena tsipaji picani jivi ayaibitsaëtoxaneto Dioso junata. Itsiata bajarapamonaeyajuvënëvi, caejiviyobeje saya, Dioso jumecovënëta, jai Jesús pijajivijavabelia.

*Pacuenia icatsia Jesús tajëvelia navajunupaeba
pebeyaxuabijavanexatsiyabara pelivaisi
(Mr 10.32-34; Lc 18.31-34)*

¹⁷ Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamonae yajava. Nexata bajarapamonaeve cuépijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniae:

¹⁸ —Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanë neneconitsiana tanebeyaxuabinexa. ¹⁹ Bajaraxuacujinae icatsia necanajetsiana itsanacuaverena pepatsivi pecobeyabelia.

Bajarapamona necanecaponaena. Nejumatitibabena penaneconitsivi pejumaconitabiabimacata. Bajaraxuacujinae cruzajavabelia necobematabiabarutsiana tatëpanexa. Itsiata baitsi jane tanebeyaxuobicujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

*Pacuenia Santiagobeje Juanbeje pena vajëta
Jesúsjavabelia pexaniacuene petoexanaenexatsi
yabara pelivaisi*

(Mr 10.35-45)

20 Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematabacabëta nucajunua Jesús pitabarata. Vajëta pexaniacuene petoexanaenexatsi. **21** Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatocabi daxitacuene evetsianame, tocopatsianame taxënätobeje nemuxuneneta penaceaenexabeje panenajuaevetsinexa. Itsanë tocopatsianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

22 Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacaëjépabeje tsaja panenacaevetsinexabeje

papecabejiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacaëjëpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsibeje:

—Jājā, panecaëjëpabeje cajena, jaibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabejiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtamebeje panenaecaenexabeje, itsanë tacujuanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponëbeje Jesús pijajivi vënëtane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonae jamatabëcuenebaraanaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonae jinavanapa pevetsinacuanëjava. Nexata bajarapanacuanë pevetsivi ayajamatabëcuenevi

nataeyabia. Xua jamatabëitoroba pevetsi-nacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. **26** Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënëne jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. **27** Ponë paxamëyajuvënëne jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. **28** Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtoxaneto pibisiacuene pexanaeneconimi taneconimamotsinexa, jai Jesùs pijajivijavabelia.

Pacuenia Jesùs itaxutoxanepanaeyaexana bitso pitaxutotsécënaenëbeje, apo petaenëbeje, yabara pelivaisi

(Mr 10.46-52; Lc 18.35-43)

29 Jesùs, pijajivi yajava, pitsapa Jericó tomarravecua. Nexata jivi ayaibitsaëto pënaponatsi.

30 Panamutojava Jesùs najetaruca, bajarapana-mutojavata ecabeje bitso pitaxutotsécënaenëbeje, apo petaenëbeje. Nexata bajaraponëbeje itsa jumetanebeje bajarapanamutua imoxoyo Jesùs penajetarucaejava, vavajaibeje tsecae.

—Jesùs, Davidpijinë pemomomë, paneitaxutotsoniataemabeje! jaibeje tsecae

pitaxutotsëcënaenëbeje.

³¹ Jivi picani jumeitavetatsibeje pemoyanex-abeje tsecae. Itsiata biji bitsoyo orijibia vava-jaibeje tsecae.

—¡Jesús, Davidpijinë pemomomë, paneitaxutotsi-soniataemabeje! jaibeje tsecae Jesúsjavabelia.

³² Nexata Jesús muxunanucojopa. Junata pitaxutotsëcënaenëbeje. Jesús jumaitsi bajaraponëbejejavabelia:

—¿Detsa xua pajitsipamebeje patacaexanaenex-abeje? jai.

³³ Nexata bajaraponëbeje jumaitsibeje Jesúsjavabelia:

—Jesús, pajitsipajëbeje pataitaxutoxanepanae-javabeje, jaibeje tsecae.

³⁴ Nexata Jesús itaxutotsoniatane bajaraponëbeje. Jesús itaxutojayata bajaraponëbeje. Bajarajota caecuenia bajaraponëbeje itaxutox-anepanabeje baja. Nexata bajaraponëbeje Jesús pepëta naponabeje.

21

Pacuenia Jesús pata Jerusalén tomarata yabara pelivaisi

(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonëbejejavabelia mapacueniaje:

² —Paponarebeje mapatomarayo ecaliajejavabelia. Bajarajotalia, ajena papatsiaremeliaabeje, pataenutsianamebeje burro pecétanutsinëtsi, pexénatonëyo yajava. Paisinaenamebeje bajarapaburrobeje. Payamaëyacarenamëbeje tsane. ³ “Detsa xuajitsia burrobeje paisinamebeje?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatiarena,” pajamëbeje tsane, jai Jesús pijajivitonëbejejavabelia.

⁴ Bajarapacuenia Jesús itsa jumaitsi, tocopiapatatsi jane baja pacuenia Diosojumepaebinëmi profetanë bajayata tajëvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanëmi bajayata peyaquinalivaisita jumaitsi mapacueniae:

⁵ Pajumaitsimë tsane Jerusalén tomarapijivijavabelia: “Pataename pepo paneevetsinë paxamëjavaberena penajetarucaejava. Beveliamatabëcuenenëcuenia najetarucaena. Pejanaburroyota yapatanajetarucaena,” pajamë tsane Jerusalén tomarapijivijavabelia, jai bajayata tajëvelia profetanëmi peyaquinalivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonëbeje liabeje. Jumecovënëtabeje pacuenia Jesús itorobatsibeje.

⁷ Yamaëya carenabeje burro, pexénatonëyo yajava. Nexata bajarapaburrobeje Jesús pijajivi

tsijumajeba pijacama,” pajamë tsane Jerusalén tomarapijivijavabelia, jai bajayata tajévelia profetanëmi peyaisajumavelia penaxatabijavanë. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayaibitsaëtoxaneto, pijacamisajumavelia penaxatabijavanë, Jesús pevajénaeya namutua yerequejebapona. Itsamonae naemaxéraranë, pebaxu yajava, ucubaba. Nexata namutua Jesús tsivajénaeitabétsiaya jebaponatsi yaiyataeya pecopiapitsinexatsi. ⁹ Jesús penajetarucaejavata jivi ayaibitsaëtoxaneto Jesús pevajénaeya namataxainaeya najetarubena. Itsabitsaëtoxaneto Jesús pecovëya cotocaevanajetarubena. Daxita bajarapamonae vavajai tsanajetarubenae. Jumaitsi tsanajetarubenae:

—¡Dioso yavenonaenatsi maponëje, pepo nacuaevetsinëmi Davidpijinë pemomo! ¡Dioso yavenonaenatsi maponë najetaruaje nacua pevetsinënexa Dioso pejamatabëcueneta! Nexata vaxaitsi pexaniajamatabëcuene rajutatsi Diosojavabelia, jai tsanajetarubenae bajarapamonae.

¹⁰ Nexata Jesús itsa pata Jerusalén tomarata, daxita Jerusalén tomarapijivi jamatabëcuenenabenajaca. Nexata nayanijoba.

—¿Detsa meta maponë najetaruaje? najai bajarapamonae.

¹¹ Nexata jivi jumaitsi:

—Jesús ra manajetaruaje, Diosojumepaebinë profetanë. Galilea nacuata peecaetomara, Nazaret tomarapijinë, jai bajarapamonae.

Pacuenia Jesúis Jerusalén tomarata templobove-cua pitsapaeyaexana pecanajetabiabivi, pecomua-cabiabivinua, yabara pelivaisi

(Mr 11.15-19; Lc 19.45-48; Jn 2.13-22)

¹² Jesúis itsa pata Jerusalén tomarata, joneya temploboyalia. Nexata templobota Jesúis tane pecanajetabiabivi, pecomuacaevinua. Nexata daxitaitsi:

—Jesúis ra manajetarucaje, Diosojumepaebinë profetanë. Galilea nacuata peecaetomara, Nazaret tom bajarapamonae Jesúis pitsapaeyaexana templobovecua. Palata pecambiababiabivi ata pijamesanëmi Jesúis topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

¹³ Jesúis jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitisjava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetox-otsinexa panacaetuatababame mapabotaje, jai Jesúis templobota pecanajetabiabivijavabelia.

¹⁴ Bajarajota templobota Jesúis imoxoyorenatsi pitaxutotsëcënaevi, pejayujayunaevinua. Nexata Jesúis bajarapamonae xanepanaeyaexana.

¹⁵ Templobota nubena sacerdotevi. Nubena judíovi pecujarubivinua. Bajarapamonae taenubena Jesúis pitaxutoxanepanaeyaexanae-java pitaxutotsëcënaevi. Taenubenanua Jesúis pexanepanaeyaexanaejava pejayujayunaevi. Jumetaenubenanua pejevaxi templobota

pevabajaijavata pejumaitsijava Jesús yabara: “¡Dioso yavenonaenatsi maponëje, pepo nacuaevetsinëmi Davidpijinë pemomo!” pejajava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

16 Nexata bajarapamonae jumaitsi
Jesúsjavabelia:

—¿Tsipaji apo jumetaemë mapapejevaxi xamë yabara pejumaitsaponaejavaje? ¿Apo necajumeitavetsi? jai.

Nexata Jesús jumaitsi bajarapamonaejavabelia:

—Jäjä. Jumetaniji picani. Itsiata apo jumeitavetsinë. ¿Paxamë tsipaji Dioso pejumelivaisibaxuto apo palebimë paneyapëtaenexa pacuenia tajëvelia jumaitsi xanë yabara bajarapapejevaxi pevabajaijavanexa? Dioso pejumaitsijava xanëjavaberena, tajëvelia Dioso pejumelivaisibaxutota jumaitsi mapacueniae:

Pejevaxi, mitoapaenacuetoxi ata,
naxëanaeyaexanaename penaxëanaejavata
xamëjavaberena pecajumaitsinexa:
“Ayajamatatabëcuenenëmë bitso,”
pecajainexa,

jai Dioso pejumelivaisibaxutota xanëjavaberena Dioso pejumaitsijava. Bajaraxuata mapapejevaxije jumaitsi bajarapacuenia, jai Jesús sacerdotevijavabelia, judíovi pecujarubivijavabelia ata.

17 Nexata baja Jesús bajarapamonaevecua
pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

*Pacuenia Jesús bijataenuta higueranae piacuai-jibixae yabara pelvaisi
(Mr 11.12-14, 20-26)*

¹⁸ Jesús pijajivi Betania tomarata pebarëmajitsicujinae, meravia pitsijavata, bajayacunua, Jesús pijajivi barëlia icatsia Jerusalén tomarabelia. Jesús nexata namutua penajetarucaejavata, piajani. ¹⁹ Jesús nexata taenuta higueranae namuto muxuneneta. Nexata Jesús imoxoyolia higueranae, pecuai itsa xaina, pexaenexa. Pecuai itsiata apo xainae higueranae. Ëpebaxu saya tsanucae. Bajaraxuata nexata Jesús jumaitsi higueranaejavabelia:

—¡Xamë baja apo nacuaitsimë tsane! jai Jesús.

Bajarapacuenia Jesús pejumaitsijavata, bepijia higueranae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi nayanijoba.

—¿Detsa pacuenia maponae bepijia tēpanajereca? najai.

²¹ Nexata Jesús jumaitsi pijajivijavabelia:

—Xanajanë pacuenia pacatsipaebijitsiatsi. Itsa pajamatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavelia,” itsa pajamatabëjamë tsipae, nexata paxamë ata pacacaëjëpaejitsipa paneexanaenexa pacuenia exanajë mapahigueranaejavabeliaje. Itsiata ëbajarapacuene paneexanaenexa, apo pacacaëjëpae tsipae. Pematatsënëa itsacuenejavanënu paneexanaenexa, pacacaëjëpaejitsipa. Nexata itsa pajumaitsimë tsipae mapatsutojavabelia ataje: “Natixire majotavecuaje. Pucaxanetojavabelia

jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia pacajumecovënëtsipa. ²² Nexata daxitacuene xua pavajëtsianame Diosojavabelia, pasivajamatabëjumaitsimë tsane mapacueniae: “Xua vajëtajé Diosojavabelia, pepacuene Dioso nejumecovënëtsiana,” pasivajamatabëjamë tsane. Nexata xua pavajëtsianame Diosojavabelia, Dioso pacajumecovënëtsiana, jai Jesús pijajivijavabelia.

*Pacuenia Jesús caëjëpatsi daxitacuene pexanaenexa yabara pelivaisi
(Mr 11.27-33; Lc 20.1-8)*

²³ Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijancianovi yajava. Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatemplobopanabovecuaje? jai bajarapamonae Jesúsjavabelia.

²⁴ Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuene. ²⁵ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

Nexata ëpamonae nabarëcuaicuajai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabécueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovénëtsimë Juanpijinë pepaebilivaisi?” nacajai tsipae. ²⁶ “Jivi raja saya pejamatabécueneta Juanpijinë jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabéjumaitsi: “Juanpijinë raja pepacuene Diosojumepaebinëmi,” sivajamatabéjai, najai sacerdotevi, judíovi pijaancianovi yajava.

²⁷ Nexata saya bajarapamonae jumaitsi Jesúsjavabelia:

—Apo payapétaenë ponë Juanpijinë itorobatsi jivi pebautisabaponanexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

Pacuenia Jesús jivi livaisi tsipaeba anijanëbeje pexénatobeje pexainaenë pelivaisicuenia yabara pelivaisi

²⁸ Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaëjétsianame palivaisi aeconoxae pacatsipaebijitsiatsi. Pebi xaina anijanëbeje pexénatobeje. Nexata pexénatojavabelia jumaitsi: “Taxënato, ajena netonacuenebianame tajauvabacabota,” jai pexénatojavabelia.

29 Nexata bajaraponë paxajavabelia jumaitsi: “Jume! ¡Apo jitsipaenë tanacuenebijava! jai. Itsiata xuacujinae bajaraponë icatsia najamatabëxaina. Nexata jamatabëjumaitsi: “Xanë baja rovia pibisiajamatabëcuene najamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë. **30** Bajaraxuacujinae pexënatabeje pexainaenë pona icatsia itsanë pexënatojavabelia. Bajaraponëjavabelia ata jumaitsi: “Taxënato, ajena netonacuenebianame tajauvabacabota,” jai pexënatojavabelia. Nexata jejai itajara pexënato. Itsiata apo ponae. **31** ¿Detsa ponë bajaraponëbejeyajuvënënë paxa jumecovënëta? jai Jesús bajarapamonaejavabelia.

Nexata bajarapamonaejavabelia:
—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaitsi bajarapamonaejavabelia:
—Xaniajanë pacuenia pacatsipaebijitsiatsi. Bajara pijinia itsane pamonaejavabelia copabiana pibisiacuene pexanabiabivami, pamonaejavabelia najamatabëcuene pexanabiabivami, Diosojavabelia. Impuestomatamo gobierno pejamatabëcuene petomatamoyanijobabiabivimi ata jonena Dioso pijanacuayabetsia itsa najamatabëcuene pexanabiabivami, Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabëcuene pexanabiabivamivecua. Itsiata baitsi jane paxamë apo pajonemë tsane.

32 Juanpijinë jivibautisabinë patajopa Dioso pejumelivaisi papecatsipaebinexa panenajamatatabécuene pénéyorotsinexa pibisiacuene paneexanabiabijavavecua. Itsiata paxamë apo pajumecovënëtsimë bajarapalivaisi. Itsiata bajarapalivaisi jumecovënëta impuestomatamo gobierno pejamatabécuene pemamatoyani-jobabiabivi. Petiriavi palata pepitsinexa pevitota pibisiacuene pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatatabécuenepénéyorotsimë panejumecovënëtsinexa Dioso, jai Jesús bajarapamonaejavabelia.

*Pacuenia exana piajamatatabécuenebjejevi, itsanë pijauvabacabo petoevetsivi, yabara pelivaisi
(Mr 12.1-12; Lc 20.9-19)*

33 Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenë pijairata uba ayaibacaboxaneto uvavénëjava. Bajaraxuacujinae pijaira matatoyorotsia, ibopanaxanetonë mataropotsia pefaratsijavata, yacaranata. Bajarapayacaranatsijava athébëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatuajéta exananuta piapiabotsia, penacuaitsimatacabí itsa tonaveretatsi, athébëyo pevetabiabecaenexa pijauvabacabo.

'Nexata bajaraponë itsamonaе evetsiaexana pijauvabacabo. Uvabacabo pexainaenë jumaitsi petoevetsivitsijavabelia: "Pamatocabi cuainaveretsiana, natsicobetsatsianatsi. Patamacabi raja cuainaveretsiana, tajajivitonë itorobiarenajë xua panetotsatsianame tanetopitsinexa," jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona. ³⁴ Itsa baja uvabacabo pexainaenë yapëtane pecopiapatsijava uvacuai penaveretsimatacabì penotsinexa, nexata uvabacabo pexainaenë itoroba pijajivi. Itoroba petoevetsivitsijavabelia petsicobetsatsinexatsi. ³⁵ Nexata uvabacabo pexainaenë pijajivi uvabacabo petoevetsivitsi totaicatsi. Caenë bajarapamonaeyajuvënénë toconibabiatsi. Itsanë pepacuene tobeyaxuabatsi. Itsanë ibotonëta totseconatsi. ³⁶ Nexata uvabacabo pexainaenë icatsia itsabitsaëto pijajivi itorobalia. Bajara icatsia pacuenia exana uvabacabo pevetsivi.

³⁷ 'Nexata uvabacabo pexainaenë itoroba icat-sia pexënato jane baja. Uvabacabo pexainaenë jamatabejumaitsi: "Netoyaiyataena meta taxënato," jamatabejai. ³⁸ Itsiata baitsi jane uvabacabo petoevetsivitsi uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonaе najumaitsi: "Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi. ³⁹ Nexata icatsia uvabacabo pexainaenë pexënato ata tovaetabatsi. Capon-

aliatsi bajarapauvabacabo pënëyabelia. Nexata uvabacabo pexainaenë pexënato ata bajarapacuenia icatsia tobeyaxuabatsi, jai Jesús.

40 Nexata bajarapalivaisi yabarə Jesús yanijoba sacerdotevijavabelia, judíovi pijaancianovijavabelia ata. Jesús jumaitsi:

—Uvabacabo pexainaenë itsa patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaejavabelia.

41 Nexata bajarapamonae jumaitsi Jesúsjavabelia:

—Pijauvabacabo raeta pexainaenë apo itaxutsoniatae tsane. Nexata verebiabiana bajarapamonaemi pibisiacuene pexanaevi. Nexata icatsia itsamonaevi evetsiaexanaena bajarapauvabacabo. Nexata uvacuai penaveretsimatacabı bajarapamonaes itsa nota, tsicobetsatsianatsi pacuenia baja tocaëjëtatsi uvabacabo pexainaenë perajutsinexatsi, jai bajarapamonaes.

42 Nexata Jesús jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabarə. Iboto pelivaisicuenia Dioso pejumelivaisibaxutota jumaitsi xanë yabarə mapacueniaje:

Paiboto itsamonaes boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. Vajatuxanenë Dioso raja exanaena bajarapacuenia. Nexata bitso nacatsita pexaniacuene tsane bajarapacuenia,

jai tajëvelia Dioso pejumelivaisibaxutota xanë yabara.

'Bajarapacuenia tajëvelia Dioso pejume-
livaisibaxutota itsa jumaitsi, paxamë apo
patanejumecovënëtsijavanexamë yabara
jumaitsi. Dioso taneitapetsijava daxitajivi
tacapanepaenexa yabara ata jumaitsi. ⁴³ Nexata
pacuenia uvabacabo pexainaenë icatsia
itsamonaevetsiaexanaena, bajara pijinia
pacuenia Dioso exanaena paxamëjavabelia. Xua
picani Dioso pacaevetsiaexana, copiarucaena.
Nexata juya itsamonaevetsiaexanaena
bajaraxua, pamonae xaniavaetsia jumecovënëta
Dioso pitorobicueniatsi. ⁴⁴ Pamonae apo
nejumecovënëtsi Dioso pexënatocuenenë,
bajarapamonae bitso bejamatabëjiobi tsane apo
tanejumecovënëtsixae. Pacuenia ibotojumata
pefirapecaejiivi, itsa tsapatecatsi, pevixae bitso
yanabejiobita, bajara itsane. Pamonae naneconit-
siaexanaenajë, bajarapamonae pepacuene
naxuabiana daxitamatocabijavabelianexa.
Pacuenia iboto pematacënëbinëtsi apo asaë,
bajara itsane, jai Jesús bajarapamonaejavabelia.

⁴⁵ Sacerdotevi penamatacitorobivi, fariseovi
yajava, itsa jumetane bajarapacuenia Jesús
pejumaitsijava, bajarapamonae jamatabëjumai
tsenae: "Vaxaitsi yabara raeta jumaitsi,"
jamatabëjai tsenae bajarapamonae. ⁴⁶ Nexata
picani bajarapamonae Jesús jamatabëvaetabatsi.
Itsiata bajarapamonae jamatabëjumaitis:
"Bajaraponë jivi tanetsi Diosojumepaebinëcuene.
Nexata nacaitsacueniabijitsipa vaxaitsi itsa
vaetabijitsipatsi maponëje," jamatabëjai tsenae

bajarapamonae.
vaetabitsi.

22

*Pacuenia Jesús jivi livaisi tsipaeba penacasabifesta pexanaenë pelvaisicuenia yabara pelvaisi
(Lc 14.15-24)*

¹⁻² Jesús icatsia livaisi tsipaeba sacerdotevi-javelia, judíovi pijancianovijavelia ata. Bajarapacuenia Jesús tsipaeba bajarapamonae peyapētaenexa pacuenia itsamatacabí itsjitsia, pamatacabí Dioso pijajivi evetsiana. Jesús jumaitsi mapacueniae:

—Pepo nacuaevetsinë fiesta exana pexénato petonacasabifestanexatsi. ³ Nexata nacuaevetsinë jumaitsi pijajivijavelia: “Pamonae baja tajévelia junatajé, patsipaebare baja tanetopatsinexarena fiestanexa jane baja,” jai nacuaevetsinë pijajivijavelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevetsinë pijajivi naviabarena petsipaebinexa pijatuxanenëjavabelia. ⁴ Nexata nacuaevetsinë itsamonae icatsia pijajivi itorobalia pesivaponaenexalia. Nacuaevetsinë jumaitsi pijajivijavelia: “Pajumaitsimë tsane tajunatsivijavelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponaeremelia,’ pajamë tsane tajunatsivijavelia,” jai nacuaevetsinë pijajivijavelia. ⁵ Itsiata baitsi jane bajarapamonae icatsia

sivaponae atalia, nacuaevetsinë pejunatsivi apo jejai. Pejunatsiviyajuvënë itsanë pona pijapabi-anëjavabelia. Itsanë pijinia pona penavijatsinexa.

⁶ Itsamonae nacuaevetsinë pijajivi taicatsi. Bejiobiaexanatsi pibisiacuenia. Beyejebatsi baja belia. ⁷ Bajaraxuata nexata nacuaevetsinë bitso baraanaepana pejunatsivimijavabelia. Nexata nacuaevetsinë itorobalia vajabitsaëvi pebenexa pamonaе tobeyejebatsi pijajivi. Itorobanua pijatomaranëmi ata petotajuitsinexa.

⁸ Bajaraxuacujinae nacuaevetsinë icatsia pijajivijavabelia jumaitsi: “Daxitacuene baja picani veretejebiaexanajë taxënato penacasabifiestanexa. Itsiata baitsi jane tajunatsivimi apo netopatsirena. ⁹ Paponaremilia piniji-callexanetonëjavabelia. Nexata daxita pamonaе pacaxitajarabaponaename bajarapacallex-anetonëjava, pajunataponaename taxënato penacasabifiestajavaberena pepatsinexa,” jai nacuaevetsinë pijajivijavabelia. ¹⁰ Nexata nacuaevetsinë pijajivi ponalia. Najetarubena callexanetonëjava. Junatapona daxita pamonaе caxitajarabapona. Junatapona piaja-matabëcuenebejevi, pejamatabëcuenexanepanævi ata. Nexata bajarapamonaе barëpona fiesta pexanaebojavabelia. Nexata pabota fiesta exana, vënëca jivi.

¹¹ ‘Nexata nacuaevetsinë jonena bajarapabyarena petaenexa petopatsivitsi. Daxita pamonaе topatatsi, jumapata xua banaxataba itsa pona penacasabifiestajavabelia. Nexata nacuaevetsinë taenuta bajarajota itsanë, saicayaviriajava

penaxatatsinë. Apo naxatatsi xua naxataba daxita. ¹² Nexata nacuaevetsinë jumaitsi bajaraponëjavabelia: “¿Detsa xuajitsia najunuame apo nenaxatatsinë pacuenia daxita naxataba penacasabifiestajavaberena penajonevi?” jai nacuaevetsinë. Nexata bajaraponë moya nuca. ¹³ Nexata nacuaevetsinë jumaitsi mesa pevetsivijavabelia: “Maponë pataxucëreje. Pacobecëre yajava. Paxuaremelia bopënëyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevetsinë. ¹⁴ Pacuenia fiesta pexanaenë ayaubitsaëtoxaneto junatsi ata, caejivi yobeje saya topatatsi, bajara pijinia itsi Dioso pejunatsivi ata. Dioso picani ayaubitsaëtoxaneto junata pijajivinexa. Itsiata saya caejivi yobeje jumecovënëtatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabëcueneëjëbiaya yanijobatsi impuestomatamo pemamatotsJAVA yabarapelivaisi

(Mr 12.13-17; Lc 20.20-26)

¹⁵ Fariseovi nacaetuata penabarëcuaicuajainexa. Bajarapamonae najamatabëcuenejëpa Jesúsjavabelia jamatabëcueneëjëbiaya peyanijobinexa. Nexata Jesús bijiaya itsa jumecanaviata, Jesús picani peneconitsinxatsi nacuaevetsinëjavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacueneëjëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcueneëjëbiaya jumaitsi:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame.

17 Panetsipaebare pacuenia najamatabëxainame mapacuene yabaraje. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

18 Itsiata baitsi jane Jesús jamatabëcueneyapëtane bajarapamonae jamatabëcueneëjëbiaya peyanijo-bijavatsi peneconitsinexatsi picani. Nexata Jesús jumaitsi bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame?

19 Panetsitajëre pitsipalatanëyota pamata-motabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. **20** Jesús itsa tane bajarapapalatanëyo, nexata jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

21 Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pi-jinia saicaya Diosojavabelia Dioso pijajava, jai Jesús.

22 Nexata Jesús xaniavaetsia itsa jumecanavita, bajarapamonae jamatabécuenenabenajaca bajarapacuenia Jesús pejumaitsijavata. Nexata baja copatatsi Jesús jamatabécueneëjëbiaya peyanijobijavatsi. Naviaba baja bajarapamonae.

*Pacuenia Jesús tsipaeba jivi petëpaecujinae icatsia
piasaëjavanexa yabara pelivaisi*
(Mr 12.18-27; Lc 20.27-40)

23 Saduceovi saicaya itsalivaisi xaina. Bajarapamonae jamatabécuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniae:

24 —Jesús, Moiséspijinë bajayata vajanacatoy-aquinaelivaisi, jumaitsi mapacueniae: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoy-aquinaelivaisi. **25** Nexata jinavanapa ënacaemonae siete ponëbeje paxanëjavata. Pepo matapijinë copiaya nacojioba. Nexata bajaraponë pijava

vecuatëpa pexi xainaenejeva. Nexata pematiapijinëmi pepénarucaenë pita pematapijinëmi pipjavami. ²⁶ Nexata icatsia bajaraponë ata tēpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajara icatsia ponë ata tēpa pexi xainaenejeva bajarapovajavabelia. Bajarapacuenia tēpa daxita siete ponëmibeje nacaemonaemi, bajarapova pepitaponaevi. Itsiata itsanë ata pexi apo xainae bajarapovajavabelia. ²⁷ Bajaraxuacujinae bajarapova ata tēpa baja. ²⁸ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapamonaeyajuvënëni pijava tsane bajarapova bajarapamatacabi? Daxita pamonae siete ponëmibeje nacaemonae pitapona picani bajarapovami, jai saduceovi Jesúsjavabelia.

²⁹ Nexata Jesús jumaitsi saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemëna pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë.

³⁰ Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojióbinejeva, jinavanapaena athëbëtatsia pacuenia ángelevi jinavanapa. ³¹ Itsa pepacuene paxamë xaniavaetsia paneyanijobame paneyapëtaenexa Dioso icatsia piasaëyaexanaejavanexatsi petëpaevimi,

nexata pacatsipaebianatsi. Paxamë rabaja payapëtaneme pacuenia bajayata Dioso jumaitsi. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapamonae yabara bajayata Dioso jumaitsi Moisëspijinëjavabelia mapacueniae: ³² “Xanë rabaja abaxë Abraham pijadiosonë. Isaac ata pijadiosonë. Jacob ata pijadiosonë,” jai baja cajena Dioso bajayata petëpaevimi yabara. Bajarapacuenia Dioso pejumaitsixae, nayapëtane bajarapamonae bajayata tëpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia, jai Jesús saduceovijavabelia.

³³ Jivi ayaibitsaëtoxaneto itsa jumetane bajarapacuenia Jesús pejumaitsijava saduceovi-javabelia, jivi bitsos jamatabëcuenenabenajaca Jesús petsipaebilivaisi yabara.

*Palivaisi bitsos jivi bejumecovënëta daxita
Dioso pitorobilivaisianë pejumecovënëtsijava
matatoxenetsia yabara pelivaisi*

(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaicuajainexa. Nexata fariseovi najumejaita pacuenia yanijobjitsia Jesúsjavabelia. ³⁵ Nexata fariseoviyajuvënë, judíovi pecujarubinë,

Jesúsjavabelia jamatabëcueneëjëbiaya yanijoba.
Jumaitsi Jesúsjavabelia mapacueniaje:

36 —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

37-38 Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesaéta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia.

39 Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta.

40 Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: "Tajatuxanenë," jai, yabara pelivaisi (Mr 12:35-37; Lc 20:41-44)

41 Fariseovi penacaetuatsijavata, fariseovijavelia Jesús pijacuata nayabarajumaitsi mapacueniaje:

42 —¿Detsa pacuenia pasivanaja-matabëxainaename Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavelia.

Nexata fariseovi jumaitsi Jesúsjavabelia:

—Davidpijinë pemomo tsane, jai.

43 Nexata Jesús jumaitsi fariseovijavelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitsi-java Cristo yabara, Davidpijinë Espíritu Santo pejamatabëcuena tajëvelia jumaitsi mapacueniaje:

44 Dioso jumaitsi tajatuxanenëjavabelia:
“Ecäre abaxë tacujuanenia. Vecatsivajënae jume-covënëtsiaexanaenatsi abaxë copiaya nijava-jabitsaë nitorobicuenianexa,” jai Dioso tajatuxanenëjavabelia,
jai bajayata tajëvelia Davidpijinë mapacueniaje Cristo yabara.

45 ’Nexata Davidpijinë bajayata Cristo yabara: “Tajatuxanenë,” itsa jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavelia fariseovi pecanaëjëtsinexa Cristo Dioso pexënatiocuene.

46 Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxu-acujinae fariseovi, saduceovi ata, cujunava

Jesúsjavabelia baja jamatabëcueneëjëbiaya livaisi peyanijobijava.

23

Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonaे penaneconitsjava Diosojavabelia yabara pelivaisi (Mr 12.38-40; Lc 11.37-54; 20.45-47)

¹ Jesús jumaitsi jivi ayaibitsaëtojavabelia, pijajivi-javabelia ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. ³ Nexata pajumecovënëtsianame daxita pacuenia bajarapamonaе pacatsipaebara. Itsiata baitsi jane pëtsa paexaname pacuenia bajarapamonaе exanavanapa. Tsipaji xua bajarapamonaе pacaitaveta paxamë paneexanaeyaniva, bajaraxua itsiata bajarapamonaе exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebariaba panejumecovënëtsinexa. Pamonaе bajarapacuenia pacatsipaebar, itsanë ata bajarapamonaeyajuvënëne apo jamatabënjinae pexanaenexa bajarapacuenia. ⁵ Daxita xua bajarapamonaе exana, exanabiaba saya jivi petaenexatsi. Bajarapamonaе jamatabëjumai tsabiabi: “Bajaraxua itsa exanaenatsi, jivi nacayaiyataena,” jamatabëjai tsabiabi. Bajarapamonaе pitapata, pecofiata ata, becajonixicuenia pexanaejavaxita

yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonaematatoxenetsia piajumanavaitabénexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa.

⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabibota, jitsipabiaba penaenexa peyaiyataevitsi penaenexa petsinubijavanëta.

⁷ Bajarapamonae bitso jitsipabiaba jivi pebajacobinexatsiyaiyataeya callejava ata. “Patanecujarubinë,” pejaijavatsi ata, bitso jitsipabiaba, jai Jesúsmapacueniaje fariseovi yabara, judíovi pecujarubivi ata yabara.

⁸ Icatsia Jesúsjumaitsi jivi ayaibitsaëtoxanetojavabelia, pijajivijavabelia ata:

—Pëtsa paxamë pajitsipame jivi papecajumaitisinexa paxamëjavabelia: “Patanecujarubinë,” papecajainexa. Tsipaji daxita paxamëbepanacaemonaemë Dioso panejume-covënëtsivixae. Xanë, caenënë Cristonë, athëbëvetsica Dioso taneitorobinëtsica jivitacapanepaenexa, panexainame patacacujarubinënexa.

⁹ Itsanë itsa pacacujaruba, “Axa,” pajamë pëtsa bajaraponëjavabelia. Tsipaji caenë paneaxa paxainame, ponë eca athëbëtatsia.

¹⁰ Pëtsa pajitsipame itsamonaemapecajumaitisinexa: “Jivi pevetsinë,” papecajainexa. Tsipaji xanë, caenënë Cristonë,

patacaevetsinë. ¹¹ Ponë paxamëyajuvënënë pacavecuaayaijamatabëcuenenë, bajaraponë pacayavenonabiaba padaxitamë. ¹² Pajivi daxitajivi matatoxenetsia pijacuata ayaijamatabëcuenejivi natane, bajarapajivi itsamatocabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatocabi daxitajivi matatoxenetsia ayaijamatabëcuenejivi Dioso exanaenatsi, jai Jesús jivi ayaibitsaëtoxanetojavabelia, pijajivijavabelia ata.

¹³ Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pa-fariseovimënu, ayaineconi panatsixainame Diosojavabelia! Pacuenia bo babaupaxatata jivi pejoneyaniva, bajara bepacuenia paxamë paexaname. Itsamonaе jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipaemë panejonenexa Dioso pijanacuayabetsia.

¹⁴ ’¡Paxamë saya jivi paneyamaxëitojorobivi! ¡Paxamë judíovi panecujarubivi, pa-fariseovimënu, ayaineconi panatsixainame Diosojavabelia! Yamaxëitojorobiaya pavecuanotabiabame pamonajivi pevecuatépaevanëtsi pecobecovëjavaximi. Bajaraxuacujinae pini-jicuenia itajara Diosojavabelia pavajécabiabame. Itsiata pepo panexaniajajamatabëcuena apo pavajécabiabimë Diosojavabelia. Bajarapacuenia

pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabì Dioso naneconitsiaexanaena daxita pamonae Dioso apo pejumecovënëtsivi.

15 ’¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Palivaisi pacajinavanapame, caejivi ata panejumecovënëtsiaexanaenexa, papecacuenejëpanexanua, ayaicuenia daxitajava jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcuñeta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infiernojavabelia.

16 ’¡Paxamë apo payapëtae atamë, Dioso pejumelivaisi jamatabëcuñenavëxaniabiaya pacujarubabiabame itsamona! Nexata paxamë panecujarubijamatabëcuñeta bajarapamona pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuñenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena templobo pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi:

‘Catoexanaenatsi pepacuene. Cajumaitsitsi cajena templobopijorojavanë pevënëta,’ jai, bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia,” pajamë tsabiabi jivijavabelia.

17 Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemlobopijorojavanë matatoxenetsia. Bajarapaorojavanë ata yaiyatanetsi. Tsipaji bajarapaorojavanë templobopijorojavanë.

18 Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumeca-panepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi altarvënëjava pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsitsi altarvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniva Diosojavabelia,” pajamë tsabiabinua jivijavabelia.

19 Paneamatabocotajavi, bepaneittatsëcënavanapaevinua panejamatabëëthötota. Biji rajane beyaiyatanetsi altarvënëjava, bajarapaaltarvënëjavajumata pebuatsiofrenda matatoxenetsia. Bajarapaofrenda ata yaiyatanetsi. Tsipaji altarvënëjavajumata boca.

20 Pajivi jumaitsi: “Cajumaitsitsi altarvënëjava pevënëta,” jai, caecuenia yajavavënëjona

bajarapaaltarvënëjavajumata pebocaeofrenda.
21 Pajivi pijinia najumecapanepaeya jumaitsi pejumexaniataenexatsi: “Cajumaitsitsi templobo pevënëta,” jai, caecuenia yajavavënëjona bajarapatemplobota peponaponaenë Dioso.
22 Pajivi pijinia najumecapanepaeya jumaitsi pejumexaniataenexatsi: “Cajumaitsitsi athëbëtatsia panacua pevënëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

23 ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejume-covënëtsinexa. Bajarapalivaisianë picani pacaitoroba itsamonaejavabelia pexaniacuene panetoexanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatatabëcuene copatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia. **24** ¡Paxamë apo payapëtae atamë

Dioso pejumelivaisi, jamatabëcuenenavëxaniabiaya pacujarubabiabame itsamona! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya beveliajamatabëcuenalivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujemata. Nexata panecujarubivi panecujarubicuenia pexanavanapaexae, panecujarubivi ata naneconita Diosojavabelia pacuenia paxamë pananeconitame Diosojavabelia.

25 ¡Paxamë jivi paneyamaxëtojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebijanaejitsipajë Diosojavabelia,” panejamatabëjaitsabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaicuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsata baitsi jane panejamatabëëthétota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajérëtsinexa. Panajamatabëxainabiabamenua panexainaenexa ayaijava ëpaxamënexa. **26** Paxamë pafariseovimë, bepaneitaxutotsëcënaevi panejamatabëëthétota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajara xacujinae xaniavaetsia quiata pejumavelia. Bajara pijinia pacuenia paxamë

ata copiaya Dioso pacajamatabëcuenequiatsi paneajamatabëcuenexuirajibinexa. Nexata bajaraxuacujinae pacajamatabëcuenecaëjëpaena paneexanaenexa ëpexaniacuene pacuenia Dioso pacaitoroba.

27 '¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonaes caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajara apo jitsipaetsi vajajayatsinexa. Bajara pijinia paxamë ata Dioso patsitajamatabëcueneitsimë.
28 Itsamonaes naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëëthétota bëpënëa panajamatabëxainabiabame jivi paneyamaxëitojorobinexa. Itsajava ata pematatsënëa pibisiacuene paneexanaenexa, panajamatabëxainabiabame.

29 '¡Paxamë saya jivi paneyamaxëitojorobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapaprofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapaprofetavimi. Pamonaemi ata bajayata tëpa, pamonaes aneconijibia pejinavanapaevimi Dioso

pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi. ³⁰ Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniae: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatocabi pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemë bajayata pamonaemi beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë. ³² Paxamë ata papibisiajamatabëcuenevixaemë, xanë ata jamatabëpanebeyaxuabame. ¡Panbeyaxuare paneveretsinexa xua panijasalinaivimi taxuxuuba!

³³ ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetarucaejava isoto, bajara paitsimë. Itsiata apo papanepaemë tsane infiernovecu panijaneconi yabara. ³⁴ Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaexanaevitsi. Pacatoitorobianatsinua picani xanë talivaisi papecatsipaebivinexa. Itsiata baitsi jane bajarapamonaeyajuvënëvi itsamonaes pabeyaxuabaponaename. Itsamonaes cruzajavabelia pacobematabiaxuababiabiename. Itsamonaes pajumatitbabeyabiabianame

penaneconitsivi panejumaconitabiabimacata judíovi penacaetuatabiabibonëjava. Itsamonaе pabaraponabiabianame itsa tomaranëjavabelia ata panebejiobiaexanaenexa. ³⁵ Bajarapacuenia nexata paxamë ayaineconi panatsixainaename Diosojavabelia. Daxita pamonaе aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapanconimi yajava paxamë pacatsiju-majopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsamonaе ata, Dioso pitabarata aneconijibia pejinavanapaevimi. Nexata bexëajavaberena ata Berequíaspijkenë pexënatomi, Zacaríaspijkenë, panijasalinaivi beyaxuaba. Zacaríaspijkenëmi panijasalinaivimi beyaxuaba templobopanabota, templobobeje altarvënëjavabeje tuatuajëta. ³⁶ Xaniajanë pacuenia pacatsipaebijitsiatsi. Daxita pamonaemi Dioso pitabarata aneconijibia pejinavana-paevimi, panijasalinaivimi beyaxuababiaba. Bajarapanconimi yajava, paxamë aeconoxae panejinavanapaevi, pacatsijumajopaena Dioso papecananeconitsiaeexanaenexa, jai Jesús judíovi pecujarubivijavabelia, fariseovijavabelianua.

*Pacuenia Jesús najamatabëxainaeya sivanua
Jerusalén tomarapijivi yabara pelivaisi
(Lc 13.34-35)*

³⁷ Jesús najamatabëxainaeya sivanua Jerusalén

tomarapijivi. Jumaitsi pesivanuejavata mapacueniaje:

—¡PaJerusalén tomarapijivimë, pabeyabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiyabajë patacaetuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena!

³⁸ Panejumetaema. Dioso rabaja pacacopata papecaevetabiabijavami. Nexata baja panijatempllobota Dioso apo ponaponae. ³⁹ Xaniajanë pacuenia pacatsipaebijitsiatsi. Paxamë rabaja apo panetaemë tsane matavëjëa. Matapania itsa panejumecovënëtsianame Cristonëcuenenë, Dioso taneitorobinëtsica, icatsia panetaename. Itsa panesivajamatatabëjumaitsimënu tsane: “Dioso, bitso yavenonare maponë najetarucaje, nejamatabëcueneta penajetarucaenë,” itsa panesivajamatatabëjamë tsane xanë yabara, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

24

Pacuenia Jesús pijajivi tajëvelia tsipaeba itsamat-acabi itsanacuapijivi templobo pexuabijavanexatsica yabara pelivaisi

(Mr 13.1-2; Lc 21.5-6)

1 Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenë, templobo nataema pemuxuneneta penaiboxanetonë ata, jai.

2 Nexata Jesús tajëvelia vajunupaeba itsamatacabi itsanacuapijivi bajarapaboxanetonëmi pepenetsijavanexatsica. Jesús jumaitsi pijajivijavabelia mapacueniae:

—Xaniajanë pacuenia pacatsipaebijitsatsi. Daxita raja paboxanetonë pataneme, bajara-paboxanetonëmi itsamatacabí itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsaiboto ata pejumavereca apo bocae tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanéjava ata, mapanacua pecopiaru-caevajénaeje yabara pelivaisi

(*Mr 13.3-23; Lc 21.7-24; Lc 17.22-24*)

3 Jesús eca petsutojumata, patsutojumata olivonaenë apaaxayyo. Jesús itsa eca petsutojumata, nexata pijajivi pijaepratojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsi-paebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaejitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa.

⁵ Tsipaji raja peyamaxëitojorobivinexa, ayaubitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaubitsaëto yamaxëitojorobiana.

⁶ Vajabitsaë pexanaejava imoxoyonacuanëjava, tajënacuanëjava ata, pavënélivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabí mapanacuaje abaxë apo vereverecajuni tsane. ⁷ Mapanacuaje pevereverecaevajënaeje peneta copiaya itsaviravi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitanecuene ata najetarucaena itsanacuanëjava. Ira najëabiana ayaicuenia itsanacuanëjava.

⁸ Daxita bajarapacuene itsa pataename, saya abaxë taxuxuabaponaena piayaicuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacaponaena nacuaevertsivijavabelia papecabejiobiaexanaenexa. Nexata pacabeyejebiana. Daxitanacuanëpijivi

pacaitoya tsabiaibi tsane patajajivixaemë.
10 Nexata bajarapamatacabita jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacanajetsiana nacuaevetsivi pecobeyabelia.
11 Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDiosojumelivaisipae-bivicuenia tsipaebaponaena. Bajarapamonaе yamaxëitojorobiana jivi ayaibitsaëtoxaneto. **12** Jivi pibisiacuene pexanavanapaevi, pevajënaeyabelia ayaibitsaëtoxaneto tsaponae tsane. Nexata ayaibitsaëto Dioso pejumecovënëtsivi, namataenetsia penaasivajava vereverecaponaena.
13 Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa, bajarapajivi Dioso capanepaenatsi. **14** Itsamonaе daxita nacuanëjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanelia. Bajaraxuacujinae jane baja mapanacua vereverecaenaje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

15-16 Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniae:

—Diosojumepaebinëmi profeta Danielpijinë piayaicuene tajëvelia pevajunupaebilivaisi bajayata yaquina. Xua panijatomaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.)

Nexata paxamë itsa pataename bajarapapiayaicuene penucaejava templobota, nexata Judea nacuata pejinavanapaevi pëtsa nubena. Naxanitsiayo rëcépecaena petsutonëjavabelia.

¹⁷ Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica, bepijia najetabajiraviana. Pëtsa joneya pijaboyalia pejutsinexa pecobecovë. ¹⁸ Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyalia pejutsinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacab! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacab! ²⁰ Bajaraxuata tajëvelia Diosojavabelia pavajëcare piayapëbejematacabita papecatocopiatsiyaniva bajarapapiayaicuene. Nexata pamatacabí parëcépecaename, pexaniamatacabí Dioso pacatocopatsiana bitso nabejiobitsiaya paneponaeyaniva. Pavajëcarenuá penacueraevetsimatacabita bajarapapiayaicuene papecatocopiatsiyaniva, nexata papecatoayapëbejeyaniva. ²¹ Tsipaji raja bajarapamatacabí bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonaé bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua

yatuucutsiana jivi bitso nabejiobitsiaya pejinavanapaematacabianëminexa bitso jivi nabejiobitsia pejinavanapaeyaniva. Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabí copiapatsijitsia mapanacuataje.

23 Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nuaje,” itsa pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtame. **24** Itsamonaë jumai tsane: “Xanë raja Cristonë,” jai tsane. Itsiata jemajai tsane. Itsamonaë jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonaë yamaxëitojorobaponaenatsi. Itsiata pamonaë pepacuene Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. **25** Tajëvelia rabaja maje pacatsipaebatsije. **26** Nexata itsamonaë itsa pacajumai tsane:

“Cristo raja ponapona petusato nacuatalia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapäenÿyatuuucutsibotaje. Naxanitsia. Panataename,” itsa pacajai tsane, pëtsa pajumecovënétame. ²⁷ Payapétaneme rabaja mapacueneje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabí patsianicajë xanë, Daxitajivi Pematapijinënë. ²⁸ Payapétaneme rabaja mapacuene ataje. Quequeremonae bepijia bayapétane itsajota petuxutsaebinë boca. Nexata bajarajota bepijia banacaetuana. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuanena xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navajunupaeba itsamatacabí icatsia pepatsijavanexatsica. Jesús jumaitsi pijajivijavabelia mapacueniae:

—Xanë tapatsivajënaetsica jivi taena pecujunaviciene. Jivi nabejobitsiaya jinavanapaena. Nexata jivi nabejobitsiaya pejinavanapaematacabicujinae, matacabipijujuameto aitaquiri tsane. Meravipijijuameto

ata aitaquiri tsane. Tulupu ata othopaenica irabetsica. Daxitacuene, xua rubena athëbëtsia, najëabiana. Xaniavaetsia apo rubenae tsane. ³⁰ Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarérëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë. ³¹ Bajaraxuacujinae trompeta itsa najumetsiana ayajumeta, itorobianajë tajaángalevi. Angelevi daxitanacuanëjavaverena xanëjavaberena netocaetuatsiana tajajivi, pamonae Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabí icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabí itsijitsia mapanacuataje. Jesús jumaitsi pijajivijavabelia mapacueniae:

—Pacanaëjëre pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica. ³⁴ Xaniajanë pacuenia pacatsipaebijitsiatsi. Pitsijamatatabëcuenevi aeconoxae mapamatacabitaje jinavanapa, bajarapitsijamatatabëcuenevi abaxë, bexëajavabelia ata, apo vereverecae tsane. Matapania

xua tajëvelia vajunupaebajë itsa baja copiapatsiana, bajarapamonae jane baja vereverecaena. ³⁵ “Itaboxo, ira yajava, tsitecaena daxitamatocabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsiitsia daxita xua tajëvelia vajunupaebajë. Athëbëpíjivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatocabi itsiitsia mapanacuataje.

³⁷ Jesús icatsia tajëvelia navajunupaeba itsamatocabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabí Noépíjinë ponapona, bajara icatsia jemata itsane pamatacabí xanë, Daxitajivi Pematapíjinënë, pat-sianicajë. ³⁸ Pamatacabí Noépíjinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojobinexatsi. Bajarapamonae jamatejema saya jinavanapa. Nexata bajarapamatacabí Noépíjinë

ëpijamona pinijibarcoxanetojavabelia barëjunua.
39 Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemax-aneto itsa jopa ira pebubutsinexa, yapëtane jane baja. Bajarapamatocabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanex-atsica, jemata patsianicajë. **40** Nexata bajarapamatocabita anijanëbeje najuanacuenebanucaen-abeje pabita. Itsanë tanejumecovënëtsinë tsane. Itsanë apo tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. **41** Bajara pijinia itsane petirivabeje ata. Najuacuabanu-caenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

42 Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. **43** Pacanaëjëre mapacueneje. Bo pexainaenë itsa yapëtaejitsipa paepatota meravi pijaboyerberena patsijitsia pecobe-covë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyerberena petojoneyanivatsi penacobetoxotsinënexa. **44** Bajara pijinia pacuenia paxamë ata najamatabëcunexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica,

jemata icatsia patsianicajë, jai Jesùs pijajivijavabelia tajévelia penavajunupaebijavata itsamatacabì icatsia pepatsijavanexatsica.

Pacuenia Jesùs pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi

(Lc 12.41-48)

⁴⁵ Jesùs livaisi tsipaeba pijajivijavabelia petuxanenë pijajivitonëbeje pelivaisicuenia. Bajara-pacuenia pijajivijavabelia tsipaeba copiaevertsaya petonacuenebavanapaenexatsi icatsia pepatsimatacabitsicajavabelianexa. Jesùs jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatatabëcueneitsi tsaneje. Bajaraponë itsajamatatabëcuene xainaenejeva, copiaevertaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta toevetaponaponaena piabatabiabinexa pexaejava caematacabì canacujitsia pacuenia pijatuxanenë itorobatsi. ⁴⁶ Bajaraponë bitso barëya tsane pamatacabì pijatuxanenë patsiana, xaniavaetsia pijajivi petoeveraponaexae pecovëta. ⁴⁷ Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. ⁴⁸ Itsa bajaraponë piamatatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucae tsane bajayajebi,” jamatabëjai

tsipae. ⁴⁹ Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipanua piaitajibivita. ⁵⁰ Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. ⁵¹ Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bajarapacuenia Jesús tsipaeba pijajivi xanavaetsia pecopiaevetavanapaenexatsi Jesús icat-sia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitsi pijajivijavabelia:
—Pamatocabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonaе tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bajarapacuenie yabara pacatsipaebianatsi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje

pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bajarajota vajënaeevetsijitsia pepatsijava penacasabinënexa. Nexata itsa ponabeje penacasabijivibenexa, bajarapapejanavi penaponaenexa bajara-pajivibeje pepëta penacasabifiestajavabelia.

2-4 Bajarapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicapona itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tsicapona.

5 Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava.

Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita.

6 Bajaraxuacujinae ayaimeravi tuatuajëta jumetane pevavajaijava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejaijava jumetane.

7 Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana.

8 Nexata papetiriavi apo tsicapona aceiteranë, jumaitsi aceiteranë petsicaponaevijavabelia mapacue-

niaje: “Panenarajure tsiquirijavaxi aceiteraxi. Tspaji patajalámparabëxi panetoitacaëcaënapona,” jai bajarapamona. ⁹ Itsiata aceiteranë petsicaponaevi jumaitsi: “Jume. Apo caëjëpae. Paxanë ata meta apo panetocaëjëpae tsipae. Paponaremilia. Panijacuata pacomuare itsajotalia canajetabiaba aceiteranë,” jai aceiteranë petsicaponaevi pijalámparabëxinexa. ¹⁰ Nexata papetiriavi aceiteranë apo tsicaponaevi pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicaponaevi pijalámparabëxinexa, napona baja penacasabifiestanexa pexanaebojavabelia. Pejonecujinaelia baupaxatata. ¹¹ Bajaraxuacujinae aceiteranëevi pijalámparabëxi petsicomuacaevi pata. Nexata bajarapapetiriavi jumaitsi penacasabinënexajavabelia: “¡Panetobaupare! ¡Panetobaupare! jai tsanubena bojumavelia. ¹² Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicaponaevi pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaevetavana-paename. Tspaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

*Pacuenia Jesú斯 pijajivi livaisi tsipaeba pijapalata pijajivi pevetsiaexanaenë pelivaisicuenia yabara pelivaisi
(Lc 19.11-27)*

14 Jesú斯 icatsia jumaitsi pijajivijavabelia:

—Tacovëta patajajivimë, itsamonaе ata, pamonaе tajajivi, panetonacuenebianame. Nexata pamatacabì icatsia patsianicajë, pacuenia pacasivanajamatabëxainaеjitsiatsi, aeconoxae pacatsipaebianatsi. Pacatsipaebianatsi comparaciòn cuenia mapacueniaje. Petuxanenë itsa ponaejitsia tajënacuayabelia, junata pijajivi. Evetsiaexana pijapalata petoevetsinexatsi pecovëta.

15 Caenë canacujitsia evetsiaexanapona peto-canacuenebinexatsi pecovëta pacuenia bajarapamonaе caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuayabelia.

16 Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacinco mil ponëbeje. Nexata baja daxitata diez mil ponëbeje caejavata. **17** Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. **18** Itsiata baitsi jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëthëteta irata.

19 Bexëa nexata najetaruca petuxanenë. Junata pijajivi peyapëtaenexa pacuenia tovetatsi pecovëta pijapalata. **20** Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia: “Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacincos mil ponëbeje, xua nacanabajë bajarapapalatata,” jai bajaraponë pijatuxanenëjavabelia. **21** Nexata petuxanenë jumaitsi: “Xanepana rabaja. Xaniavaetsia netoeventaponapona. Itsajamatatabëcuene apo najamatatabëxainaem. Tsiquirijavayo ata xaniavaetsia netoeventame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. **22** Bajara xauacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalatata,” jai bajaraponë pijatuxanenëjavabelia. **23** Nexata petuxanenë jumaitsi: “Xanepana rabaja. Xaniavaetsia netoeventaponapona. Itsajamatatabëcuene apo najamatatabëxainaem. Tsiquirijavayo ata xaniavaetsia netoeventame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena

barëyaya neponaponaenexa xanëjavata,” jai petuxanenë pijajivitonëjavabelia. ²⁴ Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia: “Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubiaexanabiabijava nexata bajarapamonae pejamatabëcuena ayaijava palata pecatopitsapaenexa. Bajara pijinia pacuenia xanë ata nevecuapitsipame xua nacanabijitsipajë nijapalatata itsa canacuenebijitsipajë. ²⁵ Bajaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije,” jai bajaraponë pijatuxanenëjavabelia. ²⁶ Nexata petuxanenë jumaitsi: “Tajajivitonë atamë, itsiata ajamatabëcuenebejemë. Afaetabimënu. Xamë baja cajena yapëtaneme tajajivi taubiaexanabiabijava, taubiaexanabiabijava nexata bajarapamonae pejamatabëcuena ayaijava palata tanetopitsapaenexa. ²⁷ Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabëcuene netocanaviatsipa tajapalata pematatsënëa,” jai petuxanenë pijajivitonëjavabelia.

²⁸ Nexata petuxanenë jumaitsi bajarajota penubenaevijavabelia: “Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tsipaji bajaraponë caëjëpatsi tanetoevetsinexa pematatsënëa. ²⁹ Tsipaji pajivi ayaijava

baja xaina, pematatsënëa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponë tajajivitonëje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae," jai petuxanenë, jai Jesús comparacióncuenia pijajivijavabelia.

Bajarapacuenia Jesús jumaitsi pamonae pijaneconi pexainaevi Jesús penaneconitsiaeexanaenexa pamatacabi icatsia patsianica.

*Pacuenia Dioso naneconitsiaeexanaena
pijaneconi pexainaevi yabara pelvai*

³¹ Jesús tajévelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinënë, icatsia itsa najetarucaenajë daxitanacula taevertsinexa, ángelevi nematatoyoronaeya yajavanajetarucaenajë. Nexata ecaenajë tajapenivenivenaetronovënëjavata. ³²⁻³³ Nexata daxitanacuanëpijivi caetuatsianatsi taitabarata. Tsataponaenajë bajarapamona. Oveja pevetsinë ovejavecua chivo saicaya tsatapona. Nexata oveja pevetsinë petsavenonenia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanë tsataponaenajë Dioso apo pejumecovënëtsivi, Dioso pejumecovënëtsivivecu. Dioso apo pejumecovënëtsivi tatsavenonenia

nubenaeyaexanaenajë. Dioso pijinia pejume-covënëtsivi tacujuanenia nubenaeyaexanaenajë.

³⁴ Nexata jumaitsinë tsane tacujuanenia penubenaevijavabelia, Dioso pejumecovënëtsivi: “Naxanitsia. Paxamë taxa papecaitaxutotsoniataevi. Payajavajinavanapaename taxa pijanacuatatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabiabibota, papatame patanetaenexamë,” janë tsane tacujuanenia penubenaevijavabelia.

³⁷ Nexata bajarapamonae nejumai tsane: “Tajatuxanenë, ¿detsa pacujinae niajanijavata patajacarajutsi nexaejava?” nejai tsane. ¿Detsa pacujinae mera nejitsipaejavata patajacarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinë patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajacarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanë

jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

⁴¹ ’Nexata tatsavenonenia penubenaevi, Dioso apo pejumecovënëtsivijavabelia, jumaitsinë tsane: “Panèvecuanatsare panijaneconi paneyajavajinavanapaevi. Paponaremilia apo pevereverecaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. ⁴² Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. ⁴³ Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenonenia penubenaevijavabelia. ⁴⁴ Nexata bajarapamonaе pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata

nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponaenë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponaenë patacataenexa?” nejai tsane bajarapamona. ⁴⁵ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia. ⁴⁶ Bajaraxuacujinae bajarapamona ponaena penaneconitsajinavanapaenexa daxitamatacabijavabelianexa. Pamona Dioso pejume covënëtsivi, bajarapamona Dioso rajutsianatsi matacabí apo pevereverecaejava, jai Jesús pijajivijavabelia tajëvelia penavajunupaebijavata itsamatacabí penaneconitsaexanaejavanexa pijaneconi pexainaevi, pamatacabí icatsia patsianica.

26

*Pacuenia picani Jesús pijavajabitsaë
jamatabëvaetabatsiyabara pelivaisi
(Mr 14.1-2; Lc 22.1-2; Jn 11.45-53)*

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamona cruzajavabelia

pecobematabiabarutsijavanexatsi. Jesús jumaitsi pijajivijavabelia mapacueniaje:

² —Payapétaneme rabaja anijamatacabibeje pesajinaejava pejonenexa baja pascuavénëfiesta. Nexata xanë, Daxitajivi Pematapijinënë, necanajetsiana itsamonaec pecobeyabelia tanecobematabiabarutsinexa cruzajavabelia, jai Jesús pijajivijavabelia tajévelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinua. Nacaetuata judíovi pijancianovinua. Daxita bajarapamonae nacaetuata Caifásvénënë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penajumetsënëtsilivaisita picani Jesús jamatabévaetabatsi pebeyaxuabinexatsi. ⁵ Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitSacueniabiyaniva, najai daxita bajarapamonae.

*Pacuenia Jesús petiriva tsimataepanatsi petuxujuviaceitera yabara pelivaisi
(Mr 14:3-9; Jn 12:1-8)*

⁶ Jesús ponapona Betania tomarata, Simón pijabota. Simón bajayajebi bitso peperabétsabanaenëmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabéta pejeaceitera. Bajarapora bitso penamatamotsira. Nexata Jesús

penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús petsimataepanae-javatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivi-javabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ¹¹ Daxitamatocabi raja bepejiobivi jinavanapa itsaxuayo pajinavana-pame. Itsiata baitsi jane xanë daxitamatocabi apo ponaponaenë tsane paxamëjavata. ¹² Itsamona petëpaejivi batsiperabëepana petuxujuviateitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviateitera, abaxë apo tëpae atanë. Nexata baja bajarapova neperabëxaniavaeta itsamona tanemëthëtsivajënae. ¹³ Xaniajanë pacuenia pacatsipaebijitsatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

*Pacuenia Judas Jesús yajumejailia pijavajabit-saë pecobeyabelia pecanajetsinexa yabara pelivaisi
(Mr 14.10-11; Lc 22.3-6)*

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi.
¹⁵ Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barënabane pijajivi pecopiarutsinabani baja pebeyaxuabivajénaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judíovi baxane levadurata matajérëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponaenajë patacamitsaexanaenexa, xua jivi baxane pascua fiestamatacabí, nexaenexa? jai Jesús pijajivi.

¹⁸ Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainaenëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatocabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatocabi daxita Jesús pijajivi pebarëxaenexa, Jesús pijajivi exana jane baja.

²⁰ Nexata baja ajena meraviyotsia, Jesús pijajivi, doce ponëbeje, barëeca mesa muxuneneta.

²¹ Nexata pexaeyenaejavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponaе Jesús pijajivi.

²³ Nexata Jesús jumaitsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia.

²⁴ Xanë, Daxitajivi Pematapijinënë, tēpaenajë

pacuenia baja cajena xanë yabara Dioso pejumelivaisibaxutota tajëvelia jumaitsi. Itsata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

²⁶ Pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarpapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. ²⁸ Tsipaji tajana othopaena jivi ayaubitsaëtoxaneto pibisiacuene pexanaeneconi pevecuaajibiaexanaenexatsi. Nexata tatëpaejava

pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁹ Xaniajanë pacuenia pacatsipaebijitsatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatsia, jai Jesùs pijajivijavabelia penavajunupaebijavata pebeyaxuabijavanexatsi.

Pacuenia Jesùs tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi

(Mr 14.26-31; Lc 22.31-34; Jn 13.36-38)

³⁰ Jesùs pijajivi barënaçëana Diosojumevajianë. Bajaraxuacujinae Jesùs pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesùs jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovezabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaënë tsane. Nexata

paxamë panevajënaeyabelia, copiata ponaenajë Galilea nacuayabelia, jai Jesús pijajivijavabelia.

33 Nexata Pedro jumaitsi Jesúsjavabelia:

—Daxita mapamonaaje caxubarëcëpecae ata tsane, xanë cajena apo caxuabatabajiravi tsanetsi, jai Pedro.

34 Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, vacara pe- fiabivajënaeya, nayavajunuaxainaename tajajivitonëcuñemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

35 Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nija- jivitonëcuñenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia
Getsemanívënëjavata yabara pelivaisi*

(Mr 14.32-42; Lc 22.39-46)

36 Jesús pijajivi pecunuameravita yajavapata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

37 Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatatabëxëyoje. Pedro, Santiago, Juan, bajaramatatabëxëyo. Santiago beje Juan beje Zebedeo

pexënatabeje. Bajaraxuacujinae Jesús bitso naja-matabëxaina. Nexata bejamatabëjibireca.

38 Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatobëxainaevaya, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

39 Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajiobicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenecua. Itsiata xanë apo tajitsipaecuene ata, pacuenia xamë jiitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

40 Bajaraxuacujinae Jesús naviarena acueyabi ponëbeje pijajivijavaberena. Caxitaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caeepatoyo ata paneaitavatsenaenexa?

41 Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsipaji raja dovathi pacajamatobëcuenëejëbiana. Paxamë picani panejamatabëcueneta pexaniacuene

jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

42 Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajiobicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

43 Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. **44** Nexata abaxë bajarapamonae pemajitanubenaejavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. **45** Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsiitsia pibisiacuene pexanaevi pecobeyabelia. **46** Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavabajitsaë yabara pelivaisi

(Mr 14.43-50; Lc 22.47-53; Jn 18.2-11)

47 Jesús pijavajabitsaë pevaetabijavatanexatsi, cuaicuajai tsanucae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëtoxaneto. Bajara-pamonaeyajuvënëvi itsamonaes canajetarubena espadanë. Itsamonaes canajetarubena naebonë yajava. Bajrapamonaes itorobatsi sacerdotevi penamatacaitorobivi, judíovi pijaancianovinua.

48 Judas pebarërenavajënae bajarapamonaes, copiaya baja cajena Judas tsipaeba pacuenia bajarapamonaes yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevijavabelia pebarërenavajënae.

49 Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesúscuene. **50** Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtsati xaniavaetsia pecaponaenexatsi.

51 Bajarajota Jesús pijajiviyajuvënënë pijaespada navemarajonotaxuabina. Muxuyoropaebi-axuaba sacerdotevi pepo penamatacaitorobinë pijajivitonë. **52** Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonae namaxëvanita espadata, daxita bajarapamonae juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica, nexata tavajëtsiepatota netoitorobijitsipaica bitso ayaibitsaëtoxanetonë ángelevi. ⁵⁴ Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsipae pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. Xanë caematacabí canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatocabi apo panevaetabimë. ⁵⁶ Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata Jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús tajëvelia jumaitsi pijajivijavabelia.

*Pacuenia Jesús nutatsi judíovi penamatacaitorobivi pitabarata yabara pelivaisi
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetuana judíovi pecujarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonae pecovëya tajyo najetaruca. Sacerdotevi pepo penamatacaitorobinë pijabo matatoyerotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

⁵⁹ Nexata bajarapabo ënëtuuatujëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuacuajai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najaitsapoñae.

Itsiata bajarapamonae apo caxitajarabi itsaneconi ata, Jesús pijaneconi. Najuventsenëtsiaya picani peneconitsilivaisinexa, jaita penajumetsenëtsilivaisita picani Jesús pebeyaxuabinexatsi. ⁶⁰ Ayaubitsaëto pata

penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

⁶¹ Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatemplobo. Necaëjëpanua acueyabi matacabita icatsia taveretetsinexa itsabo,” jai maponëje, jaibeje bajaraponëbeje Jesús yabara.

⁶² Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsibeje? jai sacerdotevi pepo penamatacaitorobinë.

⁶³ Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinexamë nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexénatomë? jai.

⁶⁴ Nexata Jesús jumaitsi:

—Jäjä, xanë rabaja pacuenia nejumaitsimë. Nexata icatsia pacajumaitsitsi. Paxamë raja panetaename xanë, Daxitajivi Pematapijinënë, taecajava Dioso pecujuanenia, daxitajamatatabëcuene

pecaëjëpaenëtsi. Panetaenamenua tanajetarucae-
java athëbëvetsica itarërëbota, jai Jesús.

⁶⁵ Bajarapacuenia Jesús pejumaitsijava itsa jumetane, sacerdotevi pepo penamata-
caitorobinë penaxatatsijava anaeya titinaxuaba.
Bajarapacuenia titinaxuaba pianaepanaexae
Jesús pejumaitsijava yabara. Nexata sacerdotevi
pepo penamatacaitorobinë jumaitsi daxita
penacaetuatsivijavabelia:

—Mara ponë Dioso apo pejitsipaecuenia cuaicuajaije. Dioso bepexënato nataeya cuaicuajai. Pijacuata rabaja naneconita bajarapacuenia pecuaicuajiaxae. Pematatsënëa
baja apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi. Paxamë rabaja pajumetaneme maponëje Dioso apo pejitsipaecuenia pecuaicuajaijava. ⁶⁶ ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquinbabeponatsi pecobethaitonëta. Itsamonae itabarapacabiaxu-
ababiabatsi. ⁶⁸ Nexata bajarapamonae jumai tsaponae Jesúsjavabelia:

—¡Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa,

nexata vënëjonare ponë caitabarapacabiaxuaba!
jai tsaponae bajarapamonae.

Pacuenia Pedro nayavajunuaxaina Jesús pijajivitonëcuene yabara pelivaisi

(*Mr 14.66-72; Lc 22.56-62; Jn 18.15-18, 25-27*)

69 Itsa abaxë Jesús sacerdotevi pepo penamata-caitorobinë pijabo ènëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro cujirenatsi. Bajarapova jumaitsi Pedrojavabelia:

—Xamë ata rabaja naponaponame Jesústa, Galilea nacuapijinëta, jai.

70 Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

71 Sacerdotevi pepo penamatacaitorobinë pijabo matatoyorotsia yacaranata ibopanaxane-tonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

72 Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsitsi. Apo yapëtaenë cajena bajaraponë, jai.

⁷³ Bajaraxuacujinae icatsia, caeepatoyocujinae, bajarajota penubenaevi cujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënénemë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. ⁷⁵ Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniae: “Ajena rabaja, pameravi, vacara pefiabivajënaeya, nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi

(Mr 15.1; Lc 23.1-2; Jn 18.28-32)

¹ Ajena baja matacabi tsarucapona, sacerdotevi penamatacitorobivi, judíovi

pijaancianovi yajava, najamatatabëjëpa pacuenia exanaejitsia Jesús pebeyaxuabiaexanaenexatsi.
² Nexata Jesús cobecëtsiaya caponaliatsi nacuaevetsinë Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. ⁴ Judas jumaitsi bajarapamonaejavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucämaëtoxanetota, athëbëvetsica jirevica irabetsica penacuibosi catarërëtajarabaxuabinexa. Bajarapacuenia pijacuata Judas nabeyaxuaba.

6 Nexata sacerdotevi penamatacaitorobivi caetuata Judas piothotajarabetsipalatanëanë. Naju-maitisi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabécueneta jivitonë beyaxuabijitsiatsi, najai bajarapamonae.

7 Nexata bajarapamonae najamatabejépa bajarapapalatanëanëta pecamuatsinexa ira. Nexata bajarapamonae bajarapapalatanëanëta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa tēpa Jerusalén tomarata, bajarapairata peméthetabiabinexa.

8 Bajaraxuata mapamatacabijavaberena ataje vénéruba bajarapaira mapejumaitsivénëje: “Papalata pejamatabécueneta jivitonë beyaxuabatsi, bajarapapalata pecamuatsiira,” pejaivënë vénéruba. **9** Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremíaspiginë bajayata tajévelia vajunupaeba bajarapapalata. Profeta Jeremíaspiginë baja cajena bajarapapalata yabara tajévelia jumaitsi mapacueniaje: “Israelnacua pevetsivi rajutsiana jivitonë pecanajetsinëjavabelia treinta ponëbeje, pepo platananitota pexanaenëanë. Bajarapapalatanëanë icatsia bajarapamonae pitsiana.

10 Nexata bajarapapalatanëanëta bajarapamonae comuatsiana canalitonë pefaratabiabinë pijairami, pacuenia Dioso tajévelia nejumaitsi,” jai bajayata profeta

Jeremíaspijinë tajévelia pevajunupaebijavata Jesús pemamatopitsipalatanexatsi.

Pacuenia Jesús nutatsi Pilato pitabarata yabara pelivaisi

(*Mr 15.2-5; Lc 23.3-5; Jn 18.33-38*)

¹¹ Jesús nutatsi nacuaevetsinë Pilato pitabarata. Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai Pilato.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemë tsaja pacuenia mapamonaе caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapëtae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxu-abinexatsi yabara pelivaisi

(*Mr 15.6-20; Lc 23.13-25; Jn 18.38-19.16*)

¹⁵ Nacuaevetsinë Pilato xaina pijacujirucuene. Caevai canacujitsia, pascua fiestamatocabi, Pilato copatabiaba caenë penaneconitsinë pepitsapaenexa penaneconitsivi pejebabi-abibovecua. Pajivi yabara jivi vajétabiaba Pilatojavabelia, bajarapajivi Pilato copatabiaba pascua fiestamatocabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ¹⁶ Pamatacabí Jesús

naneconitsiaexanatsi, bajarapamatocabi penaneconitsivi pejebabiabibota naneconitsi-aponapona jivibenë, Barrabásvënëñë. Bajaraponë bitso piacujirubejenëcuene yapëtanetsi daxitajivi.

17 Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponë pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponë yabara jivi jumaitsi: “Cristo raja athëbëvetsica Dioso pitorobinëtsitsica jivi pecapanepaenexa,” jaitsi? jai Pilato bajarapamonaejavabelia.

18 Pilato jamatabëjumaisi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabëjai.

19 Pilato abaxë eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsirena mapacueniaje: “Copare bajaraponë, ponë itsacueneneconiyo ata apo penaneconitsinë. Ajena raja, meravi, amajitsinaebejenë bajaraponë yabara,” jaitsirena Pilato pijava. Nexata picani Pilato jamatabëcopata Jesús.

20 Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxuabinexatsi, jai tsaponae bajarapamonae.

21 Nexata nacuaevetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapit-sapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

22 Pilato nexata jumaitsi bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

23 Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajë cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsapona.

24 Pilato tane piajumesaëjava bajarapamonae. Muxujobi ata, apo jumecovënëtsitsi. Bitsoyo biji caranata bajarapamonae jamatabënanaecajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapëtaenexa Jesúس apo

penaneconitsiaexanaecuene. Pilato jumaitsi bajarapamonaejavabelia:

—Xanë raja tajamatatabëcueneta apo beyaxuabi-aexanaenë tsane maponëje, pianeconijibinë. Paxamë panejamatabëcueneta pabeyaxuobiaexanaename, jai Pilato.

25 Nexata daxita bajarapamonae jumaitsi:

—;Itsа bajaraponë pianeconijibinë Diosojavabelia, nexata bajaraponë patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

26 Nexata baja Pilato tocopata Barrabás pepitsapaenexa penaneconitsivi pejebabiabi-bovecua. Itorobanua vajabitsaëvi ayaicuenia Jesús pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

27 Nexata baja Pilato pijajivi, vajabitsaëvi, Jesús caponaliatsi nacuaevertsinë Pilato pijaboxaneto-javabelia. Nexata bajarajota Jesús matatoyorotsia nacaetuatsatsi daxita vajabitsaëvi. **28** Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobiajava benacuaevertsinëcuenia petaenexatsi. **29** Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoro to Jesús mataxatatsi. Tsicoberutatsinua naebo pecujuanenia benacuaevertsinëcuenia petaenexatsi. Nexata bepeyaiyataecueniatsi bajarapamonae pematabacabëta tonubenatsi

Jesús pitabarata. Quenetsiataeya jumai tsaponaetsi:

—¡Bajaco, judíovi pepo pevetsinë! jai tsaponaetsi bajarapamonae.

30 Suabaponatsi. Vecuapitatsi naebo. Bajarapanaebota mataconitajarababiabatsi.
31 Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesú斯 baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesú斯 cruzajavabelia cobematabiabarutatsiyabara pelivaisi

(*Mr 15.21-32; Lc 23.26-43; Jn 19.17-27*)

32 Vajabitsaëvi Jesú斯 itsa caponaliatsi tomaravecua, namutota caxitaraba Simónvënëñé, Cirene tomarapijinë. Nexata vajabitsaëvi Simón itorobatsi, pacruzajavabelia Jesú斯 cobematabiabarutsijitsiatsi, peyavenonaeyacponaenexa.

33 Jesú斯 caponaliatsi Gólgotavënë tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejajume. **34** Bajarajota picani Jesú斯 rajutatsi vinora, pematajérëabira piatsaxarata. Jesú斯 picani rajutatsi bitso penavixetaeyaniva pecobematabiabarutsijavatatsi cruzajavabelia. Jesú斯 pajane bajarapora. Itsiata apo apae.

35 Nexata jane baja Jesúς vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita

beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë itsa natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitsi mapacueniae: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi.

³⁶ Bajaraxuacujinae vajabitsaëvi bajarajota evetena penaitaxutocaevetsinexatsi Jesús.

³⁷ Bajarajota Jesús pematabocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabécuene yabara naneconitsiaexanatsi Jesús. Jumai tsarutsi peyaquinæitane cruzajavata mapacueniae: “Mara ponë Jesúsje, judíovi pepo pevetsinë,” jai tsarutsi Jesús yabara.

³⁸ Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi. ³⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. ⁴⁰ Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matacabita icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso pexénatomë, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

⁴¹ Bajara pijinia pacuenia sacerdotevi penamat-acaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi piñaancianovi ata capocaponatsi Jesús. Ëpamonae najumaitsi:

⁴² —Maponéje itsamonaе yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa apo caejépaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata jane baja jumecovënëtsianatsi Cristonëcuene. ⁴³ Bajaraponé pina najamatabëcuenecopata Diosojavabelia peyavenonaenexatsi. “Xanë raja Dioso pexénatonë,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

⁴⁴ Ponëbeje penacobetoxotsinëbeje Jesús yajavacobematabiabarutatsi, bajaraponëbeje ata Jesús bijataerucatsibeje bajarapacuenia.

*Pacuenia baja Jesús tēpa yabara pelvaisi
(Mr 15.33-41; Lc 23.44-49; Jn 19.28-30)*

⁴⁵ Jesús baja itsa tēpaejitsia, ajena matonejejitsia, daxita nacuanëjava aitaquiri tsajuni. Matapania caniviyojavabelia, bejamatabëcuene a las tres,

nacua napebeta icatsia. ⁴⁶ Nexata paepatota icatsia nacua napebeta, bajarapaepatota pinijicuenia Jesús aëjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejajume.

⁴⁷ Nexata itsamonaе bajarajota penubenaevi bijiaya jumetane bajarapacuenia Jesús pejumaitijava. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspiginëmi, Diosojumepaebinëmi, jai bajarapamonae.

⁴⁸ Nexata bajarapamonaeyajuvënëne bepijia cujinaelia pecarenanexa esponjavënëjava. Nexata esponjavënëjava jabutaba piajatuvinorayalia. Bajaraxuacujinae esponjavënëjava naeboupita cëtaruta. Toyotsiatsi Jesús petsutsuninexa picani bajaraxua. ⁴⁹ Itsiata itsamonaе jumaitsi:

—Copare abaxë. Taenatsi Elíaspiginë itsa najetaruca pecapanepaenexatsi, jai bajarapamonae capocaponaeaya.

⁵⁰ Icatsia Jesús pinijicuenia aëjai. Bajaraxuacujinae jane baja Jesús tëpanajereca.

⁵¹ Paepatota Jesús tëpanajereca, bajarapaepatota templobo ënëtuatuajëalia peyatuucutarutsipana, ayaipapaëbërëpanaxaneto, titititica tuatuajëareca, athëbëvetsicacujinae irabereca. Ira najëaba. Ibotoxanetonë ata sarapajunujunua.

⁵²⁻⁵³ Ayaibitsaëto Dioso pepua pejumecovënëtsivi petëpaevimi pemëthëanë ata napananubena. Nexata Jesús acueyabi matacabita icatsia itsa

asaë petëpaecujinae, pamonaem pemëthëanë napananubena, bajarapamonaem ata cotocaevi asaë. Nexata pitsapa mëthëvetsina. Nexata bajarapamonaem pona Jerusalén tomarabelia. Bajarajotalia naitajébapona jivi ayaibitsaëtojavabelia.

⁵⁴ Jesúz cruzata petëpaejavata vajabitsaëvi pijacapitán, pijajivi yajava, nuca. Taenubena Jesúz petëpaejava. Jesúz petëpaejavata ira najéaba. Nexata bajarapamonaem itsa tane ira penajéabijava, itsajavanë ata itsa taepona, bajarapamonaem bitso junava. Jumaitsi:

—Matsaena ponë tēpaje, pepacuene baja rovia Dioso pexënato, jai bajarapamonaem.

⁵⁵ Bajarajota petiriavibitsaëtoxaneto tajiyoverena taenubena Jesúz petëpaejava. Bajarapape-tiriavi Jesúz pepëta naponia Galilea nacuverena, Jesúz peyavenonaevimitsi. ⁵⁶ Bajara pa-petiriavibitsaëtoxaneto tuatuajëta nanubena mapamatabëxëyoje. Itsava Maríavënëva, Magdala tomarapijiva. Itsava icatsia Maríavënëva. Bajrapova Santiagobeje Josébeje pena. Itsava pijinia Salomévënëva. Bajrapova pijinia Santiagobeje Juanbeje pena. Bajrapova Salomévënëva, Zebedeo pijava.

Pacuenia Jesúz petëpaenë mëthëtatsi yabara pelivaisi

(Mr 15.42-47; Lc 23.50-56; Jn 19.38-42)

⁵⁷ Itsa baja caniviyotsia, José, Arimatea tomarapijinë, pona nacuaevetsinë Pilatojavabelia. Bajaraponë José bitso pexainaenë pexainaejava. José jumecovënëtaponapona Jesúz Cristocuene.

⁵⁸ Nexata José itsa pata nacuaevetsinë

Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. ⁵⁹ Nexata José cruzajavavetsica pitsica Jesús petëpaenë. Mataquionaeya daxitanëreca matacacëba pexaniaviria piapiasábanapanata, piaxuirajibipanata. ⁶⁰ Bajaraponë José, pamatacabí têpa pemëthëtsinexatsi picani, iboitapajanitojavata pinijiibovaju toexanabuatatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijiibopanaxaneto José tixirena. Yavajuvëpaacatabuata. Nexata baja José naviata pijaboyabelia. ⁶¹ Bajarajota ibovaju itapajavata eecabeje anijavabeje ëMaríavënëvabeje. Itsava María, Magdala tomarapijiva.

Pacuenia vajabitsaëvi Jesús pemëthë evetavanapa yabara pelivaisi

⁶² Pascuafiesta pejonematacabinexa pevajënaeya pamatacabí, judíovi baja banacuenevereta penacuenebijava. Nexata baja pamatacabí judíovi banacuenevereta penacuenebijava, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilatojavabelia. ⁶³ Nexata bajarapamonae jumaitsi Pilatojavabelia Jesús yabara:

—Pamatocabí abaxë bajaraponë asaë tsaponaponae bitso najumetsënëtabiaba. Jumai tsabiabi: “Tatëpaecujinae, acueyabi matacabita, icatsia asaënë tsane,” jai tsabiabi. Bajarapejumaitsijava paxanë apo

panacofënëtsinë. **64** Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matacabijavabelia, bajaraponë pecapaebimatacabijavabelia. Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,” pejaijava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaubitsaëtoxaneto, jai bajarapamonae Pilatojavabelia.

65 Pilato nexata jumaitsi bajarapamonaejavelia:

—Mapamonaе tajajivi, vajabitsaëvije, payajavaponare. Nexata paitorobare bajarapamonaе Jesús pemëthë pevetsinexa xaniavaetsia, jai.

66 Nexata bajarapamonaе vajabitsaevi barëponalia Jesús pemëthëjavabelia. Bajarapamonaе pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitojavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

28

Pacuenia Jesús petëpaecujinae icatsia asaëyabara

*pelivaisi
(Mr 16.1-8; Lc 24.1-12; Jn 20.1-10)*

¹ Judíovi baja penacueraevetsimatacabí itsa verevereca, meravia pitsijavata, bajayacunua, ajena matacabí tsarucapona, María, Magdala tomarapijiva, itsa María yajava, taeyojopaliabeje Jesús pebuatsiibovajutsijavabelia. ² Jemata ira najéaba. Tsipaji Dioso pijángel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapaibopanaxajumata. ³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojajava matatoxenetsia. ⁴ Vajabitsaë, pamona evetanubena Jesús pebuatsiibovajutsivëpa, itsa tane ángel, neconeojai pecajunavi. Bobenajunua bepetëpaevi. ⁵ Nexata ángel jumaitsi petirivabejejavabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabi-abarutsinëmitsi cruzajavabelia, pajaitamebeje. ⁶ Ajibi raja tsarucae majotaje. Asaë rabaja icatsia pacuenia baja cajena tajëvelia jumaitsi. Parenamërebeje panetaenexabeje itsajota picani buatatsi. ⁷ Bajaraxuacujinae paliamëbeje tsane bepilia. Pijajivijavabelia patsipae-bianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacxitajarabianame,” pajamëbeje tsane pijajivijavabelia. Bajarapalivaisiyo

xainajë patacatsipaebinexabeje, jai ángel bajarapovabejejavabelia.

⁸ Nexata bajarapovabeje naviatabajiravabeje Jesùs pebuatsiibovajutsivecua. Junavabeje picani. Itsiata baréyabeje bitso. Cujinaetabajiravabeje petsipaebinexabeje Jesùs pijajivijavabelia. ⁹ Bajarapovabeje namutualia pecujinaejinaenajetarucaejavatabeje, Jesùs jemata tsitanaitajétatsibeje. Nexata bajarapovabeje cujitaliabeje Jesùsjavabelia. Bajacobatsibeje. Nexata pematabacabëta nucajunuabeje. Sitaicalabeje yaiyataeya Jesùs pecopiapitsinexabeje bajarapacuenia. ¹⁰ Jesùs nexata jumaitsi bajarapovabejejavabelia:

—Pëtsa pajunavamebeje. Paliamërebeje tajajivijavabelia. Pajumaitsimëbeje tsane tajajivijavabelia: “Jesùs raja jumaitsi. Paponaeremelia pina Galilea nacuayabelia. Baja pina jotalia pacacaxitajarabiana Jesùs,” pajamëbeje tsane tajajivijavabelia, jai Jesùs.

Pacuenia vajabitsaëvi navajunupaeba yabara pelivaisi

¹¹ Paepatota ëMaríavënëvabeje naviatabeje Jesùs pebuatsiibovajutsijavavelia, vajabitsaëvi, Jesùs pemëthë pevetsiviyajuvënëvi, pona tomarabelia. Bajarapamonaë tsipaeba sacerdotevi penamatacaitorobivijavabelia pacuenia tane bajarapamonaë. ¹² Nexata sacerdotevi penamatacaitorobivi pona judíovi pijaancianovijavabelia penabarëcuaicuajainexa penajamatabëjëpaenexa pacuenia exanaejitsia. Nexata jane baja bajarapamonaë

najamatabëcuenejëpa. Nexata bajarapamonae rajuta ayaijava palata vajabitsaëvijavabelia.
13 Bajarapamonae jumaitsi vajabitsaëvijavabelia:

—Jivijavabelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonae juta Jesús petëpaenë,” pajamë tsane. **14** Nexata nacuaevertsinë Pilato itsa jumetaena mapajumeje, paxanë itsiata pacayavenonaenatsi itsacuene papecexanaeyaniva, jai bajarapamonae vajabitsaëvijavabelia.

15 Nexata vajabitsaëvi jejai. Nota bajarapa-palata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenëjutatsi, jai tsaponae jivijavabelia.

Bajarapacuenia vajabitsaevi pepaebixae, judíovi juya bajarapacuenia natsipaebapona. Nexata mapamatocabijavaberena ataje judíovi jumai tsabiabi:

—Jesús pijajivi petëpaenëjutatsi, jai tsabiabi.

Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjava yabara pelivaisi

(Mr 16.14-18; Lc 24.36-49; Jn 20.19-23)

¹⁶ Jesú斯 pijajivi once ponëbeje pona Galilea nacuayabelia. Jesú斯 pijajivi pona petsutojumabelia, patsutojumatalia Jesú斯 caxitajarabiapae-batsi. ¹⁷ Nexata bajarapatsutojumata Jesú斯 pijajivi itsa taenuta Jesú斯, yaiyataeya pitabarata pematabacobéta tonubena. Itsiata itsamonae Jesú斯 pijajiviyajuvënëvi jamatabëcuenenavëxaniabiaya jamatabëjumaitsi:

—Apo Jesú斯 meta, jamatabëjai.

¹⁸ Nexata Jesú斯 pijajivi cujirena. Jumaitsi pijajivjavabelia:

—Dioso baja cajena nevetsiaexana daxitacuene athëbëtatsia, daxita mapanacuajava ataje, taevetsinexa. ¹⁹ Nexata pacaitorobatsi. Paponare daxitanacuanëjava daxitanacuanëpijivi tajumelivaisi patanetotsipaebinexamë tanejumecovënëtsinexa. Bajarapamonae pabautisabaponaename taxa pevënëta, xanë ata pexénatonë tavënëta, Espíritu Santo ata pevënëta. ²⁰ Bajarapamonae patsipaebaponaename pejumecovënëtavanapaenexa daxita pacuenia pacaitorobatsi. Pëtsa panacofënëtarne daxitamatocabi patacayajavaponaponaejava. Nacua pevereverecaejavabelianexa ata pacaya-javaponaponaenatsi, jai Jesú斯 pijajivjavabelia.

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
bc03f416-faf8-5000-bfb5-5ca8a3fa98cf